

ماجد عبد الله



دار ليلہ کیان کورب  
للنشر والتوزيع

Sp V915

قمر لينا

ماجد عبد الله

كيان كورب للنشر والتوزيع والطباعة  
دار ليلي

الكتاب:

قمر لينا

المؤلف:

ماجد عبد الله

\*\*\*

الغلاف:

محمد محمود

\*\*\*

الإشراف العام:

محمد سامي

\*\*\*

© جميع الحقوق محفوظة، وأي اقتباس أو  
تقليد أو إعادة طبع - دون موافقة كتابية -  
يعرض صاحبه للمساءلة القانونية.

المهندسين-23 شارع البوهران-تقاطع مصدق-الدور الرابع-مكتب 11  
هاتف: 33370042 (02)، 23885295 (012)، 002)  
البريد الإلكتروني: mail@darlila.com الموقع الرسمي: www.darlila.com

ماجد عبد الله

## قمر لینا

دار لینا  
کیان کورب  
للنشر والتوزيع

هذه الرواية مقتبسة عن أحداث ومواقف في الحياة حقيقية بعضها عن  
أحداث شخصية والبعض الآخر عن حياة آخرين

ملحوظة :

أتمنى أن تعيش أيها القارئ كأحد شخصيات الرواية بين يديك ولك حرية  
الاختيار في النهاية

## الإهداء

إلى كل من دعمني ووقف إلى جانبي في هذه الحياة ، إلى أبي وأمي

العزیزین إلى قلبي

وأخي المخرج والنجم المنتظر... وإلى الأيام والحياة التي تعلمنا أبد

الدهر، أهدي إليكم هذا العمل..

(1)

أحياناً بتيجي على الواحد لحظات يبكي الدموع من كتر الاحتياج لشخص مبقاش موجود في حياتنا أو يمكن ببساطة رحل إلى الأبد، تبقى محتاج لأي حاجة تفكرك بيه، أي وسيلة تفكرك بصوته وبشكله ولا تملك في النهاية إلا صورة واحدة بس تفضل ترجع بيها لذكريات عشتها معاه، وفجأة ترجع للواقع وتكتشف أن الماضي بحلوه ومره، عمرك كله مش هتقدر تعيده تاني.

تخرج هذه الكلمات التي يعتصرها الحزن والألم من شادي في إحدى عيادات الطب النفسي بالمعادي ناظراً من خلال النافذة المطلة على الشارع والذي بدا خالياً من مظاهر الحياة اليومية في الصباح الباكر، وكعادة الدكتور مصطفى في العلاج النفسي يجلس في هدوء وعلى المنضدة بجانبه ملف شادي إبراهيم الذي يعالج من إدمان شرب الكحول ويعاني من بعض الاضطرابات النفسية، يفتح الملف ويقرأ قليلاً عن حالة مرضه وبرغم خبرته التي تتعدى العشر سنوات في العلاج النفسي فقد شعر أنه من الحكمة أن يستمع إلى قصة شادي وإلى السبب الذي دفعه إلى حالته هذه. اعتدل الدكتور مصطفى في جلسته ولازال الملف في يديه وبعد لحظات قليلة من الصمت قال:

وبعدين يا شادي؟ كمل، بص علشان نبقى متفقين أننا عايزك



تتكلم وتطلع كل اللي جواك متخليش في نفسك أي حاجة خالص، إحكيلي كل حاجة من البداية، من الألف الى الياء

التفت إليه في هدوء وجلس أمام الدكتور مصطفى متكئاً برأسه على يده اليمنى، أخذ بعضاً من الوقت وبعد تنهيدة خرجت من أعماق جبال الحزن والاكتئاب بداخله قرر الاستسلام إلى هدوء معالجه الجديد الدكتور مصطفى في أولى جلساته معه وكنتيجة لهذا الاستسلام والهدوء الذي سكن الغرفة قال:

- زمان يا دكتور أيام والدي الله يرحمه قالي نصيحة، قال دايماً حاول إنك تشوف أحسن الصفات في الناس وامسك في ابن الحلال لأنه أبقالك وابعد عن ابن الحرام لأنه في أي لحظة يخلي بيك، كانت دي أكثر نصيحة بيقولها لي ومكشش بيقولي أكثر من كده لكن حسيت إن في النصيحة دي مغزى كبير قوي أدركته بعدين، بعد وفاة والدي الله يرحمه فضلت سنين كنت حاسس فيها إنني مختلف في عيون الناس، اختلافاً سلبياً عمري ماحولت أفهمه لأنني وصلت لدرجة القرف و الزهق وفضلت عايش حياتي بالطريقة دي كثير، قرفان من أي حد شايفني بطريقة سلبية، فيما عدا بنت واحدة بس استثنيتها من ردة فعلي.

- بنت واحدة؟ ياترى مين؟

بعد برهة من الصمت:

- ليها

يكتب الدكتور مصطفى اسمها في مكان معين في ملف شادي، فشيئاً ما بداخله يخبره بأن هذه الفتاة المدعوة لنا هي سبب الاكتئاب والحالة النفسية التي وصل إليها شادي، فما بين إدمان الخمر ونوبات الغضب والتدهور النفسي والاكتئاب الحاد تكمن أحداث معينة في حياة مريضه البالغ من العمر 31 عام، يحاول مجدداً الغوص في نفسيته قائلاً:

- ويأتري كانت صاحبك؟ هل كانت بتربطك بيها علاقة عاطفية مثلاً؟ إحكيلي

- كانت أكثر واحدة عندها طيبة وأمل في الحياة كانت مثلاً جميلاً جداً في الجدعة، عمري ماشوقت زيتها أبداً في حياتي ومش وارد أبداً إني أشوف حد زيتها ثاني، كان في حاجة غريبة تخليك تتشد ليها، نوع من الحساسية لوعود الحياة، وكأنها زي الفايرس، الفارق بس إنها كانت سبب تديك أمل في بكره.

ينظر إليه مستغرباً وقد أغلق ملف حالته مجدداً قائلاً:

- ممممم الكلام لحد دلوقتي جميل، تفتكر قابلتها أول مرة إمتة وفين؟

سكت مجدداً مطلقاً تنهيدة من صدره المكلوم وقال:

- من حوالي أربع سنين في فندق هيلتون رمسيس في عبد المنعم رياض، كنت بمقدم علي وظيفة عن طريق واحد معرفة هناك، موظف في الريسبشن بمرتب كويس، ولجل صدفة الأقدار وبين كل الناس اللي

بتشتغل في الفندق كان مستقبلي تحت إشراف شخص ما كنتش لسه  
قابلتها، لينا

- آه... إذا كانت زميلتك في الشغل

- زميلتي، آه كانت زميلتي فعلاً

ينهض شادي من مقعده الكائن أمام معالجه ويقرر التجول في الغرفة  
محاولاً إقناع نفسه أنه لا بأس في الإفصاح قليلاً عما في القلب وخفاياه  
وربما ساعده على ذلك مدى سعة الغرفة الخاصة بالدكتور مصطفى برغم  
كثرة الكتب الخاصة بعلم النفس وأوراق وملفات المرضى، وما يعطيه  
الضوء المريح للعين من هدوء يساعد بشكل أو بآخر حالته، تركه الدكتور  
مصطفى يتجول في الغرفة بهدوء كما يشاء فليس هو الشخص التقليدي  
الذي يجعل مريضه يستلقى على ظهره من أجل ممارسة عمله كطبيب  
نفسي بل حاول أن يكسر تلك القواعد فقط لكي لا يشعر شادي بدوره بأنه  
مقيد أو تحت استجواب من نوع ما، ومن هنا أكمل قائلاً:

- بدأت الحكاية كلها في صيف 2012، أيامها كان عمري 28

سنة، شاب بتشرته بيضة زي الأجانب وأشقر، في بداية حياته لسه  
بيحاول يعاقر في الدنيا علشان يعيش اليوم بيومه، مجرد شخص عادي  
ويمكن أبسط من العادي كمان، و زي ما أنت شايفني قدامك طويل وعريض  
وبعكس منظر شعري الطويل المبهد، ودقني إلي بطلت. أحلقها، كنت  
معتدلاً في كل حاجة، شعري كن قصيراً جداً ودقني كنت بحلقها

باستمرار، باختصار كنت مهتم بمنظري وبحياتي، في اللبس في الأكل في الشرب وكان لكل حاجة عندي حدود، حتى كنت زمان بلعب رياضة وبشيل حديد، وبرغم ده كله مكنتش بتمتع بأي نوع من أنواع الرفاهية، كنت استقلت من شغلي في شركة سياحة وفضلت فترة صغيرة بدون شغل، أتذكر اني قدمت في كذا مكان وكلمت واحد صاحبي اسمه إبراهيم معرفة اكتشفت فيما بعد أياميها إنه بيشتغل في هيلتون رمسيس إنه يشوفلي أي شغلانة عنده هناك و هو وعد بده، وفي يوم لقيت إبراهيم بيصحيني من النوم الصبح وكان بيتصل بيا بإصرار وهستيريا بشكل غير طبيعي، حوالي أكثر من خمس مرات بيتصل بيا على الموبايل رديت عليه بصوت باين عليه النوم

- ألووو

- يخرب بيت سنينك يا شيخ إنت نايم؟ فوق واصحى كده

- صباح الخير يا إبراهيم

- بلا صباح بلا مسا فوق كده واسمعني علشان الصنارة غمزت

- مش فاهمك على الصبح أنجز

- إنت هتشتغل في الريسبشن عندنا في هيلتون رمسيس

سكت وكأن شومة خبطت راسي لدرجة إنني مستوعبتش الموقف، كنت

لسه على السرير وأنا بكلمه وقلت لنفسي أكيد أنا بحلم

- إنت معايا يا بني؟ ألووووووو

- وحياء أبوك يا إبراهيم إنت بتتكلم بجد؟

- يعني هتصل ببيك الساعة ستة الصبح أهزر منكك يعني، بقولك

إيه نط في أي بدلة شيك كده علشان هتقابل المدير واستنظف متفضحناش

أنا هكون هناك في خلال ساعة، قدامك أد إيه وتكون عندي؟

- يعني ساعة كده

- أوك سلام

إبراهيم كان بيشغل أمن جوا الفندق وبرغم إن العمر تقريباً واحد  
ومشوفتوش بقالي سنين من ساعة ماتخرجنا من الجامعة و دفش في كلامه  
في بعض الأحيان إلا إنه رجوله في مواقف كتير.

قمت من سريري و أنا بسترجع كل كلمة قالها إبراهيم ولسه مش  
مصدق، وعلشان الوقت دخلت آخد دش و ليست بدلتني بسرعة وخرجت  
من الغرفة

كنت عايش أنا ووالدتي بس في حديق الأهرام في شقة 167

متر، وبعد ماخلصت أمي صلاة الصبح بصتلي باستغراب وقالت:

- بسم الله الرحمن الرحيم، إيه إلهي صحاك بدري يابني وإيه

إلهي ملبسك البدلة دي على الصبح؟

قعدت جنبها على الأرض وبوست إديها ورديت:

- إدي إيلي، إبراهيم جابلي شغل عنده في هيلة نون رمسيس

والمفروض أقابل المدير، هشتغل موظف استقبال ريسبشن يعني

- بجد؟ ربنا يفتحها عليك يابني ويرزقك برزق واسع

وخرجت من البيت وركبت تاكسي يوديني على هناك وفضلت أضرب  
أخماس في أسداس لحد مانزلت نزلة التحرير من الدائري وقررت أكل  
إبراهيم علشان أكسر الرهبة إللي جوايا

- ألووو، أيوه يا إبراهيم

- وصلت فين دلوقتي؟

- أنا نزلت نزلة التحرير 5 دقائق ويمكن أقل وأجيلك

- طيب حلو قوي أنا هستناك بره أهو

وفعلا وصلت، وزى ما أنت عارف يادكتور الفندق متحاوط بسور  
حديد لازم تعدي من بوابته إللي قصداها فرد أو اتنين أمن مع كلاب  
حراسه عديت من ده وكان إبراهيم مستني عند باب الفندق بالضبط وبعد  
السلام والأحضان قالي إن المدير حصلته ظروف فهي تأخر ويمكن مي جيش  
أصلا ولكن هو خط كل الصلاحيات تحت إيد أشطر موظفة عنده وشاورلي  
عليها

كانت واقفة بره بتتكلم في التليفون

- يا حبيبي

- إيه مالك؟

- هي دي إللي هقايها يا إبراهيم؟

- آه هي، اسمها لينا

فضلت أتأمل في جمالها يا دكتور وقلت لنفسي أكيد ربنا استجاب  
لدعوة أمي، كان باين عليها الهدوء، مش لبط ولا من الناس إللي تلعب  
بيك علشان تطيرك من المكان والسلام، حاجة جوايا خلتني أتوسم فيها  
الخير وأطمئنها

كانت واقفة بتتكلم في الموبايل وبتبص للسما، حسيت لحظتها إن لينا  
بتحاول توصل لفوق للسما الصافية

عاد شادي مجدداً إلى صمته للحظات وقد أعاد التفكير في مسألة  
استرجاع الأحداث قائلاً بشكل فيه شئ من الحسم والرفض:

- أنا مش عايز أتكلم في الموضوع ده يا دكتور

شعر الدكتور مصطفى أن هناك شيئاً ما حدث، شئ ما يؤلم لدرجة  
تمنعه من الحديث عن الماضي، حتى جاءت فكرة، فكرة ربما تريح شادي  
إلى الأبد، وقف أمامه مبتسماً وقال:

- يبقى اكتب عن الموضوع ده

- اكتب؟ وأنا ليه أعمل كده؟

توجه الدكتور مصطفى إلى مكتبته وأخرج منها عدة أوراق بيضاء  
مفسراً له:

- يا سيدي إذا مكنتش مرتاح إنك تتكلم معايا وتفضفض بيبقى

فضفض على الورق

- أنا عمري مكنت نافع في حكاية الكتابه والتعبير دي
- مافيش حد هيقرا إللي كتبته أصلا لأنك لما توصل للنهايه ممكن تحرق الورق ده

نظر شادي إلى الدكتور مصطفى وقد رسم على وجهه ابتسامة ضعيفة ممزوجة بالألم في حين أن الدكتور مصطفى نفسه ظل مبتسماً له لإعطائه جرعات مضاعفة من الاطمئنان أن ما سوف يبوح به على الورق ولا يستطيع البوح له شخصياً لن يطلع عليه أي مخلوق.

- اكتب عن إيه؟

وضع الأوراق أمامه وأعطاه قلمه وقال:

- أي حاجة تخطر على بالك، ذكرى، فكرة، أو مكان، أي حاجة تيجي في بالك اكتبها ببساطة.

شئ في داخله دفعه إلى الإقتناع بهذه الفكرة فما المانع أن يكتب مأساته على أوراق بيضاء ومن ثم يصبح مصير ماكتب هو الحرق ربما ببساطة هو السبيل الوحيد لغسل الهم واستئصال الحزن في قلبه من جزوره، يجلس على مكتب الدكتور مصطفى مفتشاً في الماضي عن البداية سائلاً نفسه ذلك السؤال من أين أبداً؟

وجد نفسه ممسكاً القلم وشرع في الكتابة:

سأحاول أن أسرد حقائق علاقتي بها، بمعنى أيق حقيقة حياتها الشخصية وحبها بكل ما أستطيعه من صراحة وصيق فانا أؤمن بأن



علاقتي بها لم يسبق لها مثيل وربما ما سأقوله لكم يوثق سجلا ثميناً لأحداث ومشاعر لا أرغب في نسيانها أبداً.

قال لي الدكتور مصطفى أن أكتب كل ما في داخلي على هذه الأوراق ومن ثم أحرقها ببساطة، لقد أعدت التفكير في الأمر، سوف أكتب كل شيء ولكن لن أحرق هذه الأوراق فقد يشاء رب العالمين عز وجل أن تكون هذه الكلمات التي سوف أكتبها سبيلاً لتبرأتها أمام كل من كان له علاقة بها وظلمها.

كنت قد تحدثت مع الدكتور مصطفى عن بداية رؤيتي لدينا تلك الفتاة التي لم ولن أنساها أبداً وقد توقفت في الحديث معه عندما قابلت صديقي ابراهيم عند بوابة فندق هيلتون رمسيس وكانت هي تقف خارجاً أيضاً تتحدث في هاتفها المحمول.

كان المكان في عز ذروته في العمل أمام السياح الأجانب والعرب من كل مكان في العالم وبطبيعة الحال فإن عملي كموظف استقبال في فندق هيلتون رمسيس سيجعلني أرى العالم من خلال عين شاب أعذب لم يرى كثيراً من هذه الدنيا.

و برغم أنني أعاني من الوحدة القاتلة دوماً إلا أنني شعرت أن وظيفتي الجديدة سوف تؤمن لي علاقات جديدة وواسعة وكانت البداية معرفتي بها.

كنت قد تسميت في مكاني أحرق فيها لدرجة أن إبراهيم كزن يتحدث

إلي ولم أكن أعرفه أي انتباه و في الحقيقة لم أكن أدري عما كان يتحدث  
بالتحديد

- شادي، يا شادي، أنت يابني روحت مني فين؟

- هااااا، أنا؟ آه آه معاك معاك

- معاك معاك؟ والله شكلك هتودينا في داهية، بقولك إيه ركز  
معايا و حياة أبوك دي فرصة متتعوضش ومحدش لاقى شغل اليومين دول  
فرکز كده وشد حيلك، بص أهي خلصت تيلفونها أهي تعالى معايا أعرفك  
عليها

أمسكني إبراهيم من يدي ومشى بخطوات سريعة نحوها تلك اللحظة  
شعرت أن إبراهيم متحمس أكثر مني أنا المتقدم لتلك الوظيفة حتى أنني  
سمعت صوت والدي رحمة الله عليه حينما نصحني وهو على فراش الموت  
قائلاً:

(دائماً حاول إنك تشوف أحسن الصفات في الناس وامسك في ابن  
الحلال لأنه أبقالك)

كانت ليña تماثل في المظهر ممثلة السينما الأمريكية أنجلينا جولي إلى  
حد ما، على الأقل كنت أراها أنا كذلك، فثمة ما يوحى بالطبيعة الغربية  
في مظهرها. كان لون بشرتها قمحياً بشعرها البني الأخاذ تتمتع بعلامح  
جميلة جداً ولم يقتصر الأمر على ذلك فحسب بل إن جسدها وقوامها  
الممشوق يبدو غربي الملامح وفي ذلك الوقت لم يكن في استطاعتي سوى أن

أتخيل جمال طباعها بالقدر الذي تتمتع به من جمال الجسد.

أخذ إبراهيم المبادرة قائلاً:

- صباح الخير يا ليلى

- أهلاً يا إبراهيم صباح النور أخبرك إيه؟

- الحمد لله، ده شادي إلهي كنت كلمت أستاذ حسن عليه

بخصوص وظيفة الريسبشن وقال إن المفروض إنك تقابليه بالزيارة عنه

- آه أهلاً وسهلاً فرصة سعيدة يا أستاذ شادي

قمة في الاحترام والتقدير لم أكن أتخيل أن ألقاه أبداً، كنت متخيلاً أن

المعاملة والمقابلة ستتمتع بشئ من الرتبة و الرسمية لكن اتضح العكس

تماماً، فلم أجد نفسي إلا ويدي ترغب بشدة في مصافحتها

- الشرف ليا يافندم

- تعالى اتفضل نقعد جوا نتكلم شوية

هنا قاطع إبراهيم الحوار قائلاً:

- طيب استأذن أنا بقى أروح لشغلي، اتوصي بيـه يا ليلى ده

أخويا، وأنت شد حيلك واتجدعن يا بطل بالتوفيق.

دخلنا سوياً إلى داخل الفندق وكنيت أراقب عن كثب كل صغيرة

وكبيرة قدر المستطاع في هذا الفندق وما يمثله من عالم كبير لم أختلط به في

حياتي، دخلت معها أحد المكاتب على يمين الريسبشن الذي من المفترض

أن أعيل فيه إلى جانب شخص أو شخصين على الأكثر وحينما جلسنا

وجيًّا لوجه كانت تعابير وجهها وملامحها تعطيني انطباعًا بالاسترخاء  
وطرد الرهبة والخوف من قلبي، لقد شعرت بقلقي فعلا فقد كنت أتصعب  
عرقًا واحمر وجهي من شدة الإخراج، كانت أولى خطواتها هي المزاح  
للتخفيف عني

- عامل إيه انهرده يا روش؟

- الحمد لله في نعمة

وابتسمت، ولم يكن عندي سوى رد الفعل البسيط هذا تجاهها

- احكي لي عن نفسك شوية

- تحبي تعرفي إيه حضرتك بالضبط؟

- مبدئيًا بلاش حضرتك دي وجو الرسميات ده، اسمي لينا

وبس، ثانيًا احكي عن أي حاجة عن نفسك، دراستك، مؤهلاتك، كده

يعني

- آه، فهمت، اسمي شادي وأنا خريج كلية الألسن جامعة

القاهرة اشتغلت فترة في شركة سياحة هنا في وسط البلد بس سبت الشغل

- وياترى سبت الشغل ليه؟

- الشغل مكنش ماشي على مايرام والشركة لجأت إنها تصفي من

موظفيها وتقلل العدد وأنا كنت من ضمن تعيينين الحظ إلي ميشيو

- امممممم تمام تمام، طيب بصر يا عم شادي، باين عليك حد

محترم جدًا ويمكن إبراهيم قالك إني هتقد معاك بدل استاذ حسن المدير

هنا، باين عليك حد فاهم وعندك استعداد للشغل علشان كده ميرضنيش  
إنك تمشي مكسور الإخاطر، مبروك يا زميل بقيت معنا خلاص.

مستغرباً:

- بالبساطة دي؟ طيب وأستاذ حسن

- آه يا سيدي بالبساطة دي، وبعدين لو على الأستاذ حسن فهو

مدّيني صلاحية الرّفص أو القبول بما يناسب طبيعة العمل، وأنا شايفاك

مناسب للوظيفة مقارنة مع الناس إللي جت قبلك

نظرت إلي للحظات وبعد صمت قالت:

- من النهارده أنا مسؤولة عندك

- حتى الآن لم أستوعب صدمة الموقف الذي وضعت فيه كنت في دهشة

تامة لم أنطق ولو بحرف واحد

- أنا عارفه إنك مستغرب بس هتتعود مع الوقت، وعلى أي حال

إنهرده دورك هيبقي مراقب بس تشوف الدنيا ماشيه إزاي والموضوع

سهل جداً وبسيط هتتعود عليه، هالـ جاهز؟

بحماس قلت:

- آه طبعاً أكيد وإن شاء الله هكون عند حسن ظنك والأستاذ حسن

- وأنا متأكده من ده

لم أكن أعرف ما يدور في ذهني تجاهها أو حتى سبب ارتياحها لي  
وقبولي لأن أكون زميلاً لها في المهنة، لكنني افترضت إنها تملك من

الخير ما تقدمه للغير، تنظر إلى الكل بلا استثناء بثقة وشموخ والابتسامة قد رسمت طريقها إلى وجهها القمري، رأيت الكثير يحاول التودد إليها بشكل أو بآخر، وكانت كل تلك المحاولات تقابل منها بالرفض وإنما بشكل أكثر تهذيبيًا، من جانبي فقد كنت مستمعًا لها أكثر مني متكلمًا، كنت كما التلميذ، لم أتصرف بأية طريقة أخرى، كما لم أتوقع منها أي شئ سوى حسن المعاملة الكريمة في ذاك الوقت. وحينما أتذكر، تبدو تلك الأيام لي التي مضت سريعًا كالحلم مثل قصص الحكايات الخيالية، ولا شئ سوى التمني في أن تعود تلك الأيام مجددًا، لكن كما صدق المثل القائل تأتي الرياح بما لا تشتهي السفن في النهاية.

علمتني كل شئ كيف أتعامل مع نظام الحجز وطرق الدفع و تقديم المعلومة بشكل بسيط إذا ما أراد سائح مقيم في الفندق الاستفسار والاستعلام عنها، لم تبخل علي بأي شئ فقد علمتني بشكل فوق الممتاز. وكنت سعيدًا بذلك، ومن شدة السعادة كانت عيني تبحر بحثًا عن إبراهيم حتى وجدته جالسًا مع بقية زملائه من أفراد الأمن يتعامل مع الآلة التي تدخل فيها الحقائق كاشفة عن أي معادن أو شئ مخالف من أي نوع وحين التفت، نظر إلي وقد فهم أنني قد توظفت معهم وأن الأمور قد سارت على مايرام، ورفع إصبع إبهامه متبسمًا، قائلاً بذلك بشكل غير مباشر مبروك.

كان الريبسبتن يتضمن أربعة أفراد، لينا و طه ولياء وأنا. وأستطيع

القول إن لنا كانت هي أفضلهم على الإطلاق، ولم ألقى نفس الترحيب من طه ولياء على الرغم من أنهم أصدقاء لنا، بل تعاملوا معي في أول يوم لي بشكل عادي، بشكل أهلا وسهلا بيك، وأقنعت نفسي أنني إذا أردت فعلا مصادقتهم فربما نحتاج جميعاً إلى الوقت لتحقيق ذلك.

أمضيت اليوم مع لنا وبقية زملاء في سلام تام وكان إبراهيم يمر علينا من وقت لآخر يتحدث معنا على هامش وقت العمل، تارة عن أجواء العمل ومشاكله وتارة عن الراتب وتارة أخرى عن مظاهر الحياة.. وأمضينا اليوم هكذا حتى انتهى وقت عمل لنا في تمام الساعة الرابعة عصراً، منتهياً بذلك وقتي ولم أكرث ببقية زملائي، كان الفندق كله بالنسبة إلي هو لنا، سألت نفسي سؤالاً لما أنا منجذب إليها بهذه الطريقة أهو حب أم مجرد زمالة عمل؟ إذا كان على الحب فلا أملك لتحقيقه المال الكافي للزواج وحتى إن ادخرت من راتبي الذي اكتشفت فيما بعد أنه يبلغ في فندق هيلتون رمسيس خمسة آلاف جنيه فسأحتاج لوقت كبير وربما لسنوات من أجل تكوين نفسي، أهى زمالة فعلا؟ لما لا؟ ربما تتحول الزمالة إلى صداقة وهو ما أفتقده كثيراً في حياتي الشخصية، أرجعت السبب إلى طبيعتها ومعاملتها التي تركت أثراً طيباً في نفسي.

جاء وقت الرحيل وبعد أن استأذنت الكل وألقيت السلام أوقفني لنا

منادية:

- شادي، يا شادي استنى..

كنت على وشك الخروج من باب الفندق وعندما التفت إليها رأيته  
تتجه نحوي بخطوات سريعة، وكان المشهد برمته أمام إبراهيم،  
سألت:

- طريقك إزاي؟

- أنا رايح حدائق الأهرام

- إيه ده معقولة؟ على كده إحنا طلعا جيران أنا كمان ساكنة

هناك، معاك عربية؟

- الحقيقة لا أنا جيت مواصلات

- طيب تعالى أخذك معايا في طريقي أنا معايا عربية

كنت مخرجاً للغاية من هذا العرض وشعرت أن إبراهيم بمجرد أن  
نظرت إليه يحسدني على ما أنا فيه الآن، خرجنا من الفندق وركبت  
معهما بالفعل منطلقين سوياً إلى منازلنا، لوهلة من الوقت سرحت في  
التفكير مجدداً، ما الذي يدفع فتاة مثل ليلى تتساهل هكذا مع شاب غريب  
عنها ليس فقط في العمل وإنما كعلاقة شخصية، ترى ما هو السبب؟  
وكعادات وتقاليد شرقية لو أن الناس قد لاحظوا مثل هذه المواقف، فماذا  
يظنون لمجرد رؤيتهم مثل هذه العلاقة غريبة الأطوار في بدايتها، فلا  
أحد يتصرف هكذا في مثل هذا الزمن والطبقة أصبحت في خبر كان لتغيير  
المفاهيم بذلك. بمجرد أن أصبحنا على الطريق الدائري بدأت في فتح



الحوار مجدداً، ولا أعلم فلقد شعرت كطائر سكن قفصه وهناك من يفتح له الباب لكي يحرره، وكان قصي هو حرجي

إيه رايك في الشغل إنهرده؟

- جميل جداً، والله مش عارف أقولك إيه ولا أشكر إزاي

- متشكرنيش، كلنا كنا كده في يوم من الأيام، عادي، المهم مش

عايزاك تفكر إنك لوحذك في الشغل، هتلاقيني في ظهرك دايمًا.

مجدداً سرحت في تفكيري، كان وقع تلك الكلمات ليس طبيعيًا على

مسامعي، في حياتي كلها لم أر شخصية كشخصيتها، وحاولت التفسير قدر

استطاعتي، كيف تحولنا تلك المواقف الإنسانية إلى أشخاص أوفياء، تصبح

تلك المواقف كعلامات فارقة في حياتنا، والأشخاص كصورة رسمت نفسها

في الذاكرة، كيف يمكن أن أسد هذا الدين حينما يحين الوقت، ربما مرت

هي شخصيًا بمواقف صعبة وفارقة في حياتها ولم تجد من يقف إلى جانبها

وربما أيضًا إذا صح هذا الاحتمال وقفت بجانبني وكنت سببًا في استرجاعها

لذكريات غطتها أتربة الزمن ولم ترغب أن اختبر ما مرت به.

نظرت إلى وجهها بتمعن أثناء قيادتها لسيارتها وتمنيت أن تدوم

هذه العلاقة إلى الأبد وألا تكون لحظية فحسب واعتبرتها هبة إلهية.

خرجت من صمتي قائلاً:

- بجد أنا متشكر ليكي

- يا سيدي لا شكر على واجب، قولي أنت بتعمل إيه عامدًا

يعني في وقت الفراغ بتقضيه إزاي؟

- أبداً، ولا حاجة إما البيت أو الكافية
- إيه ده؟ وفين أصحابك مبتقابلهمش؟
- لا، كل واحد لاهي في حياته وفيه إلهي مكفيه، أغلب الوقت

لوحدي

- أهاااا قولتني، أنت عايش لوحديك على كده؟
- لا، أمي معايا وأنا وهي بس عايشين مع بعض
- طيب والدك فين وأخواتك؟
- والدي توفي من سنتين وللأسف مليس إخوات
- أنا كمان أمي متوفية بقالها ست سنين، الفرق إلهي وبينك
- إني عايشة لوحدي في فيلا دوبليكس طويلة عريضة ووالدي عايش حياته
- بره

كانت نبرتها فيها شئ من الحسرة والحزن خاصة فيما يتعلق  
بوالدها، يبدو أن هناك مشكلة ولم أشأ التدخل في هذا الأمر فقد تكون  
عندي انطباع أن مشاعرها تنزف من الداخل وأنها سجينه الوحدة.

- بدخن؟
- الحقيقة لا خالص
- يضايقك لو شربت سجارة؟
- لا أبداً



منها اسم حرف من الأبجدية العربية هي منطقة أ، ب، ج، د، هـ،  
و، ز، ح، ط، ك، ل، م، ن، س، ص، ع وكل حرف يميز برقم على  
حسب عدد العمارات والفيلات التي بنيت فيه، يتم الدخول إلى تلك  
المناطق من خلال أربعة بوابات تتخلل بنسب متساوية السور الخارجي  
المحيط بالمدينة والمكون بدوره حرماً خاصاً بالمدينة. تحمل كل منها اسم  
ملك من ملوك مصر القديمة وهي كالاتي من الأولي إلى الرابعة: بوابة  
خوفو، بوابة خفرع، بوابة منقرع وبوابة مينا.

كنت أسكن في منطقة البوابة الأولى وتحديداً في د... في إحدى تفرعات  
شارع جاردينيا، أما لنا فقد كانت تسكن في آخر شارع جاردينيا، ما  
يجعل المسافة صغيرة جداً بيني وبينها، فقط خمس دقائق لكي يصل  
أحدنا إلى الآخر.

أوصلتني إلى بيتي وشكرتها على تعبها معي وحينما فتحت اللوك  
يدويا أغلقته هي أتوماتيكياً، نظرت إليها وقلت:

- في حاجة يا لنا؟

لوهلة شعرت بأن مافعلته كان سخيفاً، وكانت نظراتها تعبران عن  
الحرع الشديد، أرجعت خصلة من شعرها خلف أذنها وطلبت مني بكل  
بساطة:

- شادي، يمكن إنت مستغرب أنا عارفه وحاسه بيك، أنا بس ليا

طلب بسيطة، أنا وأنت تقريباً فينب شبة من بعض، هو ممكن نبقى

أصحاب؟ لو تقبلني أكون صديقة ليك، يبقى شرف ليا بجد.

نظرت لها وقلت متلعثمًا من هول المفاجئة:

هااااا، اه اه، طبعًا ليه لا

وردت علي بابتسامة راضية من رد فعلي وبعيون تكاد تكون غارقتين في الدموع، ولم أفسر وقتها سبب تلك الدموع، وقلت لنفسني إنه لا يمكن أن يدمع المرء بسبب طلب صداقة من شخص آخر.

صعدت على السلم حيث كنت شقتي في الطابق الثاني، فتحت الباب ووجدت أمي جالسة أمام التلفاز وسفرة الغذاء أمامها، أغلقت الباب ومشيت بضعة خطوات ومن ثمة تسمرت في مكاني واقفًا أمام أمي.

- ها يا حبيبي، طمني عملت إيه؟

- الحمد لله، ربنا أكرمني وقبلوني هناك بمرتب كويس

- بجد؟ الحمد لله يا بني أحمذك يارب وأشكر فضلك

سكت قليلًا وسألتها بعد أن أسترجعت أحداث اليوم كله في ذاكرتي:

- ماما

- أيوه يا حبيبي عايز حاجه؟

- هي دعوتك ليا الصبح كانت إيه؟

(2)

ذهبت الى غرفتي بعد أن تناولت طعام الغداء مع والدي وأغلقت على نفسي باب حجرتي وكأنني أريد أن أنعزل عن الدنيا وما فيها، استلقيت على سريري ومازلت أفكر، حقيقة، ما الذي حدث بالضبط؟ حسناً، الموقف ربما يكون نادر الحدوث إذا ما قورن بحدوثه في أمريكا وأوروبا مثلاً، هل يجدر بي القلق والتوجس منها؟ لا إن بعض الظن إثم، لا يجب رمي بنات الناس بالباطل

صدي كلماتها مازال يرن في أذني ومن ضمن كل الحوار الذي دار بيني وبينها

(أنا بس ليا طلب بسيط، أنا وإنت تقريباً فينا شبه من بعض، هو ممكن نبقي أصحاب؟ لو تقبلني أكون صديقة ليك، يبقى شرف ليا بجد.) ماذا كانت تعني حينما قالت: إننا نشبه بعضنا البعض؟ ماذا رأت في شخصيتي؟ أفكار تأتي وأفكار تذهب ولم أجد لنفسني إجابة تريح نفسي وعقلي الذي أصبح على حافة الجنون.

أسكت هاتفي ودخلت على ذلك الموقع الاجتماعي فيسبوك لأرى أحوال البشر، كنت أقرأ تعليقات وأراء الأصدقاء على بعضهم البعض دون أن أضغط على الإعجاب أو أترك تعليقاً، حتى لفت نظري ما كتبه إبراهيم على صفحته: كتب:



حياتي و كده وبعدين طلبت مني إننا نكون أصحاب

- و زعلان إنها طلبت منك تكونوا أصحاب؟ تصدق إنك فقير أصلاً؟

- هي صحيح عايشه لوحدها يا إبراهيم؟

- آه ده حقيقي عايشه لوحدها و والدتها متوفية و أبوها داير على حل شعره ولا معبر بنته أصلاً، بص علشان أوفر عليك الوقت، هي بنت قمة في الاحترام، عمرها ما أذت حد ولا اتكلمت على حد بالباطل، هي بس ممكن تكون زي ما قولتلك مش أي حد يعمل معاها علاقه، حتى احنا زمايلها في الشغل تلاقي إثنين بالكثير قوي هما أصحابها والباقي زمالة عادية، لكن كون إنها اختارتك تكونوا أصحاب ده نادرًا قوي لما تعمله مع حد، خد الأمور ببساطة يا شادي ومد إيدك للعالم، إنت طول عمرك قافل على نفسك متعقدش الأمور، لينا مدت إيديها ليك حط ايدك في إيديها وكونوا أصحاب إيه المشكلة.

- إمام أشوف يا إبراهيم ربنا يسهل

- أوك، هشوفك بكرة تصيح على خير

انتهت المكالمة بهذه الإجابات التي بالكاد أشعرتني بالراحة، وإن كانت علاقاتها تسري بهذه الطريقة مع الكل في العمل فسأراقب الأجواء عن كثب.

وبالنسبة لما قاله لي إبراهيم في آخر المكالمة فقد كان حقاً، بعد وفاة



والذي عزلت نفسي عن كل ما هو متعلق بالروابط البشرية، أمضيت حياتي وحيداً بعيداً عن كل الأصدقاء بل وقطعت علاقتي معهم أيضاً، ولم يكن بالأمر السهل علي أن أعيش هكذا، كرست نفسي للعمل وتحملت المسؤولية، كنت مضطراً إلى مواجهة كل الالتزامات براتب ألفين جنيه فقط، لم استمتع بكيفية الشباب مثل عمري وقتها بحياة صاخبة، سريعة الإيقاع. لم أخرج إلى الدنيا فعلاً بل أدمنت على العمل حتى وضعني رئيسي في شركة السياحة التي كنت أعمل فيها في قائمة الموظف المثالي، مقتصدًا، شغوفًا بالعمل، ملتزمًا بقواعده، أؤدي عملي كل يوم دون أن يصدر مني أي تذمر أو شكوى من ضغوط العمل. كنت من المنزل إلى المكتب ومن المكتب إلى المنزل، حتى اعتدت على الأمر مع مرور الوقت لتصبح حياتي روتينية إلى أقصى الحدود.

حاول مرة أحد الزملاء في شركة السياحة أن يدعوني إلى السينما في أحد المراكز التجارية الكبيرة ولكنني رفضت ولم أسمح لنفسي بأي شكل من أشكال الترفيه.

أما فيما يخص ليña فلم أكن قد توصلت إلى قرار نهائي يفيد بأنني قد قبلت صداقتها، في الواقع كنت قد اعتزلت فكرة أن يكون لي صديقات مثل أغلب الشباب. قد يتساءل البعض عن السبب، الإجابة ببساطة هو أنني اقتنرت إلى الشجاعة.

عدت مجددًا إلى صفحتي في الفيس بوك وتفايئت أن أحدهم قد قام

بإرسال طلب صداقة إليّ، وهو ما لم يحدث منذ زمن بعيد. أثارني الفضول، تلك الإشارة الحمراء، لوهلة اعتقدت بأنها إنذاراً لعدم قبول هذا الشخص أياً كان، ولوهلة أخرى شعرت بالرغبة في الخروج من هذا السجن الذي أعيش فيه. فتحت طلب الصداقة؛ وكانت ليينا شريف.

ترى كيف استطاعت أن تعثر عليّ وسط ملايين الحسابات الشخصية على الفيس بوك؟

قبلت إضافتها ومن خلال نظرتي العامة لصفحتها الشخصية وجدت أنها ليست من نوع الفتيات المغرورات اللاتي إذا ما كتبت إحداهن شيئاً على صفحتها تجد أكثر من ألف إعجاب وأكثر من خمسمائة تعليق ولا ترد هي على أي تعليق وكأن الأمر مسألة إرضاء للغرور.

لا تستطيع القول أنها من مدمني الفيس بوك ولكن لها وجود بشكل أو بآخر، فحتى في العالم الافتراضي كانت تسعى إلى أن يكون لها مجتمعها الخاص. فمثلاً إذا ضغط شخص ما على الإعجاب على أي صورة شخصية لها كانت تشكره باسمه وإن كتب تعليق كانت تستجيب أيضاً وكانت تلقي كلمات كفيّلة بأن ترسم البسمة على وجهك، كانت شخصية متواضعة للغاية بعكس ما كنت أراه من أغلب الفتيات المثيرات للسخرية.

أذكر إنني كنت أعرف فتاة منذ زمن على الفيس بوك وكانت من النوع المتحرر، ذلك النوع الذي يمقت العادات والتقاليد، أتذكر أنها كانت تدعي نفسها إلهام الجميلة، كانت تملك مهبة اللعب بالكائن الذكر

بشكل ممتاز، من ضمن مرات متابعتي لها نشرت صورة لها وهي ترتدي قميصاً مفتوح الصدر بحيث يظهر جزء بسيط من مفاتيحها وكانت في هذه الصورة تبتسم مع غمزة عينها اليمنى، تلك الصورة وقتها حصلت أكثر من خمسة آلاف إعجاب والعديد من التعليقات منها ما هو معجب بها ومنها ما يفيد بإتق الله في نفسك

كانت تسأل وتطلب وتلقى الرد لكن دون أن تستجيب أو يصدر منها أي رد فعل، وكشاب لم أكن أحترم هذا النوع من الفتيات أبداً خاصة من لا ترد على سائل أو مجيب، وكنت أتمنى أن تتعلم أغلب فتيات مصر من فتيات الغرب مثلاً، ولكن في النهاية هي أمنية يصعب تحقيقها فالله لا يغير ما بقوم حتى يغيروا ما بأنفسهم.

حتى أتت ليينا وغيّرت تلك الصورة السلبية في ذهني، دخلت إلى ألبوم صورها على الفيس بوك ولا وجود لصورة واحدة مع أسرتها، الصورة الوحيدة الموجودة هي مع والدتها التي كانت تشبهها إلى حد كبير ولا أثر لوالدها. أما بقية الصور فإما وهي في العمل أو في البيت أو حفلة من الحفلات أو مع بعض الأصدقاء ولنت نظري أنها لم تكن من النوع المتكلف في الملابس برغم أن جمالها الأخاذ يستحق أن ترتدي أغلى وأرقى الملابس وتظهر بها، محتشمة حقاً، على الأقل هذا ما وضح لي من خلال الصور. وقبل أن أخرج من صفحتي الخاصة لأغلق بعدها هاتفي فوجئت برسالة خاصة من ليينا قالت فيها:

(بجد ميرسي قوي على قبول صداقتي ويارب نفضل أصحاب على

طول)

لأرد عليها أنا بدوري: (لا شكر على واجب)

أغلقت هاتفي وقد أسندت رأسي على الوسادة فقد شعرت بثقل رهيب في رأسي أتعبني من كثرة التفكير، وبعد فترة طويلة بعض الشيء من التحديق في سقف غرفتي استسلمت للنوم، ولم يكن نومًا هادئًا على الإطلاق، نسيت في هذه الليلة شكل الأحلام السعيدة كيف تكون.

رأيت نفسي في مكان مجهول مظلم بعض الشيء، لم يكن هناك أثر لأي كائن سواي، أمشي في وسط المجهول، لم أكن جائعًا بقدر ما كنت أشعر بالقلق.

وبطريقة ما اكتشفت أنني كنت أمشي في وسط المقابر، لأجد في نهاية طريقي سرير طبي وضع في حفرة ولكن ليس بشكل كامل، فقد كان السرير معلقًا بين الهواء والأرض، وكان نائمًا على هذا السرير شخص ما لم أميز ملامحه سوى أن هذا الشخص امرأة عارية، محاطة بأشخاص قد التفؤوا حولها وجوههم اتشحت بالسواد حال ملابسهم، كانوا يأكلون من لحمها في نهم شديد، فرعت من المنظر وركضت مسرعًا نحوهم صارخًا لكي يتوقفوا لكن دون جدوى، قاتلتهم بيدي وطرحت عدة أشخاص منهم على الأرض وطرحتني آخرون أرضًا، كنت عندما أنهض أرى من طرحتهم أرضًا ينقبون إلى اثنين وينهضون أيضًا.

انشغلت في قتالهم حتى تكاثروا و قيدوني لأرى أن عدد من يأكلون  
لحم تلك الفتاة قد زاد عدداً، والغريب في الأمر أنها كانت على قيد الحياة  
مستخرقة في النوم ولا تشعر بألم غرس الأسنان في لحمها العاري ولا حتى  
بالدماء التي غطت جسدها بالكامل، حتى مال رأسها نحوي لتتكشف  
ملاحمها أخيراً، كانت لدينا

ووجدت نفسي أصرخ بأعلى صوتي منادياً باسمها حتى تستيقظ ولكن  
دون جدوى.

كنت أنا من استيقظت من هذا الكابوس ولساني يسمى باسم الله، حتى  
في ليلة من المفترض أن تكون هادئة لم تتركني وشأني، و لم تكن عندي أي  
نية في أن أحكي ما رأيته في حلمي المرعب لأي أحد، ولا حتى لأمي،  
مضى وقت طويل لم أرى فيه الكوابيس، شيء ما بداخلي يدفعني إلى عدم  
الاطمئنان.

لم أستطع النوم بعد ذلك، حتى وصلت الساعة إلى الخامسة صباحاً  
وهو الوقت المحدد يومياً لكي استيقظ وأستعد بعدها للذهاب إلى عملي،  
كانت أُمي مازالت نائمة وبالتالي لم أتناول من فطوري المعتاد سوى كوب  
من الشاي الساخن، كنت قد ارتديت بدلتني بالفعل لكنني جلست على  
الأريكة المفضلة لأُمي في الصالون لمدة نصف ساعة محاولاً أن أصفّي ذهني  
وأنسى تلك المشاهد المرعبة التي عشتها في هذا الكابوس اللعين، حتى  
سمعت صوت عجلات سيارة تمر بالقرب من المبنى الذي أسكن فيه، كانت

شفتي تطل على الشارع وبالتالي فإنه من السهل عليك أن تسمع بوضوح كل ما يدور حولك من أحاديث و موسيقى التوكتوك المزعجة بل وحتى أصوات محركات السيارات، خاصة وإن كنت تسكن في الطابق الأول أو الثاني.

فتحت باب البلاكونة لأرى سيارة ليندا الفارحة بانتظاري، كانت سيارة من نوع كيا سيراتو الرياضية لونها أسود، كانت كل دقيقة تطلق كلاكس سيارتها مرة أو مرتين، فقد نسيت أن تأخذ رقم هاتفي ومع ذلك، بدا واضحاً أنها حفظت مكان إقامتي بكل سهولة.

خرجت من باب العمارة ووقفت أمام سيارتها لتجد أنني أنظر إليها وعلامات الاستغراب قد شقت طريقها إلى وجهي، لتقول من وراء نافذتها المفتوحة:

- إيه يا عم كل ده تأخير؟ ساعة على ماتنزل؟ اركب

ركبت بجانبها لننطلق معاً مجدداً على الطريق، لأعيش معها هذه الرحلة الغريبة، وبعد أن خرجنا من منطقة حدائق الأهرام بدأت ليندا في التخلي عن عباراتها الرشيقة في الحديث لتكون بذلك أكثر راحة معي بعيداً عن التكلف لتقول بشكل مندفع:

- إيه رأيك فيا بشكل عام؟

بشئ من الإحراج بدت كل الإجابات متهرية لأتلعثم بدوري وقاطعتني:

- بص أنا هقولك حاجة علشان متأخدش عني فكرة غلط، أنا بنت

عادية جداً ومش معنى إني عايشة لوحدي زي ما قولتلك إمبارح معناه  
إني ماشية في سكة شمال لا سمح الله بالعكس، كل ما هنالك أني حسيت  
إنك ممكن تكون قريباً مني وأنا ممكن أن أثق فيك.

سألته:

— وليه أنا بالذات؟ طيب ماعندك لمياء وفي الأول وفي الآخر هي

بننت زيك

— لمياء صحبتي آه بس مش لدرجة الثقة، لمياء حد بغير معاها جو  
وأحياناً بتيجيلي وبجيلها البيت لكن موصلتش معاها أبداً لدرجة  
الصحوبية بمعناها الحقيقي

لم أعلق على إجابتها وسكت لتسألني هي بنبرة هادئة:

— شادي، إنت حابب نكون أصحاب بجد ولا لأ؟

تذكرت مكالمتي مع إبراهيم إمس وقررت أن أعطي هذه العلاقة فرصة  
أخذاً بنصيحته لأجيبها

— أكيد، أنا هكون سعيد جداً بده

ارتسمت ابتسامة كبيرة على وجهها وقالت:

— بجد إنت مش عارف أسعدتني قد إيه، وتأكد إني كصديقة ليك

هكون شرك وضهرك ومش هتندم أبداً، وبعدين ياسيدي ده إحنا جيران

تعال زورني وأزورك

— أكيد طبعاً ده شئ ينفعني

لم يكن لدي أدنى فكرة عما قولته، ولم أكن متأكدًا من مدى استجابتي لهذه الصداقة التي تجمعنا سوياً، كانت تشعر هي بالاهتمام والإصرار في حين كنت أنا أشعر بالفضول لمعرفة حقيقة هذا الإصرار.

وصلنا أخيراً إلى هيلتون رمسيس استعداداً ليوم عمل طويل ورغم ذلك لم تكف ليلاً عن الحديث معي وهو ما لفت نظر أغلب الموظفين، لم تلق لهم بال ولم تعرهم أي اهتمام، شعرنا سوياً أن العيون تنطق بعلامات الاستفهام ورغم ذلك فقد واجهت الجميع بابتسامتها المعتادة، ابتسامة تشعر وكأنها تواجه العالم الخارجي في تحدٍ واضح وصريح ثم تشعر وكأن الابتسامة تأتي لتتركز عليك لتشعرك بالاطمئنان وليس بالإحراج، كانت تراك كما ترى نفسك تماماً كالمرآة،

عند هذه اللحظة بالظبط أدركت أنها في حاجة إلى شخص ما برغم أنها تقضي أغلب الأوقات مع زملائها في العمل.

شعرت بشئ من الفتور من قبل طه و لمياء بمجرد وقوفي بجانبهم خلف الريسبشن و تشغيلي لجهاز الكمبيوتر لأرى الحجوزات و أساعد النزلاء الجدد والحاليين إن تطلب الأمر.

أحياناً تشعر بالطاقة السلبية تحيط بك من مشاعر الآخرين حولك، لثرب في الصراخ قائلاً: اتركوني وشأني.

قرأت ذات مرة أن السلبية ترتدي أحياناً قناعاً تنكرياً يدعى "الواقع" .. من السهل أن تبرر بأنك "شخص واقعي فحسب" عندما لا



تجرؤ على العمل لتحقيق حلم ما أو الإيمان به

قد تفترض أن الأشخاص الإيجابيين ليسوا واقعيين، أنهم سذج بسيطاء، أنهم ينكرون الواقع ويدفنون رؤوسهم في الرمل، أنهم يظهرون الابتسامات المزيفة عندما يواجهون الصعوبات وغير ذلك لكن، هل هم حقًا مغفلون سعداء أم أن هناك شيئًا وراء إيجابيتهم؟

منذ متى صارت "الواقعية" تعني حتمية أن الأمور ستصبح خاطئة وسيئة وأن عليك القبول بأن ذلك هو الحقيقة؟ إن ذلك لا يعني بأن "كونك واقعيًا" هو أن تكون سلبيًا تلقائيًا

عندما ترى العالم من وجهة نظر واقعية فلن تقدر إلا أن تكون سلبيًا إذا كانت نسختك من الواقع سلبية.

لذا لم أملك سوى أن أتقبل ذلك الواقع السلبي مبدئيًا على أن أسعى لتغييره مع مرور الوقت، وحاولت بطرق عدة أن أوصل لهما أنني لا أمثل أي خطر على المستوى المهني كما أنهما يمثلان الأقدمية في العمل لذا لا داعي لتلك المشاعر السلبية.

مضى وقت طويل وأنا أعمل، بمفردي مع زملائي الغامضين الجدد، لينا لم تكن معي ولم أدري إلى أين ذهبت منذ أن دخلنا إلى الفندق معًا في الصباح الباكر، كان انشغالي مع النزلاء قد عزلني كليًا عن لينا بحيث لم أدرك وجودها من اختنائها، وفي لحظة وجدت الهاتف بجانبني يصدر رناته لكي يستجيب له أحد، وبما أنني كنت بجانبه فكنت أنا الدخيل.

- ألو

- تعال المكتب عندي يا شادي فوراً

- حاضر يا أستاذ حسن

كأي موظف حين يسمع نداء رئيسه في العمل لم يكن مني سوى أن  
أهرول له بخطوات سريعة حيث كان مكتبه بجانب الريسبشن، وكنت  
أشعر بنظرات طه وليماء وكأنها تكاد تحرقني من شدة الغيظ والحقد، على  
الأقل لم أفهم تلك المشاعر إلا فيما بعد.

و بقدر ما كان يشغل بالي عن ما يريده المدير مني بعد أن تم قبولي في  
العمل بقدر ما كنت أشعر بانتباض قلبي حينما أفكر كثيراً بمستقبلي في  
هذا الفندق.

دخلت الى مكتب الأستاذ حسن ولينا كانت حاضرة معه، كنت كما  
يقال بلغة أهالينا البسطاء ( بضرب أخماس في أسداس ) وبالنظر إلى  
ملامح وجه السيد المدير استنتجت أنه لا توجد أي مشكلة وأن الأمور على  
ما يرام.

وبحسب ما أذكره عن الأستاذ حسن، كان دوماً في كامل هندامه،  
يعتني كثيراً بنفسه ويمتلك ذوقاً رفيعاً في اختيار ملابسه، في ذلك الوقت  
كانت تبدو بدلته السوداء المصممة بدقة عالية و قميصه ورابطة عنقه  
مرتفعة الثمن وعلى الأرجح تأتي هذه الحلة من إحدى الماركات العالمية  
المشهورة، يرتدي دائماً ساعة أنيقة لا تفارق مرفقه الأيسر وخاتم زواج

يفارق إصبعه الثالث من يده اليسرى.

كان في الخمسين من عمره، و ملامح وجهه توحى بالذكاء والأخلاق الحسنة، ويتميز بقوة الشخصية والإرادة، وبشكل عام هو ذلك الشخص الذي إذا ملكت مفاتيح شخصيته فسيسهل عليك التعامل معه.

- تعالى يا شادي اتفضل اقعد

جلست وأنا أهدق في لينا لعلي أفهم سبب هذا الاستدعاء الأول لي في الوظيفة لكن كعادتها لم تعطيني منها سوى ابتسامتها.

- الأستاذة لينا بتشكر فيك جدًا وبصراحة كده كلامها عندي

ثقة، قلبي إنت إيه رأيك في الشغل؟

مجيئاً عليه:

- الشغل في قمة المتعة يا فندم وربنا يقدرني وأكون عند حسن

ظنكم دايماً.

تدخلت لينا قبل أن يعلق الأستاذ حسن بكلمة وقالت:

- الحقيقة ياريس شادي ماخدش في إيدي وقت، ما شاء الله

إمبارح كان اليوم الأول ليه معانا وبرغم كده حفظ كل حاجة في شغلانتنا

على طول وأنا شايفه إنه يجي منه، وحضرتك عارف نظرتي متخييش

أبدًا.

يعلق الأستاذ حسن بنبرة إعجاب:

- ممتاز ممتاز، ده إنت طلعت هايل ياعم أهو

- ربنا يخليك يا فندم أنا لسه معمليتش حاجة

قاطمني قائلًا:

- أهم حاجة عندي التعامل مع النزلاء في الفندق إنت خلاص

بقيت معانا وده يخليك وجهة للفندق الي سائح سواء كان أجنبي أو عربي  
أول ما يدخل يشوفك، فخليك مبتسم وهادي واعمل إللي عليك دايمًا

- اطمئن يا فندم إن شاء الله هكون عند حسن ظنك.

مبتسمًا وبعينين تحدقان في بشكل مباشر قال:

- وأنا متأكد من ده، تقدر تروح تشوف شغلك ولو احتجت لأي

حاجة مكتبي مفتوح ولينا دايمًا بتنوب عني يعني أنا وهي واحد.

- أكيد، شكرًا يا فندم عن إذنكم.

خرجت من المكتب ومعنوياتي مرتفعة وبقدر سعادتي بنتيجة هذا  
الاجتماع الصغير بقدر ما كان الفضول يقتلني لمعرفة ما دار بين لينا  
والأستاذ حسن عني، وبرغم ذلك لم يمنعني هذا التساؤل عن مقدار  
سعادتي بما حدث.

عدت إلى مكاني بجانب طه ولياء ولا زالا يرمقاني بتلك النظرات و  
بما أن معنوياتي قد ارتفعت وجذت نفسي قادرًا على العمل بقوة أكثر من  
السابق، فعلا صدق من قال كلمة ترفعك إلى سابع سما وكلمة تخسف ببك  
الأرض.

أمضيت ساعتين على هذا الحال أعدت بسلا توقفت، حتى جاء أحد

النزلاء وتوجه إلى لمياء مباشرة، كان كويتي الجنسية، لا أتذكر اسمه  
تحديدًا لكن عصبيته وطريقته في التعامل لم تُمحي من ذاكرتي.

وبلهجته قال بصوت عالي:

- إنتي هالاي، ساعتين وأنا أنتظر سيارة بسواج.. أنا من متى  
مكلمج من غرفتي وخبرتك بسالفة السيارة؟

كانت تلك اللهجة وهذه الطريقة في التحدث جعلت لمياء في موقف  
حرج، فحتى عندما أرادت أن تجيب على الرجل تلعثمت لتصبح الكلمات  
لا تجد لها سيلا

- يا فندم مافيش داعي حضرتك للصوت العالي انا.....

قاطعها:

- إنتي إتشب ولا كلمة، يلا عاد يلا روجي ناديلي المدير يلا

تصرف طه وكأنه من بنها كما تقول في لهجتنا العامية واتخذ دور  
المشاهد متظاهرًا أنه يؤدي عمله، وبما أن الصوت كان عاليًا جدًا وبدأ في  
الاستحواذ على انتباه الجميع، ما كان مني سوى أن أتدخل لتهدئة  
الموقف، خرجت من موقعي في الريسبشن ووقفت بجانبه محاولا  
تهدئته.

- أنا أقدر أساعدك يافتدم، إهدي بعد إنك وأمرني أنا تحت

أمرك

- ياخي تفهم إنت ولا ما تفهم؟ أنا أبغي سيارة بسواجها الحين،

تكفون مستعجیل وراي ميماد الله بهاديكم خلصوني.

حاضر يافندم، أنا معاك وتحت أمرك وأنا إल्ली هركبك السيارة

وبنفسی

بدأت نبرة الرجل وانفعالاته في الهدوء شيئاً فشيئاً بمجرد أن قمت بعمل اتصال لأحد الأشخاص ويدعى عادل وهو المفترض أنه المسؤول عن حركة السيارات في الفندق وأوصيته بسرعة تواجد سيارة أمام الفندق، وفعلاً، لم تمض ربع ساعة حتى جاءت السيارة من نوع تويوتا كورولا سوداء موديل السنة ولا أدري بالضبط ما هو الخلل الذي حدث وما سبب التأخير على الرجل، أوفيت بوعدى مع ذلك النزيل الكويتي وفتحت له باب السيارة بنفسى ولم أدخل إلى الفندق حتى خرج من البوابة الخارجية وانطلق في وجهته المجهولة.

حمدت الله أن الموقف لم يستدع حضور الأستاذ حسن و حمدت الله أيضاً أن ما حدث قد انتهى وذهب أدراج الرياح، وقلنت في نفسى إن ماحدث وبتدخلي هذا ربما يكون علامة لحسن النية تجاه طه ولياء فأنا زميل جديد لهم ومن واجب الزملاء أن يقفوا في مواقف بعضهم البعض مهما بلغت درجة الصعوبة، هكذا أقنعت نفسى فعلاً، وللأسف الشديد.

انتهى عملي لهذا اليوم وهممت بالخروج من الفندق بعد أن أُلقيت السلام على زملائي وعلى إبراهيم، وفيما كنت أنتظر خارجاً عند البوابة الخارجية للفندق، وقع على إسامعى صوت خطوات سريعة تحديداً صوت

هذاء نساىى ذى كمب عالى؁ اعتقدت أنها لىنا لكن حىنما التفت وراثى؁

فوجئت بلمىاء تصرخ بى بأعلى صوت :

- إنت مىن سمحك تعمل كده؟

مستغرباً :

- أنا؟

- إنت مفكر نفسك إىه بالضبط؟

هنا وجدت نفسى كما كانت هى أمام النزل الكوىثى هربت الكلمات  
منى ولم تجد لىا سبىلا لإنقاذى؁ وقفت مشدوهاً أمامها؁ كانت كالبركان  
الذى وجد الفرصة المناسبة للانفجار لأكون أنا أول ضحاىا الاحتراق  
بلهىبه

محاولا التحدث معها :

- طب أنا ممكن أفهم بس إىه الموضوع؟

قاطعتنى بحدة وقد عقدت ذراعىها على صدرها :

- هو إنت مفكر نفسك إىه؟ ولا تحب أسىب شغلى علشان تشتغل

إنت؟ بقولك إىه؁ إن كنت مفكر إن بالحركات القرعة دى هتعجب المىدر  
وتبرسط علشان توصل للى إنت عاىزه تبقى غلطان؁ وأوعى تفكر إن كون  
لىنا معاك وبقيتو أصحاب ومش عارفة إىه تبقى أمان؁ لا ياشاطر فوق فى  
ناس أقدم منك و أكفى منك بكثير؁ وحذرك إىاك ثم إىاك تتجاوز  
حدودك معاىا وإلا ودىنى ما هتشوف منى كوىس.

في هذه اللحظة خرج إبراهيم مسرعاً تجاهنا قائلاً :

- إيه إيه يا جماعه في إيه؟ مالكم؟ صوتكم جايب لآخر الشارع و  
الدنيا جوى سامعكم في إيه؟  
بحدة ردت عليه :

- مافيش يا إبراهيم، أصل بعيد عنك كده في ناس من وقت للتاني  
عايزة تتربى.

بادلتنى بعدها بنظرة حادة جابت من فوقى لتحتي ورحلت، يتتبعها  
إبراهيم بنظراته حتى اختفت تماماً داخل الفندق وسألني :

- هو في إيه؟ إيه إلهي حصل بينك وبينها؟ مالها عامله كده زي  
التور الهايج

سكت للحظة وأشحت بنظري إلى الشارع و أجبته :

- لو ليئا خرجت قولها شادي روح، أنا هركب أي مواصلة  
وخلص، سلام

غريبة هي أمر المشاعر كيف تقاثلنا حتى نقتل وإن قتلناها صرنا  
أمواتاً، لتجف بنا ويبقى الظلال طريقاً دون الهدى، حتى وإن ضاعت بنا  
تلك المشاعر نجد أنفسنا نبتساق وراءها كما الأتعام، فنجهل خطانا ونتخذ  
من العبث مسكناً.

جعلتني تلك الكلمات أكره سجن هذا العالم وكرهت أيضاً أن أكون بين  
سكانه، فلا الكلمات أهون، ولا النظرات أرحم، واكتفيت بعدها أن في



هذا العالم قسمين الأول هو أنت تتجرد من الضمير وتدنس على الخلق  
حتى تعلو والآخر ان يداس عليك وتعامل كما العبيد، وهنا لا مكان للعمل  
الطيب ولا جزاء للإحسان سوى الكره.

- إيه يا بطل؟ حاسس بإيه دلوقتي؟

سأل الدكتور مصطفى مبتسمًا وقد وضع يده على كتف شادي و أردف بهدوء

- شايف إنك بطلت كتابة، إيه إللي جواك ومش قادر تظهره؟

ارتبك شادي قليلًا وحاول أن يجمع شتات نفسه المكسورة وقال:

- مش عارف يا دكتور بس حاسس بحاجات كتيرة قوي متلخبطة جوايا

- حاجات زي إيه؟

- إني رجعت للماضي من تاني. وإني حاسس بعجز ومش قادر أغيره للأسف

- إحنا لا نقدر نغير الماضي ولا حتى نحدد المستقبل شكله إزاي،

ده كله في يد الله عز وجل، لكن كيل إللي نقدر نعمله إننا نغير تأثير الماضي فينا مهما كان سيئًا وحتى لو كان مليون ألم وتعيب، أيًا كان الماضي ده، المهم منكنش أسرى الماضي ده، يا كده ياما نموت بحسرة شئ مش في إدينا أصلا.

صمت الدكتور مصطفى وجلس قبالة شادي واستكمل قائلًا

- أنا جتلي فكرة أفضل

— ...؟؟

— أنا عارف إنك مستغرب، باين في عنيك، الماضي إللي إنت كنت

عائش فيه ده أنا هعيشه معاك

رد شادي مستنكرًا:

— إزاي يعني؟

— مبدئيًا ممكن تديني الورق إللي كتبتة؟

باده شادي بنظرات الاستغراب ولم يملك سوى أن يستجيب لمعالجه

النفسى ومن جانب الدكتور مصطفى فلم يعط لمريضه الفرصة ليعلق حتى بكلمة ليقول هو:

— باختصار شديد انا هقرأ إللي كتبتة وبعد كده أنا إللي هقوم

بدور الكتابة عنك، كل إللي عليك إنك تتكلم وتطلع إللي جواك

طاوعه شادي لا إراديًا وأعطاه الأوراق بالفعل وشاهده وهو يقرأ بتمعن

شديد وبدقة متناهية وكأنه يحاول أن يتلبس شخصية شادي نفسه ليشعر

بدوره بمشاعره الشخصية وما مر به

وفيما كان الدكتور مصطفى منشغلا بقراءة ما كتبه مريضه وجد شادي

أن الفرصة تبدو مناسبة للـمـشـات أفكاره، نصف ساعة فقط كانت كافية

للدكتور مصطفى، كانت كافية لاكتشاف أول خيوط المشكلة والمعاناة،

وبعد أن انتهى من القراءة قال:

— على ما يبدو لي أن لينا كانت متعلقة بـيك أكثر مما كنت إنت

متعلق بينها لدرجة أنها كانت قريبة جداً

سكت شادي لبرهة من الوقت وأجاب:

— يعني مش بالضبط، مش زي ما أنت متخيل.

نهض الدكتور مصطفى من مكانه ليأتي بحزمة كبيرة من الأوراق

البيضاء المسطرة وقلم ليجلس قبالة شادي مجدداً

— تمام، أنا مش عايزاك تشغل بالك بأي حاجة تانية خليك معايا

أنا ويس، ماورناش حاجة، إن شاء الله نقعد لتاني يوم الفجر مافيش

مشكلة.. أنا معاك لحظة بلحظة، قلبي، إيه إللي حصل بعد حكاية لمياء

معاك.

عدت إلى منزلي ولم أنطق بحرف واحد مع أمي، كان مزاجي معكراً

للغاية، وكانت حينما تسألني أمي عن حالي لا ينطق لساني سوى

— الحمد لله يا ماما كله تمام

كان اللسان ينطق بعكس ما في القلب ووجهي كما المرأة كشف لأمي أن

هناك شيئاً ما غير طبيعي لكنها لم ترغب في أن تضايقني بأسلتها خاصة

وأن علامات الإرهاق كانت واضحة علي، دخلت إلى غرفتي كالعادة،

ملاذي الوحيد في هذه الدنيا، وإن كانت الجدران لها القدرة على النطق

فستكون خير شاهد على أحزاني وأفراحي، كانت الجدران أفضل صديق

لي، ولم يكن في غرفتي تفاصيل كثيرة مجرد مكتب متواضع للغاية

وكرسی وضع عليه لابتوب وأباجورة صغيرة ذات إضاءة خافتة مريحة

للعين وسرير كان قد انتصف الغرفة وشباك كنت أفتحه من وقت لآخر  
إذا ما احتجت لتغيير هواء الغرفة أو إذا ما قررت الجدران أن تطبق على  
روحي فأختنق، أما خزانة ملابسي فحتى تلك كانت متواضعة أيضاً،  
ولكن ليست تلك التفاصيل بالأمر الهام فقد كنت متواضعة حتى في حياتي  
الشخصية ولم أكن مهتمة بمظاهر الترف في الحياة.

ألقيت بنفسي على سريري لعلي أنسى ما حدث من ذلك النزاع وذاك  
اليوم الطويل كان هناك شئ واحد فقط يقاوم مغالبة النوم لي  
صوت رنات هاتفي كان غير منقطع النظير، عدة اتصالات مستمرة  
كانت كلها من لينا، عشر مرات بالتمام والكمال اختتمتها برسالة نصية  
قالت فيها:

- في إيه مالك؟ رد عليا بليز

أيقنت حينها أنها قد علمت بما حدث ودار بيني وبين لينا ولم أرد  
عليها، ليس لأنني اتخذت ضد لينا موقفاً شخصياً من نوع ما، بل لأنني لم  
أجد الكلمات المناسبة لمواجهةها بها، ولكي أهرب من هذا الموقف جعلت  
هاتفي صامتاً بحيث لا اسمعه مطلقاً وانعزل عن العالم ومضى وقت على  
هذا الحال حتى حدث ما لا كنت أتوقعه، دخلت أمي الغرفة لتجدني  
جثة هامدة على فراشي، كنت قد أغمضت عيني على أمل النعاس ولكن  
دون جدوى، جلست أمي على الفراش وقالت:

- شادي، شادي إنت ناسح يا حبيبي؟ قوم إصحى

فتحت عيني ونظرت إليها قائلاً:

- لا يا حبيبتي مش نايم أنا بس قلت أغمض عينا شويه يمكن  
أنام

- طب قوم فوق كده وألبس هدومك علشان في ضيفة مستنياك برة  
في الصالون

- انتفضت من سريري وقلت:

- ضيفة؟ مين الضيفة دي وجات إمتة؟

- لينا زميلتك في الشغل

شئ غريب، لم أستغرق في النوم أبداً وكنت واعياً كيف لم أسمع صوت  
جرس شقتي، ربما قد غافلني النوم للحظات، لقد أمضت ساعات محاولة  
الاتصال بي دون أن أبدي أنا أي استجابته والآن لم تجد لها سبيلاً سوى أن  
تأتي إلى بيتي وتزورني للمرة الأولى.

خرجت أمي إليها لتقوم معها بواجب الضيافة وبقيت أنا أجد لنفسي  
إجابات لأسئلة يمكن أن تكون متوقعة، غيرت ملابس، أخذت نفساً  
عميقاً، ثم خرجت من غرفتي متجهاً نحو الصالون وفيما كنت متجهاً  
نحوها لأصافحها نظرت إلي نظرة لوم وقالت:

- ينفع كده يعني؟

احمر وجهي وقلت لها:

- أهلاً وسهلاً نورتي، اتفضل

جاءت أمي حاملة صينية بها فنجان قهوة وكوب ماء ووضعتها على طاولة أمام ليلى وبما أنها سيدة تبلغ من العمر خمسة وخمسين عاماً استأذنت لكي تذهب وترتاح قليلاً فلم تكن من النوع الذي يسهر كثيراً، وبذلك انفردت بي

- أنت إليه إلهي عملته ده إنهرده؟

- أنا معملتش حاجة ليها أنا لقيت النزيل الكويتي عنده مشكلة وتدخلت لجلها بس هي..

قاطعتني:

- أنا مش بتكلم عن لمياء، أنا عرفت الموضوع كله من إبراهيم لما خرجت وملقتكش، عارفة إن لمياء كانت دبش ومدب في كلامها معاك ويمكن تكون جرحتك كمان بس ده مش مبرر إنك تسبني وتمشي ومتردش على اتصالاتي، هو إحنا مش أصحاب خلاص؟ مضايق تعالى إيجيلي لكن متسبنيش أرجع لوحدي واحنا بقينا بنروح ونيجي مع بعض الشغل.. وإن كان على لمياء فليك عليا إني أمسحلك بيها الأرض ولا تضايق نفسك

- لا مافيش داعي، كده كده هي وطه منفسين جداً أي تدخل

منك هيزيد الطين بله والموضوع مش ناقص شعله أصلاً

- أنت متشغلبش بالك أنا إلهي هتصرف

نزلت إليها ولم أعلق أبداً فيما كانت هي تبصر بعينيها في تفاصيل

بيتي وزواياها، قالت:

- بيتك حلو قوي very simple و شيك جداً آخر حاجة

صمتت قليلا وأردفت:

- بقولك إيه ما تيجي نخرج شوية؟

- ...؟؟؟؟

- جاي على بالي نتمشى شوية على كورنيش النيل والجو إنهرده

تحفة، إيه رأيك؟

قلت متردداً:

- أيوه بس إنتي عارفه إنهرده كان يوم طويل وبكرة شغل

وينصحى من بدري و....

أشارت لي بكف يدها في إشارة لكي أتوقف عن الكلام وقالت:

- يا سيدي أنا وإنت بكرة أجازة وأهو بالمره تنسى شوية من إللي

حصل إنهرده

- أجازة؟ هو أنا لحقت؟ ده أنا مبقاليش يومين ليا عندكم في

الفندق ده حتى الأستاذ حسن ياخذ مني موقف سلبي يقول إيه بس؟

- ملكش دعوه بالأستاذ حسن أنا مسئولة عنك وفي نفس الوقت

بنوب عنه في حاجات كتيرة غير كده هو مديني صلاحيات يعني أنا وهو

واحد مافيش فرق فإشطة يعني وبعدين إظمن كده ولأ كده بيني وبينه

تيلنونات راحه جايه وهيلغه ومش هيبشأرض متقلقش



جعلتني كلماتها الوثيقة تلك أشعر بالطمأنينة تجاه وضعي في وظيفتي الجديدة، حدثت نفسي وقلت، لما الخوف؟ ولم لا أستغل تلك الثقة الغالية في على الأقل لأكون عند حسن الظن وتحديداً حسن ظن تلك الفتاة التي دخلت حياتي، في أي مكان عمل آخر أن توظف أي شخص هذا إن توظف في الأساس لن يسمح له بالإجازات إلا في أضيق الحدود.

كنت أرى لنا دائماً كفتاة فريدة من نوعها، قبل معرفتها كنت كمن يعيش في وحدة الكهف المظلم، وحيداً تماماً ومنعزلاً عن البشر، الآن أشعر معها بشئ مختلف ليصبح إدراكي للزمن في حد ذاته قد انعدم خاصة عندما أكون معها، فسرغان ما وصلنا إلى كورنيش النيل وقد انتصفت الساعة الثامنة ليلاً، كيف يمكن لي أن أنسى تلك الليلة، لم يكن كورنيش النيل يخلو من رواده أبداً، منهم من هو على باب الله، والعاشقين، ومنهم من هو عائد من عمله متأخراً يحمل إرهاقاً على وجهه، و شباب يستمعون إلى آخر صيحات الأغاني الشعبية و يتراقصون على أنغامها، وكان القمر قد تمركز مكتملاً فوق النيل كان وجهه كامل الاستدارة نيراً، يثير بياضه هالة عطرة تشبه تلك التي تحيط باللائكة، ونسمات الهواء اللطيفة لا تكف عن مداعبة رواد النيل.

كنا نمشي على الكورنيش حتى قررت لنا أن نركب إحدى المراكب النيلية، وهنا تعرفت إلى عم مؤمن رجل يبلغ من العمر خمس وأربعين عاماً يعمل على أحد مراكب النيل، يرتدي جلباباً رمادي اللون وعمه

بيضاء، تبدو على لكنته أنه من صعيد قنا، و كغيره من المراكب النيلية  
ينتظر الزبائن والرواد لكي يكتمل به العدد وينطلق في رحلته.

- يا أهلا وسهلا يا أهلا وسهلا بالأستاذة

استقبلنا عم مؤمن بترحاب كبير بمجرد أن وطئت أقدامنا مركبه

- فين الغيبة الطويلة دي يا أستاذة؟

- أهو مشاغل يا عم مؤمن إنت عارف حال الدنيا، آه أعرفك

الأستاذ شادي

- أهلا يا بيه معلش متأخذنيش نور الأنسة لينا ملى المكان كله

ابتسمت له ولم أعلق سوى برد اعتاد عليه لساني دائماً، ولا يهتمك

قالت لينا:

- إطلع بينا ياعم مؤمن

- هاااا، أطلع؟ يا أستاذة إنتي عارفة أنا لسه مسترزقتش

- عم مؤمن، هاااااااا إطلع وأنا هرضيك

رد عم مؤمن باقتناع على مضد:

- إذا كان كده ماشي

- وبالمناسبة يا عم مؤمن مش عايزة أسمع صوت الأغاني بتاعتكم

دي، أنا محتاجة شوية هدوء

- من عندي يا ست الكل

وبسرعة دار محرك المركب النيللي لنجد أنفسنا في زجاب النيل،  
كانت لنا في بادئ الأمر تحقق في القمر المكتمل لدرجة جعلت مقلتي  
عينها تتألأن كحجر الماس، ومع هذه الأجواء التي تبعث على النفس  
بالطمأنينة والراحة الداخلية وجدت نفسي كحال لنا عيناى تتجهان إلى  
القمر، شعرت في لحظة ما بعم مؤمن وهو يقول في نفسه، هما اتخرسوا  
ولا إيه؟ لكننى لم أحفل به كثيراً فقد مضى على وقت طويل جداً لم أقض  
هكذا وقت.

خرجت عن صمتها أخيراً لتفتح مجالاً للحوار:

- إيه رأيك في الجو؟
- بقالى زمان مقضتش وقت في كورنيش النيل، حتى كنت بقول  
لنفسى قد إيه الجو ده وحشني
- فعلاً؟ آخر مره كانت إمته؟
- من سنه فانت
- كنت لوحذك؟
- لا
- طيب إيه؟
- مع خطيبتي
- خطيبتك؟ إنت مجبش سيرة إنك كنت خاطب قبل كده
- لا مهو أنا فركشت، أو بمعنى أصح، هي إللي فركشت مش أنا

- لا ده إنت حكايتهك حكاية

اعتدلت في جلستها

- ممكن تحكي لي؟

نظرت إليها ولم أفكر بل قررت أن أبوح لها ولو بجزء بسيط من  
ماضي الخاص:

- كانت زميلتي في الكلية، طول سنين الجامعة كنت مخبي  
مشاعري تجاهها جوايا، إتخرجنا وفضلت سنين مشوفهاش، وكحال  
أغلب الشباب هموز إيه غير بنت محترمة بنت عيلة محجبة تعرف  
ربنا، مرت أيام وسنين لحد إمتلك الشجاعة وقلت لازم أرجع أكلمها  
تاني لحد ملاقي الفرصة المناسبة وأقولها إنني بحبها، وفعلا حصل، كنت  
بكلمها إما في التليفون أو الواتس اب، أبويا الله يرحمه لما عرف قال خير  
البر عاجله ومكدبش خبر وروحنا لهم البيت بس لاجل الحظ جدها كان  
توفى يقاله أسبوع

- يااااه ده حظ منيل قوي

- هو فعلا حظ منيل، والها كان راجل عملي إلى حد ما، توصلنا  
معاه إننا نقري فاتحة والدبل والشبكة وكتب الكتاب يبقى على العيد رغم  
إننا كنا عابزين نلبس دبل ونخليها عائلية وكتب الكتاب والدخلة يبقى  
على العيد لكنه رفض

- وبعدين؟

- كان عنده شرط، إنني مجيلهموش البيت أبداً بحجة خوفه من إن حد يعرف في عيلتهم لحد ما يمهّدوا الموضوع بطريقتهم و الست شهور يعدو ويحي معاد الفرح، كان مسموحلي بس إنني أكلّمها في التليفون أو أبعثلها رسائل على الواتس اب.

- ده إنتو كنتو معاد بقى

- حاولت إنني أقرب المسافات على قد ما قدر وكنت دائماً بقولها نصبر وما فيش أقرب من الأيام، وما فيش في الدنيا حاجة غير نلتزم بكلام والدها، آخر مرة شوفتها فيها كانت هنا في كورنيش النيل، المرة اليتيمة ومتكررتش تاني، فضلنا على الحال ده ثلاث شهور بالضبط لحد ما لحظت إنها إتغيرت من نحيتي، متردش عليا، وكلامها فيه تحفز، لحد ما في يوم إتفاجئت بوالدها بيكلم والدي الله يرحمه وبيقوله البنت مش مرتاحة مع ابنك وإن البنت بحكم إنها بتاخذ دروس دين الشيخ قالها إن إللي بتعمله ده حرام

- يا سلالام؟ إيه إللي حرمة؟

- كلامنا في التليفون والواتس، والأصعب من كده إنها مبقنتش حاسة نفسها معايا، أبويا لما قالي الحوار كله، كل إللي عملته كتبتلها كلمة واحدة بس على الواتس

- إيه هي؟

- بالتوفيق، تعرفي يا ليتنا، عمرها مقاتلي بحبك، رغم إنني كنت

دائماً بصارحها بمشاعري.

- يااااااه، معقولة؟

- .....

وضعت راحة يدها على يدي وقالت معذرة:

- أنا آسفة إنني فتحتك في موضوع زي ده مكنتش أقصد إنني أفتح

جرح قديم

احمر وجهي بسبب لمسة يدها الناعمة:

- لا لا لا ولا يهمك، أنا نسيت الموضوع ده فعلا

قالت لي في سبيل الداعبة والمزاح:

- طيب إيه رأيك في لبناء؟ ماتخدها تتجوزها

ضحكت وقلت:

- وهو أنا ناقص مجانيين

ضحكت، وكانت ضحكتها من القلب لا تنسى، صوتها كان لا ينسى

أبدًا.. أسمع صوتها العذب حتى الآن ولا يفارق مسامعي أبدًا، في تلك

الليلة كان كل شيء يعبر عن صفاء قلبها وتفاؤه.

سألتها:

- وإنتي يا لبناء، مرتبطيش قبل كده؟

- لحد دلوقتي ملقتش الإنسان المناسب إتقدملي كتير لكن ملقتش

نفسي مع أي حد خالص.

فتحت حقيبتها لتأخذ علبة السجائر، بدا ليًا وقتها، إنها إذا اشعلت تلك السجارة فلن تنفث دخانها من رئتيها بل ما هو أكثر من ذلك في داخلها، أزدفت:

- وعلى كل حال أنا الموضوع ده مش في دماغي، مش مدياله أي اهتمام، تقدر تقول سايبها على ربنا، يجي وقت ما يجي. استغربت من ردها وقلت:

- غريبة، أول مرة أسمع بنت تقول الكلام ده

- ليه يعني؟

- يعني إللي أقصده إن أي بنت زيك ما بتصدق تتجوز علشان يبقى ليها حياتها الخاصة واستقلاليتها

ردت عليّ ببعد أن نفثت الدخان الأخير من سيجارتها لتطفئها وقالت:

- وأنا ليا حياتي الخاصة حتى وأنا عايشة لوحدي، عادي يعني

هنا تذكرت حوار إبراهيم معي حينما قال:

( أمها متوفية وأبوها داير على حل شعره )

وترددت في أن أسألها عن وضعها هذا خوفاً من رد فعلها، لكن قلت

لنفسي لما لا؟:

- لينا

- نعم يا شادي

- هو أنا ممكن أسألك سؤال بس متفهمنيش غلط أو تضايقي مني؟

- أكيد طبعا بلعكس، إيه إللي هيضايقي منك اتفضل اسأل

براحتك

- هو إنتي ليه عايشه لوحده؟ ملكيش قرايب مثلا؟ وفين

والدك مش عايش معاكي ليه؟

ارتبكت لينا قليلا قبل أن تجيب:

- ده موضوع مش حابه أتكلم فيه دلوقتي لأنه يطول شرحه

وملوش لازمه دلوقتي بعدين، بعدين هقولك

لم تكن تلك الإجابة مريحة بالنسبة لي وشعرت من ارتباكها هذا أنها تخفي شيئاً بخصوص والدها، ومن خلال معرفتي بها خلال الأيام الماضية استطعت أن أفهمهما الى حد ما بالقدر الكافي الذي يجعلني أدرك متى تكون صادقة ومتى تكون عكس ذلك، شيئاً ما غريب يدور حول قصة والدها، وكهذا رد فعل فهي تحمل في قلبها مشاعر سلبية، قررت أن أجعل الأيام هي من تقرر لأكتشف هذه القصة، فهي أرادت مني أن أصادقها لسبب، ولم أضغط عليها واكتفيت بأن ابتسم وقلت:

- وعد؟

ردت علي بابتسامتها المعهودة:

- وعد

انتهت جولتنا في نهر النيل، وسرعان ما ذهبنا إلى بيوتنا، وعند باب



العمارة طمأننتني قائلة :

- متقلقتش هكلم أستاذ حسن أول مروح البيت علشان أجازتنا  
بكره، أنا أصلاً ناوية أربي ليااء وطه وهيشيلو شغل اليوم كله بكره  
ومتزعش حقلك علياً وعندي أنا هجبهولك تصبح على خير.

غريب أمر هذه الفتاة، لولا أنني أعرفها الآن لقلت إنها من فتيات  
السوء.. أخلاقها تقول إن أهلها أحسنوا تربيتهما بغض النظر عن موضوع  
أبيها الفامض هذا، هناك شئ ما مشترك وهو الوحدة، ترغب أن تنتشل  
نفسها منه وتنتشلني أيضاً معها، قلبها نقي وتأكدت بالبرهان أنها كما  
قيل لي دي بنت جدعة وبميت راجل، وسألت نفسي سؤالاً، بعد أن  
حلمت بهذا الكابوس المزعج الذي يخص لينا.. ما الذي يخفيه القدر لي  
معه؟

(4)

استيقظت باكراً كما اعتدت في الأيام السابقة، برغم أن اليوم هو أجازة  
كما وعدت ليلاً إلا أنني لم أستطع النوم مجدداً، نظرت إلى شاشة هاتفي،  
إنه يوم الاثنين الساعة الخامسة والنصف صباحاً، أمضيت ساعات في  
غرفتي، أجلس في سكون تام كراهب يتأمل الكون من داخل معبده، لا  
أفعل أي شيء، حتى سمعت صوت خطوات أُمي في الصالون وخرجت

— صباح الخير يا ماما

— صباح النور يا شادي، إيه ده إنت منزلتش الشغل ليه؟ هتروح

إمته؟

— لا يا ماما انهرده أجازة

نظرت إلي في ذهول وقالت:

— أجازة؟ أجازة إيه إنت لحقت؟

ذكرني رد فعلها هذا برد فسلني مع ليلاً حينما قررت إعطائي وإياها

أجازة.

— أه قالولي إنت أجازة بكرة، وأهو أديني معاك، أجازة يعني

كانت أُمي جالسة على سجادة الصلاة استعداداً لصلاة الصبح، جلست

بجوارها وأمسكت يدها لأقبلها وقلت:

— وبعدين أنت الحبايب تكرهي إن ابنك يقعد معاك، إنهرده

## في البيت؟

- طيب يا سيدي، الله يرضى عليك، بس مش هوصيك خلي شغلك  
في حباب عنيك

- حاضر يا حبيبتي متوصيش حريص

أضيت معظم الوقت مع والدتي في أعمال المنزل، بينما كانت هي تقوم  
بعملها في المطبخ، فني غيايبي تقوم هي بكل الأعمال دون استثناء، لذا كان  
وجودي بمثابة تخفيف الحمل من على عاتقها، نعم لم تكن شقتنا كبيرة،  
لكن في حالة سيدة مسنة فهو أمر شاق.

أنتهيت من أعمال الكنس والتنظيف، وبدأت الشقة في أفضل حال كما  
يجب أن تكون دائماً، جلست لأستريح قليلاً وأستجمع قواي الجسدية  
لكن حال دون ذلك صوت هاتفي لأهرع إليه ظناً مني أن الطرف المتصل هو  
العمل بكل تأكيد، لكن وعلى عكس ما هو متوقع كانت ليينا هي المتصلة،  
فأجبت:

- ألو

- ألو إزيك صباح الخير يا عم شادي

- صباح النور

- أخبارك إيه إنهرده؟

- الحمد لله بخير

- هتعمل إيه إنهرده؟

- أبدأ ولا حاجة غالباً هكون في البيت إنهرده

خرجت أُمي من المطبخ لترى مع من أتحدث

- طيب إيه رأيك أنا عازمك إنت وطنط إنهرده على الغدا

- بجد؟

- آه أكيد طبعاً بجد تحب تيجي إنت وطنط إمتة؟

متردداً:

- مش عارف، شوفي الوقت إللي يناسيك

- طيب عامة الغدا هكون مجهزاه على الساعة تلاتة، هستناكم

متتأخروش بقي

وانتهت المكالمة على ذلك، لم تزد حرفاً ولم تنقص حرفاً، نقلت لأُمي

تفاصيل مكالمتي مع لينا وعن مدى رغبتها في استضافتنا على الغداء إلا

أنها رفضت الدعوة ناقلة لها رسالة اعتذار بدعوى أنها لا تقوى على

الحراك ولا ترتاح إلا في منزلها، ومن جهتي لم أستطع رفض دعوتها،

وذهبت إلى منزلها في الموعد المحدد.

كانت لينا تسكن بمفردها في فيلا دويلكس أرضي في إحدى العمارات

على بعد شارع من مسكني، على الأرجح لا تتجاوز الـ 350 متر

وحديقة صغيرة تعكس الأشجار والزهور فيها أنها تعتني بها عناية

خاصة جداً.

ضغطت على جرس الباب، واستقبلتني كما لم تستقبلني من قبل، و

رأتها عيناى كما لم ترها من قبل ، لا أنسى منظرها ولا ملبسها أبداً ،  
كانت ترتدي عباية من الحرير زرقاء اللون بها قليل من التطريزات ولم  
يكن فيها كثير من التفاصيل إلا أن هذا الملبس عكس زوقها الرفيع ، وعن  
وجهها فكانت تضع القليل من المكياج و شعرها البني كان قد احتضن  
مشبكاً ليبدو ملموماً ، حتى عطرها الباريسي المميز كان له القدرة في أن  
يفوح منها لتملك أي مكان تجلس فيه .

دخلت من باب الحديقة وقبل أن تغلق الباب نظرت إلى الخارج  
وقالت :

- إيه ده هي طنط مجتش معاك ليه؟
- معلش يا لينا هي بتسلم عليكى وبتشكرك جداً على العزومة  
ببس هي تعبانة شوية وصعب تخرج من البيت
- لا أبداً ألف سلامة عليها ، اتفضل اتفضل أهلاً وسهلاً  
من الحديقة الصغيرة إلى داخل فيلتها ، وفي الصالون تحديداً ، بدا كل  
شئ من الديكور المذهب و النجف الكريستالي و السجاد بل و حتى كراسي  
وكتب الصالون فضلا عن اللوحات الزيتية المنتشرة في بعض الحوائط كما  
يجب أن يكون ، وقد تأكدت من خلال رؤيتي لهذا المستوى أن لينا تأتي  
من مستوى مادي عالي .

كان المطبخ في زاوية من الصالون وبه فتحة صغيرة من الجدار المطل  
على الصالون نفسه بينما كان بابه من الخلف وحسبما أتذكر كان الباب

بالقرب من باب الخديقة إلى حد ما، بينما كانت السفرة بالقرب من المطبخ في الجزء الأخير من الصالون.

كنت أنتظرها في الصالون بينما كانت هي في المطبخ وعندما خرجت قالت:

- ده أنا عملاك إنهرده لازانيا و شوية تحابيش كده على جمب هتاكل صوابك وراها، اتفضل الأكل جاهز

عندما توجهت إلى السفرة كان نصفها مليئاً بما لز وطاب، صينية اللازانيا و صينية أخرى من اللحم وصينية بها بعض من قطع الدجاج المشوي و طبق آخر به بعض من البطاطا المقلية وسلطات بأنواعها و مقبلات فضلات عن المشروبات الغازية والعصير.

قلت لها مازحاً:

- إيه ده كله؟ ليه التعب ده؟ حد قالك علينا إني أكون لدرجة الفجع؟

ضحكت:

- ياسيدي إنت بس كل بالهنا والشفة

وجلسنا سوياً وجهاً لوجه على السفرة، كانت مهتمة بي إلى أبعد درجة حتى إنها كانت تقطع من صينية اللازانيا وتضعه في طبقتي ولم تعطيني فرصة أبداً في أن أتعامل مع طعامها بنفسى لدرجة أنها قد أكلت القليل مما صنعت يدها، كان طعامها شهى لدرجة لا توصف، سألتها:

- إنتي عملتي كل الأكل ده لوحداك؟
- نظرت لي وقد بادرتني بغمرة من عينيها وقالت:
- عندك شك؟
- بصراحة لا، تسلم إيدك بجد، أنا الحمد لله كده.
- إيه ده معقولة إنت مكلتش حاجة
- ده أنا بقيت على أخرى، الحمد لله تسلم إيدك
- مضى بعض من الوقت لتدعوني للجلوس خارجًا في الحديقة ذات الهواء الطلق و مع بعض من القهوة الساخنة كنت أستحضر بعض الأسئلة لأجاورها ولكن و بطريقة ما سارعتني بسؤالها وقالت:
- أنا حاسة يا شادي إن جواك كلام عايز تقوله
- ترددت وتعلثمت:
- ها، أنا؟
- اتكنم يا شادي
- استجمعت شجاعتي
- بصراحة يا لينا أه في وفي حاجات كتيرة كمان
- وضعت فنجان قهوتها على الطاولة أمامها وقالت:
- زي إيه؟
- إنتي إزاي غايشة لوحداك في بيت طويل عريض زي ده؟
- عاذبي يعني في العربية في كده؟

- محدش من قرايبك بيجيلك؟ أي حد؟ يا بنتي إنتي على كده عايشة في وحدة قاتلة

- مليش قرايب كثير، لمياء من وقت للتاني بتجيلي وبندرج سوا أحياناً، وناس صحابي متعرفهمش بيزورني هنا في البيت أو في مكان عام لما بعمل حفلات أو عزومة عندي، أهو عندي كذا حاجة أقدر أعملها علشان أهرب من الوحدة إللي بتقول عليها.

- طيب ده لما بتكوني مع الناس، طيب لوحدك هتعملي إيه في وحدتك دي؟

- طالما إنت معايا وصاحبي القريب أنا مش هحس بوحدة

- ...؟؟؟؟

- مالك سكت ليه؟ على فكرة بس علشان تبقى عارف محدش من الناس إللي حواليا دي حسيت إن ممكن حد فيهم يبقى قريب مني لحد ما اتعرفت عليك.

شعرت من وراء تلك الإجابة أن هناك شيئاً ما تحاول ليّنا الهرب منه أو بالأحرى هي بحاجة لشخص ما يكون بجانبها أغلب الوقت، نعم، في داخلها شيء تخفيه أو ربما تعيش في سجن خفي.

كنت أنوي أن أسألها عن والدتها إلى أن رن هاتفها النقال وحينما ردت على المكالمة بدأ على صوتها الغضب واللوم برغم أنها كانت تتحدث بهدوء:



- ألو، أهلا إزيك يا هانم، مبدئيًا إنتي إيه اللي عملتيه ده مع شادي؟ لا لا لا مش عايزة أسمع أعدار، هو كثر خيريه إنه أنقذك من الموقف السخيف إللي حطيتي نفسك فيه، لا والله؟ بصي يا لمياء إحنا أصحاب وكل حاجة بس إللي عملتيه مع شادي ده غير مسموح لأن ببساطة أنا وشادي أصحاب جدًا ومعنى إنك غلطتي فيه يبقى غلطتي فيا أنا شخصيًا، لا بجد إنتي إنسانة غبية جدًا ده إنسان محترم، عامة، بصي يا لمياء، لا لا، أدامك حل من اتنين يا تشوفيه بكره وتعتذريه يا إما هتخذ موقف إداري وأفتح تحقيق في موضوع الجيست الكويتي وساعتها هتزعلي مني جدًا، أنا قلت إللي عندي وفكري كويس، باي مع سلامة

انتهت المكالمة على ذلك، وضعت هاتفها بجانبها وأردفت قائلاً:

- إيه يا لينا ليه كده؟ مكنش في داعي للي عملتيه ده؟ كده هتكرهني أكثر

- لا لا متخفش هي على فكرة بتكلمني وهي عارفة إنها غلطانة صوتها باين عليه، صاحبتي وعارفها، وهتشوف بكره هتعتذرك وهتقول لينا قالت، هي ديش شوية حبتين بس قلبها طيب صدقني

- أنا مش عارف أقول إيه بصراحه

- ولا حاجة متقوئش حاجة، إنت صاحبتي وأخويا لازم أقف

جيبك وفي ضحك

للمرة الألف وربما المليون تؤكد على رغبتهما القوية في التمسك بي  
والآن تقول إننا بمثابة أخوة.

تجرات في السؤال أخيراً وقلت:

- كنت عايز أسألك يا لينا، هو والدك فين بالضبط وليه مش  
عايش معاك؟ كنتي قولتي إن والدتك متوفية وكده، هو ليه سايبك  
لوحذك؟

بدا على وجهها علامات التوتر وللحظات لم تدري ماتقول وهو ما  
جعلني أزدف قائلاً:

- اهدي بس أهدي، مافيش داعي للتوتر ده، إنتي من ساعة  
ماتعرفتي عليا وإنتي بتقولي إحنا أصحاب وفي ضهرك وأنا معاك وإنهرده  
قولتي إنت زي أخويا، فإذا ده يخليني أقولك إنتي أختي ومتخبيش عليا  
حاجة، مهما كان الموضوع أنا كاتم سر

نظرت إلي وكأنها اطمأنت لردي عليها وبرغم أن ما باحته لي يومها  
لم يكن كافياً إلا أنني اعتبرت ذلك بداية حقيقية لعلاقتنا ليس لأنني لم  
اعتبر ما سبق كان تظاهراً ونفاقاً في العلاقة لكنني كنت أرغب في البحث  
في أعماق لينا وحياتها الشخصية كما حاولت هي تماماً، قالت:

- الحقيقة هو موضوع كبير شوية ومش عارفه أبداً منين

لأجعلها تطمئن أكثر أزدفت قائلاً:

- براحتك خالص ابدأي زي ما إنتي عايزه

- بصراحة امي توفت بسبب تعبها من الكانسر، والذي مكثش  
معانا طول الوقت بمعنى أدق اتخلي عنها في عز شدتها، حتى بعد  
ما توفت من كام سنة مخضرش الدفنة ولا حتى اتصل وسأل، باختصار  
العلاقة بين والدي وبينني مقطوعة

كنت أنظر إليها منتظراً المزيد ولكنها لم تبج بأكثر من ذلك، علمت  
وقتها وتأكدت من السبب وراء تمسكها بي.

استأذنت منها للرحيل في تمام الساعة الثامنة والنصف وعند الباب  
صافحتها وعندما رغبت في ترك يدها ضغطت هي علي يدي وقالت:

- أنا فكرت ألف مره قبل ما أعمل التصرف ده، لكن مافيش حد  
أقدر أثق فيه أكثر منك خد ده مفتاح الفيلا لو حصلي حاجة أي حاجة  
أرجوك ماتتخلاش عني.

نظرت إلى المفتاح وإليها في ذهول تام وقلت:

- ليئا إنتي متأكدة من إللي بتقوليه ده؟ محدش بيعمل كده في  
الدنيا كلها؟ طيب الجيران يقولو إيه لما يشوفوني بفتح باب بيتك بنفسي  
وأنا غريب بالنسب لهم

- صدقتي محدش له الحق إنه يحكم عليا وميهمنيش كلام  
الناس، أنا عارفك كويس ومتأكدة من أمانتك وإخلاصك

- أرجوكي يا ليئا متحرجهنيش، أنا...

- أنا إللي بتؤسل إليك يا شادي خد المفتاح، علشان خاطري

كانت تبدو على نظراتها الجديدة ، لوهلة من الوقت أعتقدت أنها تهذي أو تقول ما لا يحمد عقباه ، لكنها كانت تتكلم بجدية تامة ، هي فعلا بحاجة لي ، ولكن ماذا أفعل؟ إذا ما نظر أي أحد الى الناس فسيراهم يتهامسون ، والناس في مثل تلك الأمور لا ترحم ، وكعادتنا كمصريين إما نهول من أسخف الأمور أو نسخف من أعظم الأمور.

علقت المفتاح في ميدالية مفاتيحي الشخصية واتخذت قراراً بيّني وبين نفسي أنني لن أستخدمه إلا برغبة من ليّنا شخصياً واعتبرته أمانة أودعته عندي إلى أن يحين الوقت المناسب لأرد لها المفتاح.

(5)

وضع الدكتور مصطفى القلم قائلا:

- واضح أنها كانت بتثق فيك جداً
- فعلا، ثققتها فيا كانت بلا حدود من أول يوم اتعرفنا على بعض فيه
- تعرف ليه هي عملت كده؟ محاولتش تفسر أبايمها إيه إللي يخلي بنت عايشة لوحدها في بيت طويل عريض زي ما وصفتلي تدي المفتاح لحد غريب عنها مهما كانت درجة الثقة والصحوبية؟
- نظر إليه شادي قائلا:
- يومها كنت مستغرباً حاولت أفسر بس ملقتش أي تفسير للي حصل اتضحلي ده في الآخر بس
- طيب خليتنا منرووحش للنهاية على طول، أنا أقولك هي عملت كده ليه وده تفسيري إللي استنتجته من خلال كلامك
- اتسعت عيناه قائلا في لهفة:

- ارجوك قللي، أنا تعبان بسبب الموضوع ده بقالي كتير
- حاضر حاضر اهدى بس خد اشرب كوباية المايه دي
- بعد أن ناوله الماء وشاهد مريضه وهو يشرب ويرتوي أريف قائلا:
- واضح أنها كانت على أرغم من مستواها الاجتماعي إللي عايشة

فيه ومظهرها وشكل البيت كانت بتفتقد أهم حاجة، البني آدم مننا دايمًا بيحتاجها وميقدرش يعيش من غيرها، البسند، الظهر إللي الواحد مننا يلجأه وقت الاحتياج والشدة، أعتقد أنها كانت بتدور على حد تحس معاه بالارتياح النفسي، بتحاول تدور على الدفا واللحظة الحلوة علشان تمسك فيها، آه كانت عايشة معاكم وفوسطيكم بترسم على وشوشكم السعادة والابتسامة وأنت واحد من الناس دي لحد ما اتعودت على ابتسامتها البهودة زي ما بتقول، زي السحابة بالظبط بتمطر سعادة على الكل، بس بمجرد لما كانت تبقى وحدها مكنتش بتلاقي أي حد من إللي كانت سبب في سعادتهم، بالتأكيد كانت عايشة في ظلمة الوحدة وده إللي لحد ما حاولت إنها تغيره لحد ما شافتك واتعرفت عليك والدليل موضوع المفتاح إنها اتأكدت إنها لاقت الشخص إللي كانت بتدور عليه، بس قولي صحيح، هي العلاقة بينكم كانت علاقة حب؟

- لا كنا أكثر من أخوات كنا أصحاب بجد مش أكثر
- ممممم تمام تمام ، طيب موضوع أهلها ده محاولتش تعرفه
- عرفته بس مكنتش من ليننا شخصيًا
- ومال من مين؟
- ثاني يوم موضوع المفتاح على طول من لمياء
- وطبعًا كالعادة ليننا عدت عليك الصبح ورحتم الشغل سوا
- ده صحيح

— طيب احكي لي تفاصيل اليوم ده

لم نتكلم كثيراً ذلك الصباح، ليس أكثر من صباح الخير وصباح النور، إلى جانب الحديث عن بعض الموضوعات التي ليس لها أي أهمية وإن كانت لقتل الوقت، كانت لدينا تعشق الأغاني القديمة وتحفظ ببعض الأسطوانات المدمجة لأم كلثوم و عبدالحليم حافظ وذلك الجيل القديم وإن استمعت لفنان معاصر فعليلها بأغنية القديمة كجورج وسوف وأغنية كلام الناس، كانت تمتلك كنزاً موسيقياً في سياراتها، حتى عندما كنت أرغب في الحديث معها في طريقنا إلى الفندق أراها منسجمة مع أغنية أم كلثوم هل رأى الحب سكارى، إلا أن انسجامها الأكبر كان مع قصيدة بصوت أم كلثوم بعنوان ثورة الشك، كانت كمن غادر من الواقع ليسكن ذلك العالم الآخر، أحسست بإحساسها عندما زادت من مستوى الصوت لأبخر معها في ثنايا الكلمات، حتى الآن مازالت تلك الكلمات تحوم في ذاكرتي...

أكاد أشك في نفسي لأنني أكان أشك فيك وأنت متي  
يقول الناس إنك خنت عهدي ولم تحفظ هواي ولم تصني  
وأنت متاي أجمعها مشيت بي إليك خطى الشباب المطمئن  
يكدب فيك كل الناس قلبي وتسمع فيك كل الناس أذني  
وكم طافت علي ظلال شك أقصت مضجعي واستعبدتني  
كأنني طاف بي ركب الليالي يحدث عنك في الدنيا وعني  
على أنني أغالط فيك سمعي وتبصر فيك غير الذك عيني

وما أنا بالمصدق فيك قولاً ولكني شقيت بحسن ظني  
 وبي مما يساورني كثير من الشجن المورق لا تدعني  
 تُعذب في لهيب الشك وروحي وتشتقي بالظنون وبالتمني  
 أجبتني إذ سألتك هل صحيح حديثُ الناس خُنتَ أَمْ تَخْنِي؟  
 أكادُ أشكُ في نفسي لأنني أكادُ أشكُ فيكَ وأنتَ مني  
 يقولُ الناسُ إنك خنتَ عهدي و لم تحفظْ هواي ولم تُصني  
 وأنتَ مُنْايَ أجمعُها مَشَتْ بي إليك خُطى الشَّبابِ المُطمئنِّ

استمعت إلى تلك القصيدة مرتين متتاليتين ولم ألقِ إلى ذلك بالا فبقدر  
 استماعي بقضاء كل صباح معها بقدر استماعي بمشاهدة ملامحها و  
 ابتسامتها والإحساس بسكون روحها حتى ألفت روعي صحبتها لأتخلي  
 بذلك أخيراً عن شكوكي تجاهها ومخاوفي، أرادت مني أن أكون صديقاً  
 وأكثر من أخ لها في العلاقة وبدوري اقنعت نفسي لتكون هي صديقة وأكثر  
 من أخت لي تماماً كما أرادت.

قبل أن ندخل من باب الفتدق قالت لي:

- لو لمياء عملت معاك أي حاجة بلغني على طول

- والله يا لينا إنتي مكبرة الموضوع

استقبلنا الأستاذ حسن بترحاب و استأذن لينا لكي تدخل معه  
 المكتب، ولم تكن لمياء قد أتت بعد ولا حتى طه فوقفنا وحدي تتريباً في  
 الرئيسيتين لمدة عشر دقائق حتى أتيا معاً، كانت لمياء تنظر إليّ ويسألني



تلك النظرات، إلا أن تلك النظرات كانت مختلفة عن سابقتها، كانت نظرات الندم عما حدث، أما طه فلم يشغل بالاً حتى ظننت لوهلة أن الدنيا إذا انقلبت رأساً على عقب فلن يحرك ساكناً.

انشغلت كثيراً ذلك اليوم وكان النزلاء لا ينفكون أبداً في التردد علياً أو حتى الاتصال بالهاتف، أمضيت كثيراً من الوقت هكذا صامتا ولياء كانت تحاول أن تبحث عن وسيلة لبدأ الحوار أما ليلى فكانت تارة تأتي إلينا وتساعدنا في العمل وتارة أخرى تمضي الوقت مع الأستاذ حسن في مكتبه لتقف معه على متطلبات العمل وخلافه.

أرهقت قليلاً من العمل واستأذنت الأستاذ حسن لأحصل على وقت قليل أستريح فيه ومن ثم أستكمل العمل، وفي الحقيقة لم يرد لي أي طلب وحتى لا يتأثر العمل وتخفيفاً للضغط قامت ليلى لتقف مكاني حتى أعود، بالمقربة من الريسبشن كان هناك كافيه توسط المكان وهو مواجهة تماماً لقاعات المؤتمرات، جلست وتناولت فنجان قهوة ولم تمض دقائق حتى شعرت بشخص ما يقف ورأني، وعندما التفت وجدت لمياء تبتسم علي استحياء وقد احمر وجهها قليلاً لدرجة أنني لم أفرق بين احمرار وجهها و المكياج الذي زين وجهها.

قالت:

إريك يا شادي اممم، ممكن أقعد معاك شوية؟ لو مش هضايك

بس

- اتفضلني

سبحان مغير الأحوال، لا يمكن أن تكون هذه لمياء، تلك الفتاة ذات

الطبع الثائر كالبركان، الآن تبدو أمامي كالحمل الوديع

- إنهرده الشغل كثير مش كده؟

- آه فعلا ربنا بيعين إن شاء الله

سكتت لثواني واستكملت قائلة:

- شادي أنا آسفة، بجد أنا آسفة، مش عارفة أنا عملت كده إزاي

ولأقولتلك الكلام ده ليه مع إن المفروض كنت أشكرك ساعتها، بس

استسلمت للشيطان وحصل إللي حصل، وأنا آسفة لأنني مكنتش محترمة

معاك من أول ما جيت تشتغل معانا لحد دلوقتي أنت إنسان محترم جدًا

مش عارفة إذا هتقبل اعتذاري أو لا، بس أتمنى إنك تسامحني

ذهلت حنًا من ذلك التحول في النبيرة وطريقة الكلام، كنت في حالة

اندهاش تام

- لا أبدًا، محصلش حاجة، حصل خير

- بجد؟ بالبساطة دي

- آه يا لمياء بالبساطة دي

- انا بجد مش عارفة أقولك إيه

أردفت:

- إننت موجود على الفيس برك مش كده

- آه وهتلاقيني عند ليينا كمان في الفيس

- طيب وليه؟ ممكن تديني موبايلك لو فيه إنترنت

كنت قد وضعت هاتفي أمامي على الطاولة وبرغم أنها استأذنت إلا أن يدها سارعت بالتقاطه ، وبما أن الفيس بوك عندي مفتوح دائماً عندي فلم يعقها أن تفتحه هي دون الحاجة لكلمة المرور والبريد الإلكتروني، كتبت اسمها ببساطة و أرسلت بطلب الإضافة

- تمام كده أنا هقبل الإضافة في أسرع وقت ممكن

- أوكي مافيش مشكلة خالص

كانت لمياء تبلغ من العمر سبعة وعشرين عاماً، منافسة ليينا رقم واحد لدى الأستاذ حسن فلها نفس القدرات والمميزات إلى حد ما إلا أنها كانت تفتقر إلى شئ واحد فقط وهو كيفية التعامل مع المواقف والمشاكل التي يمكن أن يتعرض لها أي عمل ليس فقط العمل الفندقى، بمعنى أدق كان لديها نقطة سلبية في التعامل مع النزلاء وهو ما رجح كفة ليينا عند الأستاذ حسن ليجعلها نائباً له ويعتمد عليها في كثير من الأمور، كان للمياء مظهر مميز في الشكل والملبس تماماً كما تظهر ليينا شخصية، نفس الطول تقريباً، شعرها قصير وكانت تصبغه دائماً باللون الأحمر، رشيقة القوام وعلى الأرجح أن وزنها كوزن ليينا، لم تكن ممثلة أبداً، وبالمقارنة مع ليينا فإن المنطقة الوحيدة في جسمها ممثلة هو صدرها فقط فيما عدا ذلك تظن أنهما توأم في الشكل والمظهر كالجوزاء لكن ليس في الصفات

والطباع.

وفي الحقيقة لم أكن متأكدًا من مدى مصداقية اعتذارها خصوصًا أن لدينا في مكالمتها لها قالت إنه إن لم تعتذر فستتخذ موقفًا لن تحمد عقباه وتقطع العلاقة بينهما، لمدة دقيقة وجدت نفسي حائرًا بين أمرين هل اعتذرت لأنها شعرت بخطئها أم اعتذرت مجبرة تحت تهديد واضح وصريح؟ و سواء كان هذا أو ذلك فقد قبلت الاعتذار لأدفن العداة وأحافظ في نفس الوقت على علاقة لياء بليانا ومن جهة أخرى أكسب أصدقاء جدد. عدت أنا و لياء معًا إلى الريسبشن ولم يكن مشغولا باستفسارات النزلاء والغريب أيضًا أن الهاتف الذي لم يكن يهدأ أبدًا قد صمت أخيرًا، عدنا جميعًا إلى أماكننا ليكون من جهة اليسار طه ولياء و على اليمين تقف لدينا وأنا، كنت أتوسط لدينا ولياء كل منا أمام جهاز الكمبيوتر الخاص به، اقتربت من ليانا لتحدثني بصوت خافت في أذني وقالت:

- إيه اللي حصل؟

- لا تمام مافيش حاجة التبت اعتذرت خلاص وأنا قبلت

اعتذارها

نظرت إلى شاشة الكمبيوتر وهزت رأسها قائلة:

- تمام كده

عملنا معًا جميعًا بشكل متناغم وكان العداة والفتور الذي دار بيني وبين لياء وحتى طه الذي وقف على الحياد قد زال إلى الأبد، لدينا تأثير

كما السحر على البشر، مضت ساعتان تقريباً لنفاجاً جميعاً بذلك النزير  
الكويتي يدخل من باب الفندق متجهاً نحونا ومعها فتاة تبدو من مظهرها  
أنها من بائعات الهوى، بالنظر إلى الساعة وجدنا أنها قاربت من الرابعة  
عصراً، شعرنا بتوتر لمياء وسمعتها تقول بصوت خافت:

— يادي النيلة ده إبيه إلهي جابه دلوقتي أستر يارب

اقترب منا وقال بعد رمق لمياء بنظرة ازدراء:

— ما أبي أي أحد يزعجني أو يدج علياً الباب أو التليفون حتى

الروم السيرفس ما اببييه، فهمتو؟

أجابت لنا بهدوء:

— تحت أمرك يا فندم إحنا في خدمتك

— يعطيح العافية

ثم وضع ذراعه على كتف بائعة الهوى وقال بلهجتنا المصرية:

— يلا يا حلو إنت ساعتنا ساعة حظ

ودخل المصعد ليختفي عن نظرننا، نظر كل منا إلى الآخر وقلت:

— أنا مش مستريح أبداً للراجل ده

ردطه:

— والله أنا شايف إننا لا شوفنا ولا سمعنا، الراجل وجاي بفلوسه

ولو حد فينا أو أي حد قرب من غرفته هيطربقها فوق دماغنا

لمياء قائلة:

- أنتو شوفتم بصلي إزاي؟ يخرب بيته البعيد ده ولا أكفي قتلاله

قتيل

أما لينا فلم تعلق واكتفت بأن تفتح جهازها وتري بياناته، الاسم: منصور القحطاني، الجنسية: الكويت، مواليد 1982، المهنة: رجل أعمال، مدة الإقامة في الفندق: خمسة عشر يومًا أقام منها أربعة أيام فقط، مقيم في الطابق التاسع غرفة خمسة بحسب ما أتذكر.

لا ندري ما هو سبب وجوده في القاهرة ولا هو نوع العمل الذي يكسب منه عيشه فقط تلك البيانات عنه، حتى فوجئنا به مرة أخرى بعد ربع ساعة فقط ومعه حقيبته راغبًا في الرحيل من الفندق، قامت لينا بعمل تلك الإجراءات له وبشكل فظ ألقى المفتاح أمامها وكأنها نكرة أمامه وعندما تدخلت وبدأت في الرد اعتراضًا على تصرفه امسكتني لينا من يدي حتى أصمت وتقول هي بلباقة:

- نورتنا يا فندق

وكان رد ذلك المنصور الفظ:

- الله لا يعطيح العافية

كان أحد ما ينتظره خارج الفندق بسيارة فارهة من نوع مرسيدس ورحل إلى وجهته المجهولة بالنسبة لنا، قلت للينا:

- أنا متش مطمئن يا لينا، هي البنيت اللي كانت معاه فين؟ منزلتش

ليه معاه؟

بشك وقلق أجابت:

- مش عارفة، حاسة إن في حاجة غلط.

- طيب هاتي المفتاح أنا هطلع أشوف في إيه

- أنا جاية معاك

وبما أن لمياء كانت على يساري فقط سمعت الحوار وقالت:

- انا كمان جاية

أما طه فقال ببرود:

أما أنا بقى مليش في الحوارات دي خالص أنا ماشي جنب الحيط،

عيشو حياتكم أنتم وأنا هنا همشي الشغل.

كانت خطواتي تسبق خطوات ليلى ولمياء، لأرى ما الذي جعل منصور

خرج غاضباً بهذا الشكل، فتحت الغرفة ودخلت أنا أولاً، كان كل شئ في

الغرفة مبعثراً، زجاجات الخمور مكسورة، الخزانة مفتوحة،

الأباجورات ملقاة على الأرض، والتلفاز مفتوح على قناة مزيكا، كان كل

شئ في الغرفة في حالة يرثى لها، كل هذا لم يشغل بالنا حتى لفت نظري

بعض من يقع الدماء على ملائحة السرير الناصعة البيضاء، كانت الدماء

تبدأ من السرير وتنتهي إلى الحمام كخط السير تماماً، وعندما دخلت

الحمام وجدت بائعة الهوى ملقاة على الأرض عارية و ملفوفة بقوطة

الحمام، توارى وجهها وتبكي بكاء مكتوماً، كان الجزء السفلي من

القوطة مخضباً بالدماء فصرخت منادياً ليلى ولمياء

- تفاؤوا بسرعة الحمام

وعندما أتيتا ورأيتي وشاهدتني المظهر أخرجتني ليينا من الحمام وأقفلت  
وزاءها الباب لأسمع صرخاتهما وقلقهما من مدى خطورة حالة تلك  
الفتاة، وقفت وراء الباب لعلني أعرف سبب ما حدث

- آآآآآآ

صوت ألقها كان فظيماً ويجعل أي إنسان يشفق عليها، سمعت ليينا  
تقول للمياء:

- واضح إنه ضربها جامد جداً، قوليلي يا حبيبتي متخافيش إيه  
إللي حصل؟

تبكي منهارة

- طيب بلاش اسمك إيه؟

ترد بصوت يعتصره الألم:

- أحلام

لمياء قائلة:

- دي في حالة صدمة ويتترعش

سألته ليينا:

- هو إيه إللي يخليه يضربك بالشكل ده؟ أه علشان كده طيب أنا

فهمت خلاص ساعديني يا لمياء

وكان كل ما سمعته هو صوت الماء والبكاء والألم وعندما أغلقت



إحداهن الماء خرجت لمياء لتأتي بملابس أحلام حتى ترتديها، وعندما خرجن كانت ليلى ولياء كل منهما تمسك بيد أحلام التي تمشي وهي خائفة القوى وبوجه يملؤه الكدمات، قلت:

- إحنا لازم نببلغ الشرطة

ردت أحلام وهي منهارة في البكاء:

- لا لا بلاش يستر عرضك بلاش تببلغ الشرطة أنا في عرضك

والنبي

اقتربت ليلى منها لطمأنتها وقالت:

- خلاص خلاص اهدي يا أحلام مش هنجيب سيرة إيه إلهي

حصل بس فهميني؟

مسحت دموعها واستجمعت شتات أعصابها وسردت الواقعة:

- أنا شغالة في كباريه في الهرم، بقاله يومين تلاته بييجي

الكباريه وكان لما بيشفوني بيحاول يتوددلي، ولما كلمني إنه عايزني في

ليلة حمرا بمقابل ألف جنيهه علشان أرضى إني آجي معاه رضيت رغم إن

والله العظيم والله العظيم أنا عمري ما عملت علاقة مع حد قبيل كده أنا لسه

بشرقي والله

إنهارت في البكاء مجدداً واستأنفت:

- كلمني وقال لي إنه هياخدني بنفسه من مكان في الهرم غير الكباريه

ويوصلني الفندق هنا وده إلهي حصل فعلا، أول ما طلعت معاه الغرفة

هنا، جالي تعب ال Period. فجأة ومكنتش عاملة حسابي، شاف الدم  
أتجنن وبدأ يشتم وهاتك يا ضرب في وشي وفي بطني، كنت هموت في  
إيده، وعلشان يقطي على العملة أخذ مني موبايلى علشان مكلمش حد  
وخذ الخومسميت جنبه مقدم إللي دفعهالي وأخذ شنطة هدومه ومشى  
بكت بشكل هستيري أكثر من السابق وقالت:

— الله يلعن أبو الحاجة في الأرض إللي بتجيب للنواحد النذل  
والبهذلة.

لوهلة وقفنا في ذهول تام مما سمعنا، من جهتي ولياء لم تعلق، أما  
لينا فقالت لها:

— بصي إنتي هتنزلي معايا دلوقتي هخرجك من باب غير الباب  
إللي دخلتي منه علشان محدش يشك في حاجة وهديكي رقمي إما تبقي  
كويسة إ بقي كلميني  
ببكاء مكتوم قالت:

— ربنا يخليكي أنا مش عارفة أشكرك إزاي جميلك ده مش هتساه  
أبدًا

وجهت لينا كلامها لي و للمياء وأردفت:

— شادي لمياء، بعد إنكم رتبو الأوضة شوية علشان لما يجي الكبير  
مبلاقيش النظر ده وبيلع، لياء بعد إنك لو تتصرفي في الدم وتمسحيه من  
الأرضية والملاية كوميها في بـ منها بحيث الدم مبينش فيها، ولما تخلصوا

كلموا الكبير فوراً

وهو ما حدث بالفعل غطينا على الجريمة الكاملة وكان شيئاً لم يكن،  
ورجعت الغرفة كما كانت أفضل، وأثناء نزولنا في المصعد قالت لي لمياء:

- تصدق البنّت صعبت عليا قوي

لم أعلق على كلامها لتستطرد هي

- أنا مش فاهمة البني آدم ده إيه؟ شيطان؟

- إحمدي ربنا إنها جت على قد كده ولو البنّت دي زي ما بتقول

لسه بشرفها يبقى أمها دعيها بجد إنه محصلش

- عندك حق فعلا، بس تفتكر ليّنا هتديها رقمها ليه

- أكيد علشان تساعدنا بحاجة

- تفتكر؟

- وليه لأ؟ إنتي مشوقتيش منظر ليّنا وهي متعاطفة معاها إزاي

- أكيد شوفت ده هي أكثر واحدة مني أنا إلّلي بنت زيهم كانت

بتساعدنا في الحمام

- لمياء أرجوكي المنظر تعبني نفسياً ياريت نقفل على الموضوع ده

وننساه وإن كان في إيد ليّنا حاجة تساعد أحلام بيها أكيد مش هتتأخر

وده إجابتن جوابا بكده

عدنا إلى ليّنا في الريسبشن وبدأ كل شئ طبيعياً وكان ما حدث قد ذهب

أدراج الرياح وضرب من الماضي، كان صمت ليّنا رهيباً بعد هذه الواقعة

وكانها كانت تقولنا لا أحد يتحدث، وقد فهمنا رسالتها.

وفي أثناء عودتنا معاً بعد انتهاء العمل تحدثت معها عما حدث:

١ - أنتي إيه رأيك في اللي حصل؟

٢ - السؤال ليك إنت يا شادي، إنت إيه رأيك؟

٣ - بصراحة مش عارف، محتار أصدق أحلام ولا مصدقهاش،

الزاجل ده مبتجراش ويجيبها الفندق إلا إذا كانت هي شخصياً إديته

مجال وش وسمحتله إنه يعرض عليها عرض زي ده، ولو فعلا زي ما هي

ما بتقول لسه بشرفها يبقى تحمد ربنا بجد إنها تعبت قبل ما يحصل

٤ - أنا بقه مصدقها

٥ - إزاي يعني؟

٦ - بنت زيها وعارفة، دموعها دي مكنتش دموع ألم الضرب

ونس، لا، ده كانت دموع قهر و حرمان من حاجات كتير، أحلام زي

الغرقانة في بحر عميق محتاجة بس إلي يمدلها إيداه و ينقذها

٧ - علشان كده إنتي إديتها رقمك؟

٨ - بالضبط كده

٩ - طيب وهنغل إيه مع منصور هنبلغ ولا إيه؟

١٠ - لو بلغنا في خطر على أحلام وممكن تتسجن لكن منصور مش

هيحصله حاجة وهيخرج منها عادي، هننتر عليها وكده كده محصلش

حاجة ولا لمسها أصلاً

- إنتي متعاطفة معاها قوي زيادة عن اللزوم

فجأة انفعلت بمصيبة وقالت :

- هو إنت إيه مبتحسش ، البنت عملت كده غصب عنها وظروفها

زي الزفت ، إنت إيه يا أخي مفكر نفسك إنك في إيدك العقاب والشواب  
وهتحكم على البشر؟

شعرت إنني صرت كالقزم أمام ماردر عظيم ولم أنطق بكلمة واحدة  
واكتفيت بالنظر من خلال شبك سيارتها إلى الدنيا ، وعندما شعرت  
بموقفي الذي وضعتني فيه أردفت بانفعالها وبصوت متردد

- شادي ، بليز نتقل على الموضوع ده

استجبت لذلك و طوال الطريق كنا صامتين حتى الراديو والموسيقى  
كانت صامتة وهكذا حتى وصلت إلى المنزل ، وفي الليل وبعد صلاة العشاء  
لم أترك مجالا للأسئلة لكي تتكاثر في عقلي فقررت أن أتصل بلمياء  
باعتبارها المقربة من ليلى

- مساء الخير يا لمياء

- أهلا يا شادي إيه المفاجأة دي

- إزيك إيه أخبارك

- تمام بخير

- أتمنى مكنوش عطلتك أو أزعجتك

- لا خالص كلمني في أي وقت

- الحقيقة كنت جابب أكلّمك في موضوع كده يخص لينا بس بيني وبينك
- خير، موضوع إيه؟ لا يكون قصدك عن إيلي حصل إنه رده مع البنت إيلي اسمها أحلام؟
- يعني هو مش بالبظبط كده
- طيب إيه؟
- هو إنتي تعرفي أسرة لينا؟
- آه طبعاً أعرفهم ده أنا معشراهم زي ما معاشرة لينا بالضبط، بس بتسأل ليه؟
- أبداً أصل أنا ملاحظ أن لينا عايشة لوحدها وأعرف أن والدتها متوفية بس والدها مش موجود
- آه!! فهمتك إنت تقصد إيه
- ممكن تحكييني
- بص يا سيدي والدها اسمه الدكتور شريف كامل، دكتور كبير في أمراض القلب ومن النوع إيلي يسافر كتير مش بيبستقر في مكان ووالدتها ست طيبة جداً اسمها منى إبراهيم كانت الله يرحمها صاحبة كوافير بس بسبب تعبها ومرضاها اتقفل لحد ما توفت
- هي توفت من إيه
- من سرطان الثدي

- بس أنا ملاحظ إنها بتنزع من سيرة والدها
- آه مهو علشان حصل حوار كده أدى لقطيعة بينهم
- إيه إللي حصل؟
- بص الراحل أبوها ده على قد ما ربنا إداله من علم ومال إلا إنه كان بتاع ستات ومكنش فايق لبيتته باختصار فلوسه مكنش لأهل بيتته زي ما إنت متخيل، كان كل ما يرجع الشغل أيام ماكان عايش في القاهرة يرجع بيته ميقعدش مع مراته وبنته ربع ساعة على بعض ويأخذ بعضه وينزل بيروح فين ومع مين معرفش، لحد ما مراته وبنته في يوم كانوا بره البيت واستغل الموضوع ده وجاب واحدة قد لنا بالضبط إللي كانت في الوقت ده في أوائل العشرينات من عمرها ونام معاها في سرير مراته، طنط الله يرحمها كتمت جواها و جت على نفسها وكرامتها علشان خاطر بنتها وفضلت شايلة في قلبها لحد ما الكانسر نهش في صدرها، مكنش أبوها ببسال كثير عن مراته طول فترة مرضها يعني لو في الشهر مرة يبقى كده كثر خيريه، كان في الوقت ده مسافر بيعمل عمليات بين الكويت وقطر و أبو ظبي وقعد فترة طويلة جداً هناك، اتوفت طنط ووصله الخبر وهو في سفره مكلفش خاطره يسأل أو يجي حتى دفنة مراته وبنته الوحيدة أهملها من ساعة الوفاة لحد يومنا هذا، والشهادة لربنا لنا كانت مكافحة جداً تعبت على نفسها واجتهدت لحد ماوصلت للي هي فيه
- طيب البيت اللي هيا فيه حالياً

- ده اشترته من ورت طنط ليها الله يرحمها وباعت بيتهم إللي في المنيل حتى أبوها مهتمش باعت البيت إمتة ولين
- على كده ميعرفش بيت بنته فين
- ده حقيقي ، بص أقولك حاجة ليها برغم كل الصعاب إللي مرت بيها وموت والدتها وخيانة أبوها ورميته ليها إلا أنها بنت جدعة وبميت راجل وما فيش زيها وصدقني أنا شخصياً عمري مالاقيت ولا هلاقي بنت محترمة زيها ، بس خلي بالك إللي قولتهولك ده ميطلعش بره خالص حرصاً على مشاعر ليها

- أكيد طبعا ده أنا إللي كنت هقولك كده ، شكراً يا لمياء

- سلام

- سلام

إذاً فقد اتضحت الصورة كاملة بالنسبة لي ، لهذا السبب تمقت والدها ولهذا السبب اتفعلت علي بسبب أحلام التي ذكرتينا بأشد الأوقات قسوة في حياتها ، وتأكدت أن وراء هذا الجمال القمري والروح الصافية ألم لا يمكن غفرانه ، واستغربت كثيراً عن سبب عدم إفصاحها لي عن هذا الموضوع برغم أننا أصبحنا أصدقاء وأخوة ، بقليل من التفكير توصلت إلى نتيجة و هو خوفها من أن أكون صورة سلبية عن شخصيتها وأتخلي عنها والظن بالسوء في سمعتها إذا ما حكيت لي عن قصة والدها هذا ، عذرتها الآن فقط.



وصلتني رسالة على هاتفي وعندما فتحتها وجدت ليينا تقول لي فيها

بالنص:

( أنا آسفة يا شادي أني إنفعلت عليك بالشكل ده مكنش قصدي إنني

أضايك، أنا بس البنيت صعبت عليا وإلي حصلها ضايقتني جدّا، أرجوك

لو زعلت حقك عليا، أنا آسفة )

(6)

لم أحتمل الجلوس في غرفتي و ضاق صدري من البقاء في المنزل وبرغم أن اليوم كان شاقاً فقد قررت النزول والتوجه إلى كافيه بلاتوه الذي يقع على بعد خطوات قليلة من مسكني ، ولا أذكر متى أو كيف قادتني قدمي إلى الكافيه لكن ما أذكره هو أن عقلي كان شاردًا بسبب ما حدث و ما سمعت ، دخلت الكافيه وطلبت من النادل فنجان قهوة، المكان بطبيعة الحال لم يكن شاغراً وهو أحد سمات المكان أن يكون خاليًا من الزبائن إلا في حالة مباريات كرة القدم المحلية والعالمية يكون المكان عكس ما هو عليه ، كنت أنا وحدي في المكان فقط، ليتحول هذا المكان أيضًا إلى خلوة تمامًا كحال غرفتي الخاصة، كنت أسترجع تفاصيل ما حدث منذ بداية اليوم وحتى نهايته وأفكر أيضًا في حياة ليلى وأتخيل كيف تعيش هذه الغتاة حياتها الشخصية و في أي بقعة من أمتاع الأرض يتواجد فيها والدها؟ غريب أمر هذه الدنيا، تسعدنا أياما وتحزننا أيامًا أخرى لتجبرنا على المضي قدمًا في منعطفاتها.

قطع هاتفي صفاء ذهني و تفكيري لأجد ليلى تتصل بي ، وتذكرت أنني لم أرد على رسالتها التي اعتذرت لي فيها، وعندما أحبت على اتصالها بي

- ألو يا ليلى

بصوت خافت يملؤه التعب الشديد ويكاد غارقاً في الألم

— شادي، أنا تعبانة قوي أرجوك تعاللي

بشكل هستيري

— مالك في إيه خير؟ ألو ألو لينا إنتي سمعاني؟

وضعت ثمن القهوة على الطاولة وخرجت لأركض كالمجنون إلى منزلها، وعندما وصلت ضغطت على جرس الباب عدة مرات وأضرب الباب بقبضة يدي بكل قوة، ورغم صياحي عليها و كل تلك الضوضاء التي افتعلتها خارج منزلها لم يكن لحارس العقار أي تواجد سواء كان هو أو غيره، وبعد دقيقتين تذكرت أنها قد أعطتني مفتاح فيلاتها ذلك اليوم، لم أكن أتوقع أنني سألجأ إلى استخدامه بهذه السرعة، دخلت إلى المنزل وصرت أجد فيه كمن فقد عقله منادياً عليها، بحثت في الصالون في المطبخ في الحمام المتواجد في الطابق الأرضي وحتى في الحديقة الصغيرة ولم أجد سبيلاً سوى أن أصد من السلالم إلى الطابق العلوي، كان الطابق العلوي يحتوي على حمامين و ثلاث غرف بحثت في جميعها لأجد لينا ملقاة على الأرض في غرفتها الخاصة بجانب سريرها ملقاة على بطنها لا تحرك ساكناً وكانت غائبة عن الوعي، اقتربت منها على الأرض وحملتني لأضعها على السرير و أتيء قيام بهذا الأمر وجدت كتاب مذكرات كان ملئاً تحتها على الأرض وكأنها كانت تحتضن هذا الكتاب، أمسكت بيدها محاولاً أن أجد أي استجابة ولو بسيطة لها ولكن دون جدوى،

اتصلت بأحد العيادات المجاورة وطلبت سرعة حضور ممرض أو ممرضة  
لنجذتها، كانت مشاعري في تلك اللحظة غريبة ولا توصف ولم أشعر  
بهذه المشاعر منذ وفاة والدي، إلا أن الأمر الآن يبدو مختلفاً، أنه ذلك  
الرابط بيني وبينها هو السبب في ما أنا عليه الآن من خوف وقلق عليها.  
وصلت الطبيبة إلينا وبدأت في الكشف عليها وبعد أن انتهت من آداء  
عملها وإعطائها الحقن والأدوية اللازمة قالت:

- جالها انخفاض في الضغط أنا إديتها أدوية هتساعد الضغط إنه  
ينتظم، سيبها تنام وإن شاء الله هتبقى تمام

- بس حضرتك دي كانت كويسة طولة اليوم وما فيهاش حاجة

- أنا مش شايفة إن في سبب عضوي عندها، غالباً السبب نفسي

إما صدمة عصبية أو انفعال شديد أو زعل لكن غير كده هي بخير

اصطحبت تلك الطبيبة خارجاً، عقلي يدفعني إلى الخروج من المنزل  
وتركها حرصاً من الشبهات وعيون الناس، وقلبي يدفعني إلى ما هو عكس  
ذلك، لم يطاوعني قلبي على تركها وهي في تلك الحالة، لذا قررت البقاء  
معهما لخدمتها إذا ما احتاجت شيئاً والتصرف إذا تدهورت صحتها أكثر  
من ذلك.

اتصلت بأمي لأطمئن عليها وقلت لهما إنني برفقة أصدقاء لي في  
الكافيه المجاور حتى لا تتقلق وطلبت منها أن لا تنتظرنني وتخلد إلى النوم  
إذا تأخرت في المجيء، أطفأت أنوار الغرفة جميعها وتركت الأباجورة

على يمين ليلى مضاءة حتى تساعدنا على النوم أكثر، لفت نظري أمر ذلك الكتاب الذي كانت ليلى ملقاة على الأرض فوقه، كان مفتوحاً وقتها، تناولته وهو مفتوح على الصفحة التي كانت تقرأها ليلى وافترشت الأرض مستنداً بظهري على الحائط وواجهاً السرير، أخذت أقلب سريعاً صفحات ذلك الكتاب واستنتجت أن هذا الكتاب هو مذكرات منى إبراهيم والدة ليلى، قرأت مقطعات من المذكرات، كان كل ما كتب هو عبارة عن شكوى من هجر زوجها الدكتور والد ليلى زوجته وخيانتها مع فتيات وسيدات أخرى من مختلف الأعمار، ومدى الإهانات وجرح المشاعر التي طالتها من زوجها وصبرها من أجل ابنتها وسمعتها وعن رحلتها مع المرض، وحين وصلت إلى الصفحة التي كانت مفتوحة أول مرة كتبت السيدة منى ما هو أشبه برسالة إلى ابنتها ليلى

( بتمنى إنك تحسى بأحاسيس عمرك ما حسيتها قبل كده، وبتمنى من ربنا إنك تقابلي ناس ولاد حلال في حياتك مهما كانوا مختلفين عنك، وبدعي ربنا إن حياتك تبقى أحسن من حياتي وتبقي حاجة تفتخري بعدها بنفسك، هتقعي في يوم من الأيام بس هتقفي على رجليكي وهتكلمي حياتك، ومهما حصل، حبي على قد ما تقدرى وما تبخليش على قلبك، واكرهى قد ما تكرهى، ولومي القدر إذا جارت عليك الدنيا في يوم من الأيام واصرري، لكن لما هتوصلى للنهائية لازم تسامحى من قلبك )

أغلقت الكتاب بعدها ووضعتة بجانب ليلى على المنضدة ورأيت بعدها مقدار الألم الذي تحتجزه داخلها ، تحاول الهرب والنسيان لكن مهمما حاولت فهذا النسيان مؤقت ومع أول موقف مشابه لتفاصيل ما عاشته تتذكر كل شئ.

خيم الظلام مع ستار الليل ، كل دقيقة تمر لا تفارق عيني ليلى أبداً حتى تأقلم نظري على هذا المشهد ، كانت كالجميلة النائمة ، شعرها منسدل على الوسادة مثل شلال من الماء.

شفتاها الصغيرتان مضمومتان في خط مستقيم وبقليل من التركيز هناك حركة طفيفة للغاية عند نهاية حنجرتها ، إنها تتنفس وبشكل طبيعي ، ترقد ورأسها على الوسادة وكأنها تنظر إلى السقف لكنها في الحقيقة لا تنظر إلى أي شئ فقد كانت في عالم آخر دخلت إليه من بوابة الذكريات ، رموش عينيها مثل الزهور ، ترقد في ثبات تام لا يظرف لها رمش ، نومها كان في غاية النقاء والكمال.

كانت غرفة ليلى مصممة على أعلى مستوى ويعكس ذوقها الخاص ، فحتى غرفتها كانت تبدو كغرف فندق الهيلتون تماماً ، غرفة خمس نجوم ، تلفاز lcd مع نظام صوت خارجي ستيريو حديث ، قليل من الديكورات المنتشرة في أماكن محددة في الغرفة ، خزانة خاصة بالملابس وأخرى للأحذية ، ومسندة وتسريحة شعر تحتضنها مرآة جميلة ، و أحدث صيحات المكياج ، التجميل والعطور زينت تلك التسريحة مع

كرسي ذي بطانة مريحة للغاية تجلس عليها حتى تواجه مرآتها لتتجمل، كانت كل تلك التفاصيل مناسبة لغرفة فتاة.

أما السرير فكان فريدياً بإطار خشبي أبيض اللون مع خطوط مذهبة، الأغشية كانت ناصعة البياض وإلى جانب كل هذا يوجد الهاتف اللاسلكي على مقربة من السرير. أما عن الصور المعلقة على الحائط فقد كانت جميعها للينا والدتها، كانت نسخة طبق الأصل من والدتها، آية في الجمال كما يقال، ولا أثر لصورة والدها الدكتور شريف كامل.

وجدت نفسي أنني قد تقمصت دور المتطفل له تواجد ولكنه غير مرئي، أنظر وأستمع وأشعر وأحفظ تفاصيل الغرفة حتى رائحة العطور قد ألفها أنفي، أجلس على الأرض ولا أحرك ساكناً وأراقبها في صمت.

شعرت وقتها بشعورها تجاه ماضيها، وكأنني ولينا اندمجنا لنصبح كياناً واحداً، على الأقل كان هذا الشعور من طرفي أنا فقط، شعرت حقاً بالاشفاق عليها، واحترمتها كثيراً لما بدر منها تجاه أحلام ومن قبلها معي أنا حينما تبنتني للعمل معها، ولابد وكان قالب الطبيب أن السبب النفسي هو مقارنة ما حدث للفتاة أحلام بقصة والدها مع والدتها وإن كان هناك بعض الفروق بين القصتين إلا أن القسوة كانت عاملاً مشتركاً بينهما وأساساً للمقارنة.

رضيت بهذا الاستنتاج لما فيه من منطق وأمضيت ساعات على هذا الحال حتى غالبني النعاس أخيراً رغم مقاومتي القوية للنوم، بدأ مشهد

نوم ليـنا على سريـرها يـضمـحل شيئاً فشيئاً حتى أغمضت عيناـي تلقائياً و  
بدأ إدراكي لما حولي في الزوال تدريجياً، نمت نوماً عميقاً ولكن بدون أي  
حلم على الإطلاق، كان نوماً يحتاجه الجسد دون العقل.

وفجأة وقبل الفجر بدقائق

— شادي.. شادي

صوت ملائكي هادئ داعب روحي بمجرد الاستماع إليه، كالسحر  
الذي يأتي إليك ليسخرك الى هدف ما موجه، فتحت عيني لأرى ليـنا،  
جالسة على الأرض بالقرب مني، أخذت دقائق حتى أدرك الأمر، أبحر  
بنظري بين ليـنا وسريـرها، ولم أصدق..

دققت في وجهها جيداً ورأيت أن كل مظاهر التعب والإعياء قد زال  
أخيراً بعكس ما رأيته حينما كانت ملقاة على الأرض

— ليـنا؟ إنتي إيه إللي قومك من سريرك إنتي كويسة؟

— بفضلك آه الحمد لله

— فضلي إيه بس يابنتي إنتي خضتيني عليكي، لو كنتي تشوفي

منظرك وإنتي واقعة

ابتسمت

— أنا مش عارفة أقولك إيه بجد، أنا مصدقتش عيني لما قوميت.

وشوفتك قدامي على الأرض وكنت متأكدة إنك هتيجي أول ما أكلمك

— أنا معتملىش حاجة، الحمد لله إنك بخير



أذن الفجر ونظرت إلى ساعتني وقلت:

أنا لازم أقوم دلوقتني، يادوب أقدر أروح وأجهز نفسي علشان الشغل

- طيب أنا هعدي عليك نروح سوا مع بعض

- لا إنتني خليك متجيش إنهرده، ارتاحي كده ولا كده أنا ولياء

وطه موجودون وهنمشي الدنيا عادي، وعامة ياستني لو قلقانه هبقى  
أتابعك بالتليفون

- طيب ماتخليك على الأقل ناطر سوا مع بعض

- مرة تانية إن شاء الله أنا سايب ماما لوحدها ومتعود أفطر معاها

علشان متقلقش بس

- ياااه، حبيبتي، زمانها قاعدة وقلقانه كل ده

- لا خالص، أنا فهمتها إني هسهر نبع ناس صحابي وقتلتها تنام

متستناش إما أرجع

نهضت من مكاني و نزلت من الطابق العلوي إلى الأرضي متجهًا نحو

الباب وكانت ليّنا تصحبني أثناء ذلك، وعندما فتحت لي الباب وقبل أن

أخرج استوقفتني قائلة:

- شادي

- إيروه يا ليّنا أؤمريني

- ربنا يخليك ليّنا

ابتسمت لابتسامها وأردفت قائلاً:

- ألف حمد لله على سلامتك يا قمر

تركبتها وتوجهت إلى منزلي، فتحت الباب بهدوء، واطمأنيت على  
أمي لأجدها نائمة كما طلبت منها، وفي غرفتي أرحت جسدي المنهك على  
السريр وأخذت استرجع ذلك المنظر المرعب ومدى قلقي وخوفي عليهما،  
أتذكر إن والدي قال لي ذات مرة قبل وفاته بفترة وجيزة

- إحنا اتخلقنا علشان نعيش ونحب بعض، نقلق ونخاف على  
بعض، والموت في النهاية هو إللي بيفرقنا عن بعض، هي دي الطريقة  
الوحيدة علشان نعرف غلاوة و معزة كل واحد عزيز في حياتنا.  
قالها لي رغبة منه لكي يخفف وقع خبر وفاته و حزني عليه، الآن  
فقط وللمرة الثانية، أدرك المعنى الحقيقي لحكمة المرحوم أبي.

(7)

كان يومًا عاديًا في فندق هيلتون رمسيس، لم يكن ضغط العمل بالكثير، لكن الأجواء كانت مملة للغاية بدون ليانا، لم أر الأستاذ حسن سوى مرة واحدة وكان ذلك بفرض الاطمئنان على سير العمل من خلال سؤالنا، كان كالضائع في أرض جرداء دون ساعده الأيمن، كان أغلب الوقت في مكتبه.

أتى إلي إبراهيم في وقت كان الرئيسشن خاليًا من حضور النزلاء، صامتًا بدون أن يرن له هاتف، ألقى التحية على طه ولياء وقال:

- إيه يا عم جاي إنهرده لوحك ليه؟

- أبداً عادي يعني

- العادي إن إنت ولينا دايماً بتيجو مع بعض، إللي مش عادي

بقى إنك تيجي لوحك وهي متجيش، احكي لي كده بيني وبينك، في إيه؟

كان من إحدى طباع إبراهيم اللؤم في مثل هذه الأمور بحيث تبدو

الألغاز وخبايا الأمور كالكتاب المفتوح أمامه، أجبته:

- أبداً يا أبو خليل، اتصلت بيا الصبح وقالتي إنها تعبانة ومش

هتقدر تيجي إنهرده دي كل الحكاية

- نفسي أصدقك

- وهو إنت شاييني بلف وادور عليك

- يا بني لنا لما يبقى فيها مهما يكون فيها عمرها ما تسبب  
الشغل او ماتجيش لسبب أو لغيره، الفندق ده والريسبشن إللي إنت فيه  
ده بالذات هو كل حياتها، ده أنا بحكم شغلي معاها طول السنين إللي  
فاتت كفرد أمن هنا أعرف لنا تعمل إيه ومتعملش إيه، وده إللي يخليني  
أقولك إني مش مصدقك.

تدخلت لمياء في الحوار وقالت:

- بصراحة أنا معاك يا هيمما في إللي بتقوله ده مش من طبع لنا،  
الغريبة إنها متصلتش بيا كالعادة ولا بعتلي رسالة حتى  
إبراهيم قائلًا:

- مهو ده إللي بقوله لصاحبنا ومش قادر يقتنع إنت مخبي حاجة  
يا شادي؟

- وهخبي ليه يا جماعة، بصو أنا قلت إللي عندي وإللي حصل  
إنها قالتلي الصبح مش هقدر آجي، وأنا أخرجت إني أسألها عن السبب  
لكن المؤكد والطبيعي بقي إنها أكيد ولازم تكون اتصلت بالأستاذ حسن  
وقايلاله إنها مش هتيجي ومؤكد عارف السبب، فالي حابب منكم وعازب  
يعرف مكتب الأستاذ حسن ميتوهش.

رمقني إبراهيم بنظرة ساخرة مبتسمًا وهو يعلم تمامًا أنني أخفي شيئًا  
خيال عدم مجيئي لنا إلى العمل اليوم، وأنتدني نداء أخذ زملائه من أفراد  
الأمن له ليتركني أخيرًا من جلسة الاستواب تلك، وبقيت لمياء معي

وهي تحاول مرارًا وتكرارًا أن تعرف سبب غياب لينا

- هو إنتو اتصلتوا ببعض إمبراح؟

- لا

- طيب محاولتش تعرف مجتش ليه؟

- لمياء ارحميني يا أمي شوية إنتي بنت زيها وأكيد هتقولك

اتصلي بيها وانتهينا

في حقيقة الأمر، لم أرغب أن أبوح بشئ مما حدث للينا وعن بياتي في فيلتها، كنت خائفًا على سمعتها قبل سمعتي الشخصية، كنت حريصًا فعلا على أن تبقى صورتها قوية أمام زملائها ومديرها في الفندق، كان غيابها مؤثرًا فعلا، فقد كانت تملأ الأجواء بالحيوية والنشاط وتترك في نفوس من حولها آثارًا طيبة.

لا أتذكر كثيرًا من ذلك اليوم الرتيب، لكن أتذكر أنه في نهاية اليوم فاجئتني لمياء بمكالمة من لينا قالت لي فيها ناقلة عنها:

- استنوني بره الفندق هاجي آخدكم بعربيتي

كان الأمر بالنسبة للمياء كالغيث الذي أوله كقطرة فهي تعلم أنها سوف تشبع غرورها وتعرف التفاصيل منها، أما بالنسبة لي فقد كنت متشوقًا للاطئنان على صحة لينا وأراها تمشي وتجوب الدنيا كلها نشاطًا، انتهينا من العمل وانتظرنا أنا ولمياء خارجًا كما طلبت منا لينا، وعندما أتت بسياراتها وركبنا انهالت علينا لمياء بالأسئلة والاستفسارات قبل أن

تسأل لينا عن حالنا في العمل أو تلقي السلام حتى

— إنتي كنتي فين و متصلتيش بيا ليه؟

— إيه يابنتي؟ إيه؟؟ هتفضلي دبش لحد إمتة، ده السلام لله زي

ما بيقولو

لمياء ساخرة:

— طيب يا ستي أهلا يا لينا أخبارك إيه إنهرده يا حبيبتي؟

— هتفضلي هبله طول عمرك

نظرت إلي من خلال المرآة وقالت:

— إزيك يا شادي؟ أخبارك إيه إنهرده؟

— السؤال موجه ليكي إنتي، إنتي إيلي إيه أخبارك إنهرده؟

كان الجوار بيننا أمام لمياء كالرسائل المشفرة لذا فقد فهمت لينا قصدي

تماماً لتجيبني مبتسمة:

— أنا بخير الحمد لله، متقلقش علياً أنا تمام

أتلج هذا الرد قلبي، سألتها:

— هو إحنا رايعين فين؟

— هتشوفوا دلوقتي أنا عملاًكم مفاجأة أنتوا الاتنين

لمياء مستغربة:

— مفاجأة؟ مفاجأة إيه؟

— متتصربعيش كده زي عوايدك، اهدي على نفسك وقولي أنا

هديت.

وجدنا أنفسنا في منطقة الزمالك وتحديداً أمام مركب blue nile ،  
كنت أنا وولياء مستغربين من سبب تواجدها في هذا المكان ، وأثناء دخولنا  
المركب حاولنا سؤال لينا لكنها أبنت أن تجيب حتى دخلنا إلى مطعم دار  
القمر ونجلس في طاولة محجوزة باسمها و مخصصة لثلاثة أفراد فقط.  
قلت لها :

- في إيه يا لينا؟ إنتي جيبتي هنا ليه؟

- بصراحة كده أنا جايياكم إنتو الاتنين بالذات لسببين اتنين بس  
أولا بمناسبة الصلحة إلي بينكم إنتو الاتنين مع بعض ثانياً بمناسبة إني  
أخيراً لقيت صديق وأخ أستند عليه وهو إنت يا شادي، وغير كده أصلاً،  
حابه إني أغير جو وقلت أكيد منش قضي الوقت لوحدي فضربت عصفورين

بحجر

للياء قائلاً :

- إنتي بجد أحياناً بتعملي تصرفات محدش يفكر إنه يعملها

أصلاً الموضوع منش مستاهل التكاليف دي كلها

ربت عليها لينا وهي تنظر إلي :

- علشان معنديش أغلى منكم أعمل كده.

كانت الموسيقى تنبعث من المكان بشكل غير منقطع ، مفعي ومغنية  
وعازف أوج من نوع يافاها الحديث يؤدون كل ألوان الموسيقى العربية ،

خاصة اللبنانية ، كان المكان مكتظاً ورغم ذلك فقد كان الرواد من الرجال والنساء يجيئون ويذهبون كالفراشات بين الهمسات والرقص على أنغام الموسيقى والنجوم.

كنت أراقب الناس وهم يتناولون طعامهم ويشربون ما وضع أمامهم من مشروبات مختلفة أو حتى عندما تنهض النساء والفتيات من مختلف الأعمار ويبدؤن في الرقص وسط تصفيق حار من الحضور.

وأثناء كل هذا وذاك فقد كانت الأضواء رائعة بما يكفي لصنع شجرة عيد ميلاد هائلة في المكان، كانت كل طاولة أشبه بالموائد حتى طاولتنا الخاصة، كانت مزدانة بالمشهيات والمقبلات إلى جوار السلطات الزاهية، والفطائر والمناقيش اللبنانية التي حولتها نار الفرن إلى لون مابين البني والأبيض برائحة ساحرة، ناهيك عن ذكر المشويات الشهية التي أعدها الشيف ذي الأصول اللبنانية بمهارة تختلف عن أداء أي منافس مصري له. شيئاً فشيئاً أخذ الوقت في المضي قدماً حتى الساعة الثامنة مساءً. ولم تهدأ القاعة ولو ثانية واحدة، كنت أرى من خلال نوافذ المركب الكبيرة النيل وقد انتشح بسواد الليل وأرى مزيداً من السيارات والمتوافدين إلى المركب، كانت الطلبات تنهال على الحضور بشكل هستيري من شرب و طعام وخدمات أخرى مختلفة، بل وحتى أغاني خاصة تطلب من المطربين الشابين لتوجه إلى زوجته في عيد زواجه، أو لفتاة شابة في مستقبل عمرها يحتفل بها خطيبها ويعبر عن مدى حبها لها.



كان الجو قد امتلأ بالثرثرة والضحكات العالية حتى اعتاد سمعي على ضحكات النساء والرجال كإدمان المخدرات، وارى تعارفات عارضة تنسى لتوها في نفس الدقيقة، ومقابلات حميمية بين أصدقاء وغرباء مع بعضهم البعض ربما لم يروا بعضهم منذ وقت طويل أو ربما لا يعرفوا بعضهم البعض من الأساس.

أخيراً هدأت الموسيقى لتتوقف تماماً لترتاح حنجرة المغنيان، ولا أذكر اسم الشاب والفتاة لكن أذكر ان اصواتهما كانت رائعة في تأديتهما لأي أغنية، تبدأ جماعات في الرحيل لتحل مكانها جماعات أخرى، وفي كل جماعة أرى فتيات لا تقل أي ذرة من الجمال عن فتيات الجماعات الأخرى التي رحلت، ليصبح في لحظة فرح مجنون عبر بحر الوجوه تحت الأضواء المتغيرة أبداً.

كانت لينا وليام مندمجتين مع الأخوة يتبادل ثلاثتنا الأحاديث الجانبية، لكن في أغلب الوقت فقد كنا نستمتع بوقتنا، كانت لينا ترقص وتتمايل في جلستنا بشكل أنيق لا يلاحظه أي ناظر محيط سوى القريب منها فقط، أما ليام فقط كانت تفعل الشيء نفسه إلا أن نظراتها الأنثوية الحادة كانت تأخذ طريقها إلى ملابس النساء والفتيات، ومجوهراتهن، وطريقة جلستهن، بل وحتى أجسامهن وتضاريسها، كانت مبتسمة وسعيدة كونها في مثل هذا المكان الذي لا أعلم إن كانت قد ارتادته أو أي مكان شبيه به من قبل لكنني قد أجسست بغيرتها تجاه نظراتها من

النساء والفتيات رغم امتلاكها لكل مقومات الجمال.

في وقت من الأوقات وأثناء جلستنا وأحاديثنا فوجئنا برجل وامرأة قد أتيا إلي طاولتنا، جمال عبيد وهو رجل اربعيني قد يبدو من منظره العام أنه متصابي إلى حد ما، يدير مطعم **gu bar** وهو مكان يمتاز بالمعنى الحقيقي للحياة الليلية، أما المرأة فقد كانت في التاسعة والعشرين من عمرها تقريباً وربما أكبر بعام لست متأكداً فقد كانت من النوع الصعب توقع عمرها الحقيقي، اسمها سحر وهي راقصة شرقية، عملها كراقصة بين مركب **blue Nile** ومركب **maxim** المجاور، كانا على معرفة قوية بليلى، وحينما اقتربا كان لثأتهما لها بترحاب لم أر مثله مثيل، وبدا لي أن ليلياء تعرفهما أيضاً، أخذت سحر ليليا بالأحضان والقبلات قائلة:

- إزيك يا قمر واخشاني جداً إيه الصدف الجميلة دي؟

جمال عبيد مازحاً:

- على فكرة يا أستاذة ليليا في حق عرب ده لا اتصال ولا حتى أي

وسيلة تعبرينا فيها

ردت ليليا قائلة:

- مملش بقه مشاغل أنتم عارفين الفندق وشغله إللي مش بيخلص

أبداً، اتفضلوا وإقفين ليه، أعرفكم الأول شادي صاحبنا جديد معانا في

الفندق وطبعاً إنتو عارفين ليلياء

صافحني جمال عبيد بيده مرحباً بي أده سحر فقد اكتفت بأن ترمقني

بنظراتها الساحرة مبتسمة في سكون تام لا أكثر ولا أقل، حاولت سحر أن  
تفتح حواراً مع لمياء إلا أن لمياء لم تستلطفها

— ماشاء الله عليك يا ليمو، خستني جامد عن آخر مرة شوفتك

فيها يا مزة عيني عليك باردة

ابتسمت لها بملامح أكثر سخرية وقالت:

— أكيد مش هاجي جمبك حاجة سبنالك الحلاوة كلها

لم تعلق عليها سحر وكأنها فهمت ما ترمي إليه لمياء ببرود تام،  
وعلى إية حال فقد استنتجت من خلال ما رأيت أن لمياء تصبح أكثر غيرة  
وغيظاً حينما ترى جسم فتاة أفضل من جسمها أو تمتلك ميزة من مميزات

الجانبيهة الأنثوية لا تمتلكها لمياء، سألني جمال عبيد

— البشهندس بيشتغل إيه في الهيلتون؟

أجبتة:

— أنا موظف استقبال في الريسبشن مع ليننا ولمياء

— ومرتاح في الشغل؟

— أه الحمد لله

سحر بنفس طريقة مزاحها مع لمياء قائلة:

— مع أن شكلك مزيج واضح إنك قافل على نفسك زيادة عن

اللزوم

— ؟؟؟؟؟

- بلاش تبصلي باستغراب أنا بعرف أقرأ الناس كويس

تدخلت ليئا لتقطع عليها المسافة:

- سحر، بلاش شادي بالذات، ده تبغي ويخصني وملوش في الجو

بتعاك ده خالص

وسواء قبلت بمعرفة جمال وسحر أو لم أقبل، فقد شعرت أنه من

الضروري أن أصاحبهما بحكم أن المهنة بها من كنوز العلاقات الكثير،

وإلا لبدأت في الانكماش والانعزال وترك الانطباعات السلبية عني.

أصبحنا الآن خمسة وتبادلنا الأحاديث عن مختلف الأمور، لكن أبرز

ما كان في الحديث هو عن الاحتفالات التي كانت تقيمها ليئا، فسألها

جمال قائلاً:

- صحيح إيه أخبار حفلاتك؟ مش هتعملي حفلة قريب؟

- مش لما يكون في مناسبة الأول؟

- بس أوعديني أن تكون الحفلة عتدي في البار

- هتصل بيك، عامة أنا حابة الحفلة الجاية يكون في اختلاف

وتغيير

ثم وجه كلامه إلي وأردف:

- والأستاذ شادي بقى ليه في جو الحفلات وال night life ولا

إيه نظامه؟

بكل جرأة أجبتة:

- طالما الحفلة تخص لنا فيه لا؟
- عظيم عظيم
- سحر وبصوت ناعم يملؤه الدلع :
- خلاص، تعالى وليك علياً أرقصلك إنت مخصص بس
- لم تشترك لمياء في أي من أحاديثنا هذه لكنها اختارت أن تفتح حواراً يخص سحر بشكل غير مباشر ، ليبدو الجو مشحوناً بكيد وغيره النساء ، ويكون الحوار النسائي ثلاثياً بين لنا ولمياء وسحر ، بينما بدا جمال عبيد ذلك الرجل المتصابي مستمتعاً جداً بما يسمع من هذا الحديث النسائي ، قالت لمياء بشكل أكثر سخرية مما سبق :
- أنا مستغربة بضراحة يا سحر إنتي مستحيلة جو المنافسة في شغلانتك دي إزاي؟
- ليه يعني؟ عادي
- يعني ، شايقة إن السوق كل يوم فيه جديد ، والمواصفات كل مدى بتحلى في عيون الناس وإنهرده إنتي حلوة بكره إنتي منسيه
- وهو كل من لبست بدلة رقاصة بقت رقاصة
- الله ينور عليك يا سحر أدي إنتي قولتيها
- قصدك إيه؟
- قصدي يا حبيبتي خدي بالك شوية ، أي رقاصة لو خزت بس حته من جسمها ممكن تاكل الجو منك خاصة إن بقت بدل الرقص اليومين

دول بتبين حاجات في عيون الرجاله مش فيكي

- فشر، يبقى إنتي لسه متعرفنيش، ما تتكلمي يا لينا

فهمت لينا ما ترمي إليه صديقتها لمياء فأجابت سحر وهي ترمق لمياء  
بنظرة وكأنها تطلب من لمياء أن تتوقف

- أنا شايفة أن لكل واحدة في مهنتك ليها أماكنيتها وليها  
جمهورها ومش شايفه إن فيكي حاجة غلط، جسمك مافيهوش غلطة،  
وكفاية إنك بتتطلبي في أفخم الفنادق والمراكب السياحية، هي بس لمياء  
بتهزر معاكي شوية متقصده حاجه

كنت أشعر بهزة قدم لمياء وعصبيتها من تحت الطاولة، كانت تجر  
على أسنانها وتبتسم لكن ملامحها كانت تفضحها دائماً، يبدو أن هناك  
تاريخاً غامضاً بين الاثنين، مجدداً تحاول سحر أن تتوود إلي، إلا أن  
هذه المرة بدا تأثير لمياء على وجهها جلياً و واضحاً بحيث كنت أستطيع  
أن أرى الضيق والغضب من خلال عينيها، قالت:

- وأنت يا شادي إيه رأيك؟

حاولت الهرب منها:

- معلش أعزورني أنا مليش في الحوارات دي، أنا هستاذنكم

دقايق وهرجلكم تاني

ضاق صدري وشعرت أنه أطبق علي، ولم أحتمل هذا الجدل  
اللانهائي، تركتهم وخرجت من المركب لأقف على طرف الجسر الذي

يربط المركب بالشارع المواجه له ، تنفست الصعداء ، ولم أصدق أنني هربت أخيراً من هذا الاشتباك العنيف الصاخب ، كان صوت ارتطام مياه النيل بالمركب كالأفيون المخدر لأعصابي ، وهناك عند الطرف الآخر من الجسر ، لا بد ان همساتنا في الأعلى قد ساهمت بنصيبها من الأسرار أمام الناس لأرى نفسي ، كنت في الطرف الآخر أيضاً ، في الداخل و الخارج ، الداخل ينساق وراء نشوة الحياة ، أما الخارج فقد سيطر عليه النفور من تلون الحياة واختلاف أوجه البشر ، كنت أنظر إلى نفسي بتناقض تام كما أنظر إلى نفسي في المرآة .

أفقت من شرودي وهلوستي ، وعدت إليهم مرة أخرى ، هذه المرة هدأت الأجواء المشتعلة ، كانت لنا تضحك مع جمال عبيد ، ولياء تتبادل الأحاديث الودية مع سحر وكأن ما كان لم يحدث بينهم ، سبخان مغير الأحوال ، حتى أنهم كانوا يلتقطون الصور بهاتف لنا النقال ، وحين جلست مكاني قالت لنا في بهجة :

- شادي تعالى نتصور سوا مع بعض

كنت أجلس سابقاً بجانب لياء بينما كانت جلسة جمال وسحر جعلت لنا تتوسطهما أول مرة ، فتبادلت مكان جلوسي مع سحر لأجلس بجوارها ، التفت زراعها بزراعي لنبدو كالمترولين حديثاً ، واقتربت مني بما يكفي لأشعر بدفئتها ، حتى شعرت بروحها تعانق روحي ألفة ومودة ، والتقطت الصورة ، كانت تلك الصورة هي الأولى التي جمعتني بها ، ومن

ثم أخذت تلتقط لنفسها صور السيلفي.

أخذت ضحكاتنا تعلو وتعلو، وللمرة الأولى أشعر بأنني قد تحررت أخيراً من قيود السجن الذي كنت أعيش فيه، شعور مختلف حينما تجد نفسك وسط أشخاص كهؤلاء، على الرغم من اختلافهم عنك، يشعرونك بالسعادة، تشعر بصدق قلوبهم، لا تجد طريقاً للنهم فيهم أو بينهم، أياديهم تمتد إليك رغبة في الصداقة، ترغب في أن تحاك ذكرياتك معهم، إن كنت وحيداً، ستدرك جيداً ما قد تغير بداخلك.

انتهت حفلتنا الصغيرة أخيراً وسط وعود متكررة بأن نلتقي معاً مرة أخرى، رحلنا أنا ولينا ولياء سويّاً لنقلً لـلياء إلى بيتها في الدقي ومن ثم نذهب سويّاً إلى بيوتنا كما تعودنا دائماً، أرادت لينا أن تطمئن على مقدار سعادتي بما صنعت هي من بهجة فساءلني:

— إيه رأيك في القعدة دي؟

— بصراحة كانت جميلة جداً بقالي زمان فعلاً متبسّطتش بالشكل

ده... بس صحيح... هي مالها لـلياء قلبت أول ما سحز جت وقعت معانا ضحكت:

— هي لـلياء كده دبش، أقولك يا سيدي، سحر دي بتيجي ترقص

في الأفراح عندنا في الفندق، لما حد بيطلبنا بتيجي مبتأخرش بصراحة،

لـلياء مشكلتها حاجة إننا مفكرة نفصّلها البنت الجميلة الوحيدة في السالم

كله وإنها مزاجها ما لبست وغيرت في لون شعرها أو استايلها إن الرجالة



مش هيبصوا غير ليها وبس علشان كده تلاقيها دايماً بتحاول تتجمل قدام  
النزلاء في الريسبشن، لفت نظر يعني، لما جت سحر أول مرة واتعرفت  
عليها من يجي سنة ونص تقريباً مقولكش على الحريقة النفسية إللي  
كانت فيها لمياء، طبعني إن رقاصة تلبس بدلة رقص وتبين تحت من  
جسمها زي ما إنت فاهم وعارف، لما لقت الاهتمام ده بيها قبل وبعد  
شغلها بقت مش طايقاها خالص، من الآخر لمياء شكلها حلو مش وحش  
خالص كبتت عندها إمكانيات عالية جداً بس هي حقة الغيرة والدبش في  
الكلام إللي جايهاها ورا. بس قولي صحيح إنت ليه كنت متغير مع سحر؟  
لما جت تكلمك إنت سبتنا وقمت ومشيت رحت فين؟

- بصراحة يا لينا مليش في الحوارات دي يعني الغيرة الحريمي  
والأمور دي وحسيت صدري قفل، من ناحية تانيه سحر كشخصية يمكن  
تكون ظريفة بس أنا أول مرة أقعد مع رقاصة بالقرب ده، كنت أشوف  
الرقاصات من بعيد ده لو شوفتهم.

- ممممممم طيب رحت فين حضرتك بقه؟

- كنت عند بوابة المركب من بره كنت محتاج أشم شوية هوا بس.  
نظرت إني بلامحها الصافية ليعود نظرها إلى الطريق وهي تقود  
سيارتها وأردفت:

- إنت إنسان متسامح من نفسك جداً ده سبب قوي خلاك. تسببنا  
وتقوم لما شوفت التأتش إللي حصل بين لمياء وسحر، بس أنا عايزة أقولك

على حاجة ، متفعلش على نفسك ، انطلق وعيش حياتك مع الناس ، اعرف  
الناس واعمل معاهم علاقات .

كانت تدفعني من وراء كلماتها تلك إلى حب الحياة ، ومن ثم ، قالت  
كلمات أخرى بدت لي مألوفة

— ومهما حصل ، حب على قد ما تقدر ومتبخلش على قلبك ،  
واكره قد ما تكره ، ولوم القدر إذا جارت عليك الدنيا في يوم من الأيام و  
اصبر ، لكن لما هتوصل للنهاية لازم تسامح من قلبك

لم أتصور اللحظة إنها سوف تقول لي وصية أمها لها ، ولكن بدا لي  
حينئذ أن لكل وقت في حياتها وعمرها محطة ، تتوقف عندها حسب  
الموقف وتستحضر الذكرى لتأقلمه حسب الموقف الذي تعاصره ، كانت هذه  
الحفلة الصغيرة هي السبب الحقيقي وراء التغيير في حياتي كلها ، بعد  
هذه الحفلة وبسبب معرفتي بلينا وقربي من شخصها منذ البداية نسيت  
أنني كنت منبوذاً في حياتي الماضية .

— تعبت من الكتابة ولا لسه يا دكتور؟

ينظر الدكتور مصطفى إلى شادي وإلى نظراته، يضع القلم جانباً ويفرك يده ويبسطها مراراً وتكراراً حتى يريحها قليلاً، وانتهاز الفرصة قائلاً:

— لا لسه، قلتك أنا مش ورايا حاجة، قاعدين لحد الليل بطوله في العيادة، الحقيقة حكايتك على قد مافيهما وجع و فرح على قد ماهي غريبة، بالنسبالي على الأقل

نظر شادي إلى الدكتور مصطفى صامتاً ليردف الأخير كلامه:

— واضح أن العلاقة بينكم كانت بتطور بشكل أسرع مما كنت أنت متخيل، وبدأت تدخل معاها عالم وتشوف ناس عمرك لا شوفتهم ولا في يوم من الأيام كنت تتخيل إنك تبقى جزء من العالم ده.

— فعلاً؟ إيه دليل كلامك؟

— دليلي...

يعتدل في جلسته مستكملاً:

— صحيح إنت كنت متردداً في البداية، وده كان ملحوظ بشكل كبير جداً، أنت كان عندك الاستعداد أنك تخرج من الدنيا بتاعتك وتخش الدنيا تانيه خالص بس إنت مكنتش عارف، ليننا شافت ده فيك وببساطة شديدة جداً حظتك على أول الطريق، وهنروح بعيد ليه؟ مش هي قالتلك

متقفلش على نفسك اطلق وعيش حياتك مع الناس، اعرف الناس واعمل  
معاهم علاقات، ده كان بالنسبالك باب علشان تدخله من أوسع أبوابه.

- طيب والإحساس المتناقض إللي حسيته يومئها؟

- مجرد صراع داخلي كان جواك، شايف انه طبيعي جداً، إنت  
لاقيت نفسك في بيئة تانيه مع ناس مختلفين عنك 360 درجة، مجتمع  
غير مجتمعك، إنت كنت زي إللي وقف أدام مراية وشاف شخص غيره،  
واحد عايز يغير من حياته ويخرج من سجنه ويشوف دنيا ويعيش مع  
الناس، يلاقي حزن أو ظهر شخص يكون ملجأ ليه، والتاني أو بمعنى  
أصح صورتك إللي وقفت قصادك الناحية التانية، كان مصمم ومتمسك  
بحياته، زي الشجرة القديمة قدم الزمن إللي جذورها معشقة في بطن  
الأرض، لا عايز تعرف حد ولا تعيش مع حد، وهو ده الخوف إللي أدى  
إنتك تشوف نفسك اتنين، مش واحد.

وجد الدكتور مصطفى شادي يستمع إليه في صمت ولا ينبس بأي  
كلمة، وكأنه يراجع ما مضى من الزمان، سألته:

- بس قوللي، جمال عبید وسحر، جمال ده بالذات كان إيه شكل  
العلاقة بينكم أول ماشوفته في المركب؟

- كل إللي أفكره أنه كان واحداً من ضمن رجاله كتيرة قوي  
نفسهم يقربوا من تينا، لما قعد جيبها حميت أنه منهار داخلياً من شدة  
إعجابه بيها، مقدرش أنتر وأقول إنني ارتحتله وهو ارتحلي، بس

حسيت إنه كان عايز يجرنى لدنيته بأي شكل

- لما سألك وقالك ليك في ال night life؟

- بالضبط كده

- طيب وسخر؟ من كلامك عنها واضح أنها كانت بتحاول تتودد

ليك.

- خفت بصراحة

- علشان هي بتشتغل رقاصة؟

- يمكن، بس لان عمري ما لاقيت واحدة عندها الجرأة في أنها

تتعرف على حد بالشكل ده

- طيب ما لينا عملت كده معاك، وعرضت عليك إنكم تكونوا

أصحاب وإنتم قبلت، أنا شايف إنه مافيش فرق بين الاتنين سوى بعض الاختلافات الشخصية بين الاتنين.

صمت شادي عاجزاً عن الكلام ليستطرد الدكتور مصطفى قائلاً:

- مفكرتش ليه لينا قالتلك كلامها ليك في العربية وإنتم مزوجين؟

لأنها هي نفسها شافت التناقض والصراع اللي جواك بعنيها بس يمكن

محببتش تقولك صراحة، حب الناس واعمل معاهم علاقات، كلامها كان

واضح جداً ليك ويحمل معاني كثيرة جداً، إنت بس مكنتش واحد بالك

بدأت علامات الإنفعال تظهر على وجه شادي ويقول بعصبية مستترة

وراء هدوئه:

- إنت شايف إني غلطان؟

- شايف إنك استسلمت للواقع في الآخر، بدليل إنك قولتلي، إن كلامها ليك والحفلة الصغيرة إلي جمعتكم ببعض كانت السبب في تغيير حياتك.

بدأت الثورة في داخله تهدأ وقال:

- عندك حق، أنا فعلا استسلمت

- طيب، بما ليئا صالحت لمياء بيك، حسيت إن من تصرفها ده هدف؟ ، أقصد، بغض النظر إنك كنت تخصها، هل كانت بتقربكم ببعض؟

- يمكن، أحياناً كنت بحس لمياء بتقرب وأحياناً كنت بحسها بتبعد، لمياء كانت جريئة زيادة عن اللزوم، غيورة وعندها غرور، عديمة صبر، فظة في طباعها وعنيفة جداً، رغم إن إلي يشوفها يقول غير كده، ويمكن ده سبب عدم ارتياحي معاها من البداية.

- بس إنتو اتصالحتم و واضح إن كان في بادرة أمل بينكم

- ده صحيح، بس في نفس الوقت مكنش عندي جرأة إني أخش في علاقة عاطفية تانية، مش بعد علاقتي بخطيبتي من سنين.

- يعني كمان على المستوى العاطفي كنت قافل علي قلبك، تمام،

تمام، إنت كان عندك أياميها كام سنة؟

- 28 سنة

- محاولتش تحب بعد تجربة مع خطيبتك الأولى ليه؟

صمت مجددًا، ومع صمته هذا يصمت الدكتور مصطفى انتظارًا لإجابته على سؤاله

- خفت إني قلبي يداس عليه ومعاه مشاعري وإحساسي، حسيت إني لو حبيت بجد وبإخلاص، هخسر، وساعتها هخسر نفسي كبني آدم تجردت مشاعره منه غصب، اكتشفت إني مش قد الحب، ولا عمري هكون من أهله، علشان كده، اخترت إني أقفل على قلبي وأعيش وحيدًا أشرفلي بميت ألف مرة على إني أعيش مع واحدة وأتعذب بسببها، كفاية إني أتعذبت مره، والمره دي كانت كفاية بالنسبالي.

- مع إن واحد غيرك في شغلانتك دي كان هيشوف بنات كتيرة، معقولة قلبك مشفش ولا واحدة

- واحد غيري يا دكتور مصطفى، واحد غيري، مش أنا خالص، شوفت آه، مش هنكر إني مشوفتش، بس المسألة مسألة خوف، لأن صدقني مكنتش هقدر أستحمل أخسر للمرة الثانية

- شوف أنا هقولك على حاجة بخصوص الحب، إللي واضح إنك نسيتته ودفينته مع قلبك، الحب هو أنك تشعر بالسعادة التي تغمرك تجاه حد تجذبك روحك ليه. وهو أن قلبك يبقى مليان سعادة ويوصفها بالتعبير والكلام، هو أنك تحسن بعطف يخرج من جواك وكفاية إن ذكرياتك تبقى مع حد بتحبه إللي لما تسمع صوته تحسن إنك تميز تطير وتعلو، وتعلو

فى سماء الخب؁ تلمس القمر و النجوم وساعتها السهر فى ضى القمر  
هيبقى مصير جميل.

وجد الدكتور مصطفى مريضه يتجاوب مع كلامه الأخير شيئاً فشيئاً؁  
علم أنه قد نجح فى علاج شئ ما مكسور فى قلب شادي؁ بخلاف مشكلته  
مع إيمان الخمور والاكتئاب النفسى؁ علم أنه قد أعاد ميئاً مفدوراً إلى  
الحياة مرة أخرى.

- تعالى نرجع للماضى تانى.



كان الأستاذ حسن في مزاج جيد لم أعهده فيه مسبقاً، كان العمل يسير بشكل ممتاز وعلى ما يبدو أتى بثماره ليحصد مديرنا حصاده، لم أكن أتدخل في شؤونه كثيراً فقد كنت أنفذ ما يطلب مني فقط، وفي أحد الأيام دعاني أنا ولينا في جلسة خاصة بعيداً عن روتين العمل في الكازينو، كانت تلك أول مرة أدخل فيها إلى كازينو.

عرفني الأستاذ حسن إلى رجل يقال له في أرجاء المكان الرئيس جورج وهو رجل في نفس عمر الأستاذ حسن و نفس المظهر إلى حد ما فيما عدا رخامة الصوت والطبع الحاد الحازم طوال الوقت

- حسن

قالها الرئيس جورج بحفاوة وهو يصفاح الأستاذ حسن

- ده الرئيس جورج يا شادي كبير الكازينو هنا راجل مافيش منه

- إبيه يا عم حسن إنت ماتجيش إلا في المناسبات وبس

- أهو أديني جتلك أهو ياعم الرئيس قلت أهو نسمع شوية مازيكا

ونتبسط وأشوفك وبالمرة أقضي وقت مع الشباب الحلوين دول

- بس الأستاذ معرفشوش

- ده شادي من أكفئ الموظفين عندي، جديد معانا بمبكالوش فترة

صغيرة

نظر إلي من وراء نظارته وقال:

- أهلا وسهلا

و أردف بنفس الحفاوة:

- الجميلة ليينا منورة الكازينو إنهرده إيه الجمال ده كله؟

- أهلا يا أستاذ جورج

- اتفضلوا يادي النور

قادنا الرئيس جورج إلى طاولة حيث نستمتع بالأجواء وفي نفس الوقت نكون بعيداً عن لعب القمار والمقامرين، جلسنا و حصلنا على واجب الضيافة منه وانصرف هو لمتابعة أجواء عمله، كان الرئيس جورج رجلاً غامضاً، يتابع عمله بنظرات حادة وفي صمت تام، تراه للمرة الأولى فلا تفرقة عن رجال العصابات والمافيا، لكنه في الواقع كان غير ما يتركه من انطباعات الشئ الوحيد المؤكد فيه إنه كالصقر، أي سرقة أو ألعيب خفية مصيرها الكشف، وربما عمله هذا أكسبه حدة الطباع لا أكثر.

لا أتذكر الكثير عن تفاصيل جلسة الأستاذ حسن، لكنني تأكدت في هذه اللحظة عزيزياً أنني أصبحت قريباً من هذا الرجل بنفس درجة قرب ليينا منه، كانت ليينا يومياً في مزاج حسن حتى أتاها صوت رنات هاتفها النقال ليتغير مزاجها كلياً، كانت ترفض الكلمات مراراً وتكراراً حتى استأذنت منا و تركتنا نباحق مستسلمة لهذا القتل المجهول المصير على مكائنها.

وكانت تلك فرصة الأستاذ حسن للدردشة معي :

- جميلة ليينا دي ، فعلا بنت مجتهدة كده وشطارة ومافيش

زيها ، مش كده ولا إيه؟

- آه فعلا عندك حق

سألته للمرة الأولى عنها :

- هو حضرتك يا ريس تعرف ليينا بقالك قد إيه؟

أجاب برضاً تام :

- من كام سنه فانت ، أنا اتشرفت بمعرفة ليينا بعد تخرجها من

الجامعة مباشرة ، لما قابلتها عرفت أني قدام بنت طيبة المنشأ والتربية و

بعد ما اتكلمت معاها لمدة ساعة ونص قلت لنفسي ليه متبناهاش مهنيًا

وأفتخر بمعرفتها وأعرفها على مراتي وأولادي كمان ليه لا؟ ليينا من

أشطر الموظفين وأنا متأكد أنها لو استمرت على كده هيبقى ليها شأن في

مجال السياحة ومركز مرموق كمان

- أنا كمان متأكد من ده

شرب الرشفة الأخيرة من فنجان قهوته وأردف :

- أنا مراقبك من ساعة ماجيت تشتغل معانا ، ليينا متبنيك

لدرجة لا تتخيلها على المستوى المهني والشخصي مش عارف ليه

بصراحة ، إللي أعرفه ومتأكد منه إن إنت أكيد حد مميز ، وأقدر أقول إن

موظفني كسبوا حد محترم زيك ، وبالناسبة أقترح عليك تجهز هدية

قريب ليها لأنني هرقياها رسمي يوم عيد ميلادها إلبى هيكون بعد أسبوع  
إن شاء الله بس متقولهاش خلياها مفاجأة

- أكيد طبعا، بس هي مش النائبة لحضرتك في الترتيب الوظيفي؟

- آه ده حقيقي، بس ده كان بشكل غير رسمي، دلوقتي هيكون

بشكل رسمي، ولينا تستاهل.

قطع حضور لينا نقاشنا الصغير، بدى لي حينما جلست على الكرسي  
أمامي أنها ليست على ما يرام، تلك المكالمات لم تكن خيرا أبدا، حاولت  
الاندماج معنا في الحديث والاستمتاع بالأجواء، راسمة على وجهها  
ابتسامة، لكنها كانت مصطنعة، لم تكن نابعة من القلب كما تعودت  
منها.

لم تتحدث لينا كثيرا فقد كانت شاردة طوال الوقت، أما الأستاذ حسن  
فقد كان يتحدث معي في حين ويتابع بعينه موقع الرئيس جورج، حتى  
عثر عليه وقام من مكانه قائلا برزائة:

- أنا هسيبكم إنتو الاتنين مع بعض شوية، إنتو جيل الشباب أما

أنا فمن جيل تاني خالص، هروح أقعد شويه مع الراجل العجوز إللى  
اسمه جورج ده.

صافحنا ورحل ليأخذ الرئيس جورج من يده ويختفي عن أنظارى،

نظرت إلى لينا محاولا قراءة خريطة بلامحهما المعكرة لتقاطع نظراتى  
قائلة:

- مافيش حاجة يا شادي

استمريرت في النظر إليها وقد علمت من خلال نظرتي إليها أنني لا  
أصدقها، أردفت:

- أنا عارفة إنك مش هتصدقني، هقولك لما نروح ولا إيه رأيك  
تيجي نتعشى عندي في البيت؟

- موافق بس على شرط تحكي لي الصراحة كلها

لم تطق هي الجلوس في الكازينو أكثر من ذلك، كان تأثير تلك المكالمات  
التي أجعل تفاصيلها قوياً عليها، لتعبر على وجه ليلاً نظرة حزن غير  
مألوفة، حتى وصلنا إلى بيتها أخيراً، جلسنا في الصالون، وانتظرت حتى  
تبدأ هي بالكلام، في البداية لم تكن تدري من أين تبدأ لكنها قالت بعد أن  
أخذت نفساً عميقاً:

- كان والدي إلبى بيكلمني

- والدك؟

- آه والدي، بعد سنين جاي يفتكرني دلوقتي

- مقلكيش هو فين طيب؟

- مهتمتش إني أعرف هو فين قد ما كنت مهتمية هو عايز إيه

مني

بدأت علامات الضيق تظهر عليها وقلت:

- طيب اهدي بس وقولي لي هو قالك إيه؟

- عايز يعرف مكانى فين ويتقرب منى بعد ما قطع بيا طول فترة  
مرض ماما الله يرحمها حتى بعد وفاتها بسنين، طول السنين دي مسألش  
عليها غير مرة أو مرتين لا يعرف عنى حاجة ولا أعرف عنه حاجة،  
تصدق يا شادي، حتى وهو بيكلمنى سكران ومش في وعيه وسمعت صوت  
واحدة ست بتضحك جمبه، زي ما يكون مصمم يعذبني ويعذب ماما في  
قبرها

- طيب متديلة فرصة واقعدي معاه واسمعيه ولو لأخر مرة  
- عمري ماهعمل كده معاه يكفي أنه طول السنين إللي تخلى عنى  
فيها هو كان بيعرف بشكل أو بآخر النجاحات إللي كنت بحققها في  
حياتي وفي شغلي وكل ده وبطولي ولوحدي

في تلك اللحظة بالذات تذكرت ما قالتة لي لمياء بشأن والدها  
(الراجل أبوها ده على قد ما ربنا إداله من علم ومال إلا إنه كان بتاع  
ستات ومكنش فايق لبيته باختصار فلوسه مكنتش لأهل بيته زي ما إنت  
متخيل، كان كل ما يرجع الشغل أيام ماكان عايش في القاهرة يرجع بيته  
ميقعدش مع مراته وبنته ربع ساعه على بعض ويأخذ بعضه وينزل،  
بيروح فين ومع مين معرفش)

(مكنش أبوها بيسأل كتير عن مراته طول فترة مرضها يعني لو في  
الشهر مره يبقى كده كتر خير، اتوفت طنط ووصله الخبر وهو في سفره،  
مكلفش خاطره يسأل أو يجي حتى دفنة مراته وبنته الوحيدة أهملها من

ساعة الوفاة لحد يومنا هذا )

مهما هربت من الماضي يعود ليغرز مخالبه فيها فتتألم، وجدت ليينا وقد غرقت عيناها بالدموع، كانت تبكي بكاء مكتومًا لتحاول أن تبدو متماسكة أمامي ولو قليلا، اقتربت منها وتناولت بيدي منديلا كان مطويًا في جيبي ومسحت دموعها من على خديها، لتنهار أخيرًا، وبشكل لا إرادي وجدت نفسي أحتضنها، كانت تلك أول مرة أحتضن فيها فتاة بهذا الشكل، وبالنسبة ليينا كان قد مضى عليها زمن لم يحتضنها أحد بعد وفاة والدتها.

روت لي تفاصيل الخلاف بينها وبين والدها وكيف تخلى عن والدتها في عز مرضها حتى وفاتها، سردت كل التفاصيل التي قالتها لي لمياء وتظاهرت وقتها أنني أسمع هذا الكلام لأول مرة، الرجل لا يعلم مكان ابنته، كل ما يملكه هو رقم هاتفها وبريدها الإلكتروني، لا يعلم عنها سوى القليل ولا تعلم عنه أي شئ، في أي بلد هو ومع من يعيش، هل تزوج أم مازال أعذبًا، أو بالأحرى من هي المرأة أو الفتاة التي يقضي معها ليلته كل يوم، قالت لي إنه لا يرسل أي مال لها وأنها تعيش من خلال وراث والدتها و مرتبها الشهري الذي تتقاضاه من عملها في الفندق، وكل من تربطه صلة دم بها يعيش في دنياء ولا يسأل عنها أيضًا، لذا كان قرارها هو أن تمضي قدمًا في حياتها ولا تلتفت إلى الماضي قدر الإمكان وتعيش في وسط الناس وتكون منهم وهم منها إلى أن تجد من تراه مناسبًا

ليكون قريباً منها كوضعي أنا الآن معها، وأتذكر أنها قالت لي :

- تصدق، أحياناً لما بقعد مع نفسي وافكر كل حاجة بعد وفاة ماما والصعاب اللي واجهتني بضحك مع نفسي وأقول هو أنا إزاي خرجت من المواقف دي كلها ولسه واقفة على رجلياً؟

طلبت منها أن لا يتحدث عن الموضوع أكثر من ذلك، وأن تنساه نهائياً وإلى الأبد برغم أن شيئاً ما بداخلي يخبرني أنني سأقابل والدها الدكتور شريف يوماً ما، صعدت إلى غرفتها في الطابق العلوي لتبدل ملابسها وانتظرتها في الصالون، وفي بيت ليلى كنت أشعر بالراحة النفسية حيث كنت أحياناً أتقل من مكان إلى آخر في فيلتها ولكن بحدود، كانت جلستي المفضلة في بيتها هي الحديقة، وحين نزلت، دخلنا سوياً إلى المطبخ وأعددتنا عشاءنا، وبرغم أنني لا أملك نية الصبر لإعداد الطعام حتى ولو كان بسيطاً إلا أن ذلك تغير معها، فكنا نضحك ونتبادل الأحاديث وأمزح معها حتى تدمع ضحكاً، نعم، لقد استطعت أن أرسم على وجهها الابتسامة الراضية وأن أجعلها تنسى تفاصيل المكالمات مع والدها.

و فجأة شخص مألوف اتصل بها

- ألو أيوه مين معايا؟ أحلام إزيك يا حبيبتي عامله إيه دلوقتي؟ ؟

أحلام، كنت قد قاربت على نسيان تلك الفتاة وما حصل معها ذلك

اليوم

- أنا بخير الحمد لله، والله أنا مش ناسياكي خالص أنا طول



الفترة دي كنت منتظرة إنك تتصلي بيا وحتى نسيت آخذ رقمك للآسف، تمام، أنا كنت متوقعة إنك هتعملي كده، أنا كلمت حد صديق ليا مدير مطعم في مركب من المراكب النيلية وهو وافق على طول، لا متقلقيش أنا ياما عملت خدمات ليه وهو ماصدق إنه يردي خدمة صغيرة إنتي بس روعي للعنوان إللي هدهولك واسألني عن الأستاذ حسام وقوليله إنك من طرفي وهو هيتصرف بالباقي، أكيد هشوفك قريب وقريب جداً كمان بس توعديني إنك تبعدي عن الأمور إياها إنتي فهماني طبعاً، إن شاء الله،  
باي

أسندت رأسها على ظهر الكرسي، أغمضت عينيها، وأخذت نفساً عميقاً وقالت في رضا تام:

- الحمد لله رب العالمين، تصدق يا شادي، كنت منتظرة إن أحلام تتصل بيا من ساعة إللي حصلها، الحمد لله كابوس وانزاح سألتها:

- هي سابيت شغلها في الكباريه؟

- آه سابته تاني يوم الموقف إللي حصلها راحتلهم وسابيت الشغل

خوفاً على نفسها ومن الرجل إللي ضربها.

- وهي عامله إيه دلوقتي؟

- بتقولي تمام الحمد لله، انتظرت لما الكدمات وآثار الضرب إللي

في جسمها تزوح شويه علشان تقدر تتحرك، وبتدور على شغل، والحمد

لله إنها افتركتني

- ودي هتشتغل إيه في المركب إللي بتقولي عليها؟

- جرسونه في مطعم دار القمر في blue nile ، كنت كلمت

المدير هناك من فترة عنيا والراجل وافق مردليش أي طلب بصراحة.

ذكرني موقفها هذا بحكمة قيلت لي ذات مرة إن بعض الناس يتأفف

من لجوء الناس إليه لقضاء حوائجهم خاصة إذا كان ذا وجهة أو سعة من

المال ولا يدري أن من كان في حاجة أخيه كان الله في حاجته ، وأن الله في

عون العبد ما دام العبد في عون أخيه فلئن تقضي لأخيك حاجة كأن تعلمه

أو ترشده أو تحمله أو تقرضه أو تشفع له في خير أفضل عند الله من ثواب

اعتكاف شهر كامل.

بعد أن أنهت لنا مكالمتها الهاتفية مع أحلام شعرت بسعادتها تجاه

تلك الفتاة رغم أنها قد تعلم حجم الشبهات التي قد تطالها أيضًا من

ورائها ، خاصة أن عالم فتيات الليل و الكباريهات عالم مظلم تمامًا

كالكهف العميق الذي إذا ما دخلت إليه لا تخرج منه أبدًا بل تسقط في

أعماق أعماقه حتى تصبح من ساكنيه أخيرًا ، كان في داخلي قليل من الشك

والتوجس تجاه أحلام ، حتى يومنا هذا لا أستطيع أن أنسى مظهرها أول

مرة حينما دخلت من باب الفندق بصحبة النزيل الكويتي ، ملبسها ،

مشيتها ، طريقة كلامها ، صوت ضحكتها ، كانت هيئتها تلك قد طبعت في

ذاكرتي صورة فتاة الليل كما يجب أن تكون ، وكنت أخشى أن تعود أحلام

لتلك الليالي الحمراء مجدداً فيكتشف أمرها من قبل زملائها الجدد ومديرها في العمل وبالتالي تتوجه الأنظار تجاه ليلى، ولكن من ناحية أخرى وضعت نفسي مكان ليلى وقلت في داخلي:

( اعمل الخير وارميه البحر )

وافترضت الخير لأخر لحظة فيها، ربما وضع الله ليلى في طريق أحلام حتى تضعها في الطريق الصحيح وتكسب قوت يومها من عرق جبينها بالحلال بعد أن كانت ستكسبه أول مرة من جسدها العاري بالحرام.

لم أجادل ليلى كثيراً بشأن أحلام وتركتها بعد أن تبادلنا أحاديثنا كالمعتاد حتى منتصف الليل.

وصلت إلى بيتي، ودخلت إلى غرفتي، وقبل أن أخلد إلى النوم، مفاجأة غير متوقعة كانت تنتظرني على صفحتي الشخصية في الفيسبوك، دائماً ما يثيرك الفضول حينما ترى تلك الإشارة الحمراء وتكتشف الشخصية التي ترغب في إضافتك إلى قائمة أصدقائها بدون أي سابق معرفة، كنت قد نسيت حقاً ذلك العالم الافتراضي وأهله، كانت سحر، تلك الراقصة الشرقية التي قابلتها أول مرة في دار القمر مع ليلى قبل عدة أيام، قبلت طلبها كصديقة على الفيسبوك و لم تمر دقيقة حتى وصلتني أولى كلماتها على الشات:

ميرسي يا جميل على القبول

ميرسي على القبول، في العادة، يقول الشاب هذه الجملة بهذه



- بص أنا عارفة إنك مش واخذ على الجو ده، حببت تبين ده
- قدامنا يوميه لكن معرفتش، بس هتعود علينا مع الوقت وبسرعة كمان
- علينا؟ إللي هو مين بالضبط
- متقلقش هنتقابل قريب كمان كام يوم ☺
- أوك

- عامة أنا في الفيس بوك مش بتواصل مع حد غير مع ناس معدودة جداً، إنت عارف بحكم شغلتي أغلب إللي عندي في صفحتي شباب صغير ورجاله وإنت فاهم طبعاً، فمش برد على حد لكن على أي حال، ده رقمي رنلي بس وهنتبقى على تواصل دائم، وماتخفش أنا مش هعضك ولا بخوف ☺

- تمام

- سلام مؤقت

ربط كلامها حينما قالت أننا سوف نتقابل قريباً بكلام الأستاذ الذي قال لي بدوره إن عيد ميلاد لينا سيحل بعد أسبوع تقريباً، كانت الترتيبات لهذا اليوم تتم في الخفاء.

كانت الأيام تمضي، ولا يمر يوم إلا وأخرج مع لينا سوياً، أحياناً تعرفني على مجتمعات جديدة، وأحياناً نتسوق سوياً في المراكز التجارية الكبرى، حتى أنها كانت تأخذ رأيي في كثير من اختياراتها للملابس التي تشتريها من أفخم المحلات والمراكات العالمية، وإذا أرادت أن تزيد

الأجواء مرحًا و بهجة كانت تتصل بلمياء و بعض أصدقائها الذين تعرفت إليهم لاحقًا، وفي مثل هذه الأجواء، لم تكن كاميرا الفيديو تفارقها أبدًا إذ كانت توثق كل لحظة سعادة ممكنة، كانت حريصة أيضًا أن تظهر معي في كل صورة، هذا غير العزائم الصغيرة في بيتها حيث كان بيتها مفتوحًا أيضًا للأصدقاء من وقت إلى آخر، وكما أعدت لي الطعام حين دعنتني أول مرة إلى بيتها، أعدت الطعام بنفسها أيضًا وطبخت كل الأصناف، لثمتلأ سفرتها بما لذ وطاب، كنت أنظر وأراقب أصدقاءها هؤلاء وهم يملؤون البيت ضحكًا، حتى كاد كل ركن في بيت لينا أن يكون شاهداً على تلك الأجواء، كان البيت ملاذًا لأصدقاء لينا ينسون فيه هموم في الدنيا ويخرجون منه وكأنهم ولدوا من جديد.

وهكذا دواليك تمر الأيام وصحبتني مع لينا لا تنقطع، وكل يوم كنت أتعلق أكثر بالأماكن التي أعتدت ارتيادها معها وبالمجتمع الذي اندمجت فيه، إلى أن جاء يوم عيد ميلادها، كان احتفالاً لم أشهد له مثيلاً، وكان أيضًا نقطة التحول في حياة لينا، بل، وفي حياتي أيضًا.

ذلك اليوم، اتصلت بي لينا قبل يوم من أجازتي الأسبوعية، ودعنتني إلى حفلتها قائلة إنني أول شخص تدعوه بحكم قربي منها طوال تلك الفترة، وأن هناك الكثير من المدعوين منهم من قابلتهم والغالبية العظمى لم أشرف بمعرفتهم في ذلك الوقت، واختارت أن يكون مكان الحفل على النيل في مركب blue Nile وتحديدًا في دار القمر حيث حجزت المكان

كله لصالحها وصالح كل المدعوين مسبقاً، ولم تستغرق المكالمات أكثر من دقيقتين ولم تحك لي أكثر من تلك التفاصيل، كان جدولها ممتلئاً فعلاً، وأيقنت أنها حريصة كل الحرص على أن تكون تلك الليلة لا تنسى.

كان قد مر علي زمن طويل لم أحضر فيه عيد ميلاد خاصة عندما تكون تلك المناسبة لفتاة، كان آخر عيد ميلاد حضرته لخطيبتي السابقة منذ فترة طويلة جداً ولم أحضر بعدها أي مناسبة، حتى نسيت فعلاً كيف يكون شكل عيد الميلاد، وبسبب ذلك، وقعت في حيرة من أمري بشأن هدية عيد ميلادها، وسألت نفسي، فتاة بهذا الشأن والوضع والمكانة الاجتماعية بين الناس ترى كيف يمكن أن يكون مدى قبولها لهدية مهما كانت بسيطة؟ بسبب كثرة مثل تلك التساؤلات شعرت حقاً بالحرَج الشديد خوفاً من ردة فعلها تجاه هديتي، إلى أن جاءتني فكرة وقادتني قدمي إلى أحد المراكز التجارية الكبرى في مدينة 6 أكتوبر، ومن أفخم محلات العطور ذات الشهرة في دول الخليج اخترت لها أغلى عطر، صحيح أن تلك الهدية كلفتني الكثير من المال إلا أنني لم أهتم بذلك بقدر ما كنت مهتماً بهدية تليق بجمال لينا وطيبة قلبها، واخترت أيضاً أن أرفق مع الهدية بطاقة صغيرة كتبت فيها:

( إلى صاحبة الفضل علي والتي أعادتني إلى الحياة مجدداً، شكراً لكي، كل عام وإنتي بألف خير متدنياً لكي العمر الطويل الحافل بالتقدم والنجاح )

وفي يوم الأحتفال كانت لينا متواجدة قبل موعد الحفلة بساعة حيث كان المقرر أن يتواجد الحاضرون في تمام الساعة الثامنة مساءً ومن ناحية أخرى لتتابع الترتيبات وتستقبل ضيوفها، ما جعلني أن آتي إليها بمفردتي، وعندما وصلت كان هناك مابين خمسة إلى سبعة أشخاص كانوا قد وصلو بالفعل، استقبلتني لينا بأجمل حلة، حتى هذه اللحظة لا أنسى شكلها، كانت ترتدي فستاناً أحمر اللون وصل طوله إلى الركبة، وحقاً ذا كعب عالي أنيق جداً، وعقد من الألماس قد زين رقبتها، بتسريحة شعرها المنسدل المصفف بعناية، وكعادتها كانت تعرف جيداً مقدار مساحيق التجميل والمكياج الذي تستخدمه لينير وجهها القمري، قلت لها:

- كل سنة وإنتي طيبة يا لينا عقبال مليون سنة

ابتسمت ببهجة:

- ميرسي يا شادي وإننت طيب ربنا يخليك

- دي حاجة بسيطة كده يارب تعجبك

- شادي مش معقول إنت ليه عملت كده وكلفت نفسك؟ ، كفاية

إنك جيت دي أجمل هدية

- لا إزاي متقوليش كده دي حاجة بسيطة خالص، يارب العمر

الطويل ليكي

ابتسمت لي وأردفت:

- بجد مش عارفة أقولك إيه ميرسي، بجد اتفضل



عرفتني بمن تواجدوا قبلي و جلست معهم فيما كانت هي تتابع الضيوف هاتفيًا، لم أنخرط معهم في الحديث إلا قليلا، ومع مرور الوقت أخذ ضيوف الحفل في التوافد إما فرادى و إما أزواجا وإما مجموعات، من الذين أعرفهم حضر الأستاذ حسن و لمياء وطه وإبراهيم، ومن الذين تعرفت إليهم مؤخرا جمال عبيد ومعه آخرون وحتى الراقصة سحر قد أتت أيضا إلى الحفل، وهكذا شيئا فشيئا امتلأت القاعة تماما، رجال أعمال مع زوجاتهم وعشيقاتهم، عارضات أزياء بملابس لا تختلف كثيرا عما تعرض عليهن في الديفيلية والمسارح المخصصة لهن، ظباط شرطة بملابس ملكية تنظر إليهم وترى مدى الحزم والشدة في وجوههم وإن تظاهروا بعكس ذلك في أجواء احتفالية، إلى جانب محامين يتبادلون المعرفة وأرقام الهواتف مع أشخاص ذوي نفوذ، ممثلين وممثلات في بداية مشوارهم الفني، مخرجين سينمائيين، وبعض الأصدقاء المقربين، كان أغلب الحضور أصحاب مراكز اجتماعية مرموقة، تعرفت لينا عليهم من خلال إقامة هؤلاء مؤتمرات صحفية في قاعات الفندق أو لمجرد ارتيادهم إلى الفندق وإقامتهم فيها من وقت إلى آخر ليس إلا، وكما كان الوضع سابقا، تعالت الضحكات وامتلأت الأجواء بالأحاديث المتبادلة ربما يكون الفرق الوحيد هو الصحبة والجميع يعرف بعضه البعض، أصبحت الأضواء أكثر إشراقا وبدأت الفرقة الموسيقية المكونة من عازف أورج ومغني ومغنية مع دي جي في العمل، ومع كل أغنية كانت تغنى، كان الجميع يصفق وقد

ارتسمت البهجة على الوجوه، طلبت لينا من سحر أن تشعل الأجواء بالرقص إلا أن ما حدث هو العكس، إذ أخذت سحر إشارب من حقيبتها الشخصية وحزمت لينا لكي ترقص هي، وهو ما حدث بالفعل، قام كل ضيوف الحفل وحاصروا لينا تاركين لها مساحة كبيرة و كافية للرقص على الأغاني الشعبية في نفس اللحظة التي كانت فيها فتيات أخريات مليئات بالثقة يندمجن هنا وهناك مع جماعات من الأزواج والمرافقين لهن، لم تكن تلك الوجوه البهيجة تتغير أبدًا بعكس أضواء المكان الملونة أبدًا.

وفجأة وبطريقة عفوية أمسكتني سحر من يدي وجذبتني إلى المسرح مع لينا، ثم أتت بلمياء والأستاذ حسن أيضًا، لم أجد في حياتي كلها الرقص، كان كل ما أجيد في مثل هذه المناسبات هو الضحك والتصفيق فقط، لذا كان الوضع هو رقص الأستاذ حسن و لمياء مع لينا، ليخلوا الجو لسحر معي، كانت تتمايل كما الوردية التي تداعبها الريح، ترقص في انسيابية وتتعمد أن تقترب مني وتلاصق جسدها بجسدي حتى أن يدها لم تفارق يدي أبدًا طوال مدة رقصها، وفي وسط وصلة الرقص تلك همست في أذني قائلة:

— مش قلتك إننا هنتقابل قريب؟

في تلك اللحظة، لاحظت لينا مدى رغبة سحر في التقرب مني وعندما نظرت إلى عينيها شعرت بأنها ترغب في قول شيء ما، كنا نتعب من

الرقص والتصفيق فنستريح ثم نعود مجدداً، شعرت حقاً أن في حياتي الكثير قد فات وانتهى وأنتي قد حرمت نفسي من الناس والشعور معهم بالسعادة والدفيء، كان كل ضيوف الحفل بلا اي استثناء مدعوين إلى أي حفل كانت تقيمه لنا سواء في بيتها أو خارج بيتها وبطريقة أو بأخرى ينتهي بهم الأمر معها رغم أنهم في البداية كان نصفهم لا تربطهم أي علاقة بها بل تم دعوتهم من أشخاص لهم علاقة قوية تربطهم معها بحكم المصالح أو الصداقة أو الرغبة في التعرف فقط، كان الجميع يتصرف يوم عيد الميلاد بسلك الناس في حدائق الملاهي، ورغم ذلك أحببتهم لنا كثيراً رغم معرفتها أنها مصدر لسعادتهم ليس إلا.

رحل القليل من ضيوف لنا قبل منتصف الليل بنصف ساعة، وحل مكانهم غرباء لا نعرفهم أبداً، كانوا أجانِب، لذا لم يلق لهم أي أحد باله، كان هؤلاء الغرباء ينظرون إلينا في تركيز تام، فهموا من الجو العام أن ما يشاهدونه هو احتفال بعيد ميلاد وكان الأمر بديهيّاً إذ علقت زينة وراء الفرقة الموسيقية مكتوب عليها:

( happy birth day lena)

وأثناء استراحتنا، جاء نادل برسالة همس بها إلى المغنية وعازف الأورج لكي يؤدوا أغنية when you love some one، نظر الجميع إلى بعضه البعض في استغراب إلى أن قالت المغنية قبل أن تغني:

— الأغنية دي إهداء من الأستاذ جاد الترك من لبنان للآنسة لنا

## بمناسبة عيد ميلادها

وبدأت المغنية في الغناء، التفتت لينا في مكانها لتبحث بعينيها عن جاد الترك هذا، ولم تعثر عليه، وربما لم تلاحظ حتى دخول الغرباء إلى المكان، مرت دقيقة واحدة بالضبط، وكانت كافية لجاد الترك، فوجئنا جميعاً به وهو يتوجه من آخر القاعة إلى مقدمتها حيث كانت لينا تجلس في طاوله جمعتها معي و لمياء وأستاذ حسن وآخرون وقالها لها:

- تسمحيلي بالرقصة دي؟

اتسعت عينا لينا من الذهول واحمر وجهها من الخجل، كان يمد يده إليها، وكما المسيطر عليها بالسحر وضعت يدها بيده وقامت لترقص معه رقصة ال slow، كان جاد الترك يتميز بمظهر نجوم هوليوود، كحال أغلب اللبنانيين يعرف كيف ينتقي ملبسه وكيف يظهر أمام الناس، رشيق ويدل جسده أنه يمارس الرياضة بانتظام، حتى لجيته الخفيفة على وجهه تدل على انه يعتني بوجهه عناية فائقة، كان جاد يتحدث مع لينا اثناء رقصهما ومع ارتفاع صوت الموسيقى وبعدهما عني لم أفسر الكلام، لكنني فسرت من شكل لينا وهي صامتة عندما يتحدث جاد أو عندما تبتسم له، أنها سعيدة وراضية، من بين كل الرجال الذين عاصرتهم لينا و وسط كل المحاولات التي بذرت من أغلب الرجال ليكونوا مكان جاد الترك معها، كانت تقابل بالرفض، ليأتي جاد ويغنم بلينا بكل سهولة، كانت كل أعين الرجال والشباب ضيوف لينا تنظر إليهما في

غيرة تامة، كان الأمر بديهيًا جدًا، تأكدت حينها أنها رأت في جاد  
الترك شيئًا لم تكن تراه في أي رجل آخر تعرفت إليه، لتصبح النتيجة  
ثنائيًا أنيقًا يليقه أحده بالآخر، وتذكرت حينما قالت لي أول مرة تلك  
الليلة في النيل:

(لحد دلوقتي ملقتش الإنسان المناسب اتقدملي كثير لكن ملقتش  
نفسي مع أي حد خالص)

كان الجميع يتهامس مع بعضه البعض، واكتفيت أنا بالمشاهدة فقط  
شعرت في داخلي أن الحب قد وجد لنفسه سبيلا إلى قلب نينا قبل أن  
تدرك هي ذلك.

انتهى الحفل ورحل الجميع كما رحل جاد الترك من قبلهم،  
وبرحيلهم لم تنتهي همساتهم عن ما شاهدوه بأعينهم، أوصلتني لينا إلى  
بيتي كعادتها وحين خروجي من سيارتها قالت لي:

- شادي هتصل ببيك لما أوصل البيت في موضوع عايزه أكلّمك فيه

ضروري

وانتظرت مكالمتها ولازال مشهد رقص لينا مع جاد الترك راسخاً في  
ذاكرتي، كنت جالساً في غرفتي وأرى رقصهما معاً وكأنني أعيش تلك  
اللحظة مراراً وتكراراً، حتى أنني كنت أسمع مجدداً همسات الناس:

( هو مين جاد ده إللي بترقص معاه )

( شوف يا أخي التناقض، ده أنا فضلت كثير أتحايل عليها نخرج

سوا أو نقضي وقت مع بعض وكانت بترفض دايمًا، يقوم يجي واحد زي

ده وتقبل ترقص معاه بالسهولة دي )

( واضح إن السنارة غمزت )

( شوفي بترقص معاه إزاي، أنا مش فاهمة فيها إيه لينا دي علشان

تاخذ الاهتمام ده كله )

( ياااااااااا ده مز قوي، مكنش يرقص معايا أنا )

( ياعم وهي تبص لنا ليه أصلاً؟ إن جالك اللبناني مش هتعرّف تشوفها

تاني، اشرب بس اشرب )

( وعملالي فيها بنت أخلاق و أدب )

( ياما بكره نشوف )

اشتعلت غضباً لمجرد تذكري لكل هذه الهمسات الجانبية، تلك النظرات التي كانت تطعن فيها دون إيه رحمة، ولكن عن أي حياة يعيش فيها الإنسان وسط مجتمع تقليدي لا يرحم، أقل تصرف فيه حتى ولو كلمة بسيطة تجرم، هكذا هو مجتمعنا، إما نهول من أبسط الأمور أو نسخف من أعظمها وسواء كان هذا أو ذلك فالنتيجة سلبية، لا حياة هادئة مع مجتمعنا مهما بلغت درجة التحضر أو المستوى الاجتماعي.

اتصلت بي بعد حوالي ساعة تقريباً وكنت أنوي أن أحصل على إجابة مرضية لأنني متأكد تماماً وبالبرهان أنها لا تعلم شيئاً عن ما أقحمت نفسها فيه

- إيه يا بنتي إتأخرتي عليا كده ليه في الاتصال؟

تنهدت وقالت:

- معلش يا شادي أنا بس مرهقة شوية ويمكن أخذت وقت على ما

غيرت هدومي وكده

- مال صوتك؟ نبرة صوتك مش عاجباني بالمره

- لا أبداً مافيش حاجة

- إزاي مافيش حاجة؟ إيه الموضوع إللي كنتي عايزاني فيه

## ضروري

### صممت

- ألو؟ إنتي معايا يا لينا؟
- أيوه معاك معاك
- إنتي بدأتي تقلقيني على فكرة
- بصراحة، حاسة زي ما أكون طايره في الحب
- حب؟ ؟
- لأول مرة أكون مع حد بالقلب ده وأرقص معاه حسيت كأنني معاه في الجنة
- لينا، ده شخص إنتي متعرفهوش وغريب عليك، الحاجات دي مافيهاش تهور
- بالعكس، أنا حاسة إنني لاقيت نصي الثاني أو بمعنى أصح هو إللي لاقاني
- يابنتي مش معنى إنه جاملك بأغنية و طلب يرقص معاك إن دي حاجة كبيرة، ده العادي عندهم في لبنان ولا إنتي مش واخده بالك؟
- يمكن عندك حق، بس تصدق، أنا عمري ما شوفت إنسان زيّه ولا هشوف، مش عارفة يا شادي، حاسة إنني متلخبطة جداً، مش عارفه إحساسي ده حب ولا إعجاب ولا إيه، بجد أنا تايهة جداً، علشان كده قلت أفضض معاك شوية.



- طالما اعترفتي إنك متلخبطة وتايهه يبقى شعورك ناحيته  
ملوش أي أساس من الوجود، وبعدين يا لينا حابب أقولك نصيحة بجد،  
إبقي اختاري الناس إللي حابه يفرحوك من القلب حتى ولو كانوا قليلين  
- أنا عمري ما اهتميت بكلام الناس

شعرت من ردها هذا أنها كانت تشعر بضيق حفلتها وهم  
يتهايمسون عليها وكأنها تتحداهم، فرد واحد ضد الجميع، هكذا بدى لي  
الأمر، اردفت:

- أنا لو كنت عملت خاطر وحساب للناس بظروفي إللي مريت  
بيها طول الفترة إللي فاتت دي من عمري كان زمني انتهيت كلياً،  
صدقني العمر مافيش أقصر منه وكده كده الناس بتتكلم  
- أيوه يا لينا بس

- صدقني يا شادي أنا مش مهتمة بيهم، أنا فاهمة وحاسة إنت  
عايز تقولي إيه وده شئ يسعدني إنك مهتم بيا جداً وبيأكدلي إن عمر  
ظني مخابش فيك أبداً  
صمتت مجدداً وقالت:

- بتمنى إن إحساسي ده يكون صادق  
- طيب إنتي اتكلمتي معاه؟ عرفتني عنه حاجه غير اسمه  
وجنسيته؟

- أكيد طبعاً، إحنا كنا باينين قدامكم إننا بنرقص بس في نفس

الوقت كنا بنتعرف

- طيب هو إيه حكايته بالضبط؟

- أبدأ، شاب عنده اتنين وتلاتين سنة عايش في ولاية نيويورك

في أمريكا ومعاه الجنسية الأمريكية، والده لبناني من بيروت ووالدته  
مصرية، بيشتغل في مجال تصميم الديكورات وعنده مكتب في أمريكا و  
موقف أخوه حاليًا ببيدير بالنيابة عنه و جاي هنا شهر سياحة في مصر  
تنفيذًا لوصية والدته ومقيم في فندق سميراميس حاليًا

- وصية والدته؟

- آه والدته متوفية بقالها حوالي أربعة شهور وكانت رغبتها في

آخر أيامها إن جاد ينزل مصر ويشوف أهلها وبالمرّة يقرب شويه من أهل  
والدته.

- اهااا، وانتي إيه رأيك فيه؟

- منكرش إنه شاب جنتل وشيك ومجاہل جدًا وإحساسي إن قلبه

طيب جدًا كان باين مدى إعجابه بيا في عنيه، يمكن مش هشوفه ثاني  
بس أتمنى إني أقضي حياتي مع إنسان زيه

- عامة يا لينا أهى ليله وعدت خلاص وكلنا انبسطنا وسعداء

وأتمنى إنك تنسي وتركزي في إللي جاي

- عندك حق، يالا تصبح على خير

- وانتي من أهله، باي

لا أنكر أنني كنت غير مطمئن لجاد الترك ولا حتى لإعجاب ليña به ورغبتها التي قاربت على التمسك به ليس لأنني أشعر بالغيرة، بل هو الخوف من فقدان ليña إلى الأبد، فوحدتها كقيلة بأن تجعلها تفكر به مراراً وتكراراً خاصة وأنها تعلم أين يقيم وهو يعلم أين تعمل و المسافة. تعتبر لا شئ إذا أراد أحد أن يصل إلى الآخر، شعرت بليña حقاً بل وأشفقت عليها أيضاً، فالإنسان منا إذا ما أجبر على الوحدة تصبح جزءاً من كيانه ويصبح العقل في حالة جموح تام بين الحزن والفرح، يتألم ويتعذب في ذكريات الماضي ويخشى من حاضره ومستقبله، يحرص على أقل شئ تضيف إليه السعادة والسرور حتى وإن كان التواجد وسط الناس لمجرد التواجد فقط، وهكذا حتى تكتشف في النهاية أن الأيام تعيد نفسها في دائرة الحياة، ولا شئ أكثر قسوة من سجن الوحدة و عذاب الأيام.

مر أسبوع كامل لم تتحدث فيه ليña عن جاد الترك ولم يتحدث أحد من زملائنا في الفندق عن حفل عيد الميلاد وتلك الأجواء الكرنفالية، كانوا قد نسوا كل شئ باستثناء ليña وجاد، ولكن في خلال ذلك الأسبوع لم يكن الحديث عنهما كبيراً ولا حتى بالأمر الجلل، في ذلك الوقت لم يتعد حتى دردشة صغيرة أثناء تناول فنجان قهوة مع سيجارة بين أي اثنين، كانت الأجواء طبيعية للغاية، الأستاذ حسن في مكتبه وأنا وليماء وطه في الريسبشن نعمل لاستقبال النزلاء الجدد ونقدم الخدمات للنزلاء المقيمين

في الفندق أما لدينا فكانت أغلب الوقت كعادتها مع الأستاذ حسن وأحياناً تأتي لتساعدنا قليلاً في العمل ، كنت أكثر سعادة بتلك الأجواء إذ كنت في وقت استراحتي أمضي الوقت مع الأستاذ حسن ولينا نضحك وتناقش سوياً حول سير العمل وكيفية تطوير أسلوب العمل وأحياناً أخرى أتناول مع لمياء وطه فنجان قهوة أو كوباً من الشاي أثناء أي حديث يكون بعيداً عن العمل ، حتى أنني قد تعرفت إلى بعض النزلاء العرب والأجانب ، لم يكونوا بالكثير ولكن يكفي أنهم كانوا مصدر سعادة وثقة ودفعة إلى الأمام بالنسبة لي ، شيئاً فشيئاً أصبح الفندق بمن فيه بيتي الثاني بل وحياتي كلها.

وفي أحد الأيام وعلى غير المتوقع ، أمام مرأى الجميع باستثناء لدينا التي كانت تباشر العمل في مكتب الأستاذ حسن ، فوجئ جميع من حضر حفل عيد الميلاد بدخول جاد الترك الفندق ومعه حقائبه وأمتعته ، لقد غادر فندق سميراميس وقرر الإقامة هنا في الهيلتون حتى تتسنى له الفرصة للتقرب من لينا ، مجدداً اشتعلت الهمسات بين الناس ورغم ضيق صدري من تلك الهمسات إلا أنني اتفقت معهم في السؤال ، تري هل أتى جاد الترك من قرار نفسه دون علم لينا؟ أم أن لينا تعلم بقدومه؟ وإن كانت تعلم وهي التي اعترفت بإعجابها به ، لماذا لم تستقبله أم أنها تتجنب الشبهات وحديث الناس؟

حجزت بنفسني غرفة خاصة ببناء على طلب جاد الترك والغريب في

الأمر أنه لم يعلق بأي كلمة باستثناء أنه كان يبادلني بنظراته كما كنت أفعل تمامًا، بدا شكلي مألوفاً لديه، وقبل أن يصعد إلى غرفته قال لي مبتسمًا بلهجته اللبنانية:

— بتخيل إنك رفيق لينا ولا أنا غلطان؟ بعتمد اسمك شادي

لرمت الصمت لثواني وأجابته:

— ده صحيح، اسمي شادي ورفيق لينا زي ما بتقول، كلنا هنا

رفقة لينا

كان طه وولياء يحدان فينا لشعورهما أن الحوار على وشك أن يشتعل بيني وبينه فقد كان يتصف بالهدوء البارد الذي لم يرد عليّ من قبل، أكمل حديثه قائلاً:

— شو، ماتي شايف لينا اليوم؟

— الحقيقة مشغولة جدًا ومش فاضية

— آه منيح، منيح كثير الله يكون بعونها، لكان بليز ممكن تنقلها

تحياتي وتسلملي عليها كثير كثير وبلغها إنني ناظرها في أقرب وقت حتى نتقابل سوا ويشرفني أكثر إنك تكون حاضر معنا كمان

بادلت النظرات مع طه وولياء اللذين لزموا الصمت وقلت ناهياً الحوار:

— أكيد يا فندم، إقامة سعيدة ولو احتجت أي حاجة إحنا في

خدمتك

شعر جاد بمدى حدة ردودي علّيه في حوارنا القصير ولم يملك سوى

أن يجاري الأجواء معي بشكل مؤقت من وجهة نظره.

- ميرسي كثير عزوقك، و بتمنى أنا وياك نلتقي يوم وحدنا  
حبيب أتعرف عليك وتتعرف عليا أكثر، طبعاً إذا ماعندك مائع، مرة  
تانية ميرسي كثير باي

وصعد إلى غرفته، لوهلة من الوقت شعرت بحرق شديد في داخلي وكما  
الغريق في عرض أمواج البحر الهائجة لم أدري ماذا أفعل ولا حتى ماذا  
أقول، شل تفكيري تماماً لدرجة أنني فقدت تركيزي في العمل وهو ما  
لاحظته لمياء مع طه وأنا أجلس على الكرسي متكئاً برأسِي على يدي،  
قالت لمياء:

- شادي هو إيه الحكاية بالضبط؟

لم أعلق

- هو في حاجة بين جاد ولينا؟

لم أعلق

قال طه:

- كدة الموضوع في إن، مجية الرجل ده هنا مافيش وراها خير

أيداً

ردت عليه لمياء بخده:

- خير إيه وشر إيه إنت كمان ده نزيل زينه زي أي نزيل في

الفندق غادي يعني، شادي إنت عارف حاجة إحنا مش عارفنها؟

نظرت إليهما وأشحت بيدي في حيرة من أمري وقلت:

- والله مش عارف أقول إيه، أنا كنت قربت شخصياً أنساه وأنسى شكله، كنت فاكِر إن الموضوع مجرد مجاملة في عيد ميلاد مش أكثر رِغم إن ده غريب شويه إن حد يجامل حد ميعرفهوش، مكنتش متخيل أبداً إن الأمور توصل لكده ده زي ما يكون متعمد إنه يوصلها بأي طريقة علق طه قائلًا:

- طيب مش ممكن يكون اتصل بلينا وقالها إنه جاي مثلاً؟  
- لا معتقدش كانت لينا قالتلي حاجة زي كده ثم الحوار كان قدامك، مشوفتوش وهو بيسأل عنها ويبدور بعنيه شمال ويمين زي ما يكون ليه حد تايه

- هو كان مقيم فين أصلاً؟

- في فندق سميراميس

قالت لمياء:

- طيب هتقول إيه للينا؟

- مش عارف، يمكن مقولهاش أنا قلقان من جاد ده ومش

مستريحله من ساعة ماشوفته

نظرت إلي بتهكم وقالت:

- إزاي يعني متقولهاش؟ يابني كده كده الرجل ده بقى مقيم في

الفندق خلاص أيّا كانت المدة اللي هيقعد فيها هنا بتلاقيه يا إما في كافيه

يا إما في مطعم يا إما في البار أو في الكازينو يعني هتلاقيه بيجوس في المكان و مسيره هيشوفها وتشوفه وحتى لو متقابلوش في الأماكن دي هو مافيش تيلفون عنده في الغرفة؟ مش هتيجي مرة يتصل بينا في الريسبشن وهي ترد عليه؟ بشكل أو بآخر هتعرف إنه موجود فنصيحة مني ليك قولها ياشادي أحسن ما يحصل موقف محرج ولا حاجة وافقها طه قائلا:

- أنا شايف كده بردو مش هتخسر حاجة لما تقولها

- مش هخسر أيوه، لكن إحساسي أن ليننا هي إللي هتخسر،  
وخسارة جامدة كمان

- طيب وهتعلم إيه معاه؟ هتشوفه وتقعده معاه ولا هتنفضله؟  
أوعى تقولي مش عارف

- هشوفه وهشوف آخرته إيه

تدخلت لياء قائلة:

- بس عايزاك تحط في دماغك حاجة مهمة، فكر في سبب إصراره

إنه يقعد معاك إنت بالذات ويتعرف عليك وإنه معبرناش حتى بكلمة

هاي كيفكم باللبناني علما إننا كنا كمان حاضرين في الحفلة وأكد شافنا

كوبس بس إحنا مكناش واخدين بالنأ وقتها لحد ما جه ورقص مع ليننا

- قصدك إيه؟

- قصدي إنه شئ وارد جدا إنه عايزك كوبري يوصل من خلالك



للينا، وممكن عايز يعرف معلومات عنها منك زي طباعها صفاتها  
والحوارات دي، خد بالك كويس وخط كل الاحتمالات في دماغك

طال النقاش بيني وبين لمياء وكثرت الاحتمالات والتفسيرات، ومع  
كثرة كل تلك الاحتمالات حيال رغبة جاد الترك في التقرب من ليना،  
زادت حيرتي وقلّة حيلتي، انتهى العمل ولم يتفوه أحد بأي كلمة معها  
خاصة لمياء وطه الأمر الذي جعل من هذه المهمة الصعبة أن تكون كالجبال  
على كتفي، لاحظت ليना أنني لست على مايرام أثناء توجهنا إلى منازلنا،  
حاولت استدراجي بشتى الطرق وفتح مواضيع للحوار لكن دون جدوى، لم  
أكن أعلم حقاً من أين أبدأ.

وعندما اقتربنا من بوابة حدائق الأهرام استطعت أن أجمع القليل من  
شجاعتي وقلت:

- ليना إنتي فاضية ولّا وراكي حاجة هتعمليلها في البيت؟
- لا أبدأً ليه؟
- بصراحه في موضوع كده عايز أكلّمك فيه؟

بطريقة مازحة قالت:

- مممممممم موضوع، أنا كنت حاسة إن جواك كلام عايز تقوله

ماشى تعالى معايا البيت نتكلم على رواق

حاولت جامهًا أن أرتب الكلام في عقلي قبل أن يخرج من لساني كما  
حاولت توقع ردة فعل ليना حينما تدرى بذلك الأمر، جلست معي في

حديقة الفيلا وقدمت لي ولنفسها فنجانيين من القهوة وقالت :

- ها يا سيدي خير موضوع إيه إللي كنت عايز تكلمني فيه؟

تلعثمت في البداية حتى بدا واضحاً على وجهي علامات الارتباك  
وعندما لاحظت ذلك قالت لي بهدوء:

- اهدي بس اهدي مالك مرتبك ليه؟ مافيش حاجة لده كله.

أخذت نفساً عميقاً ومع برهة من الوقت استطعت لم شتات نفسي  
وسألتها:

- لينا هو بعد حفلة عيد ميلادك كلمتي إللي اسمه جاد الترك أو  
هو كلمك أو حتى اتقابلتم؟

- لا خالص محصلش الراجل كان ذوق حب يجامل وانتهى  
الموضوع ثم هو مقيم في سميراميس وتقريباً عنده ظروفه الخاصة، بس  
تعالى هنا أنت إيه إللي فكرك بينه دلوقتي؟

- بصراحة يا لينا حصل حاجة كده أثناء وجودك في مكتب  
الأستاذ حسن طول الوقت ومكنتش عارف أوصلك إللي حصل إزاي ولا  
أقولك إيه

- خير يا شادي في إيه قلقتني، الشغل فيه حاجة مش مضبوطة؟

- لا خالص الشغل كل أموره تمام هو بس إللي حصل إننا في عز  
الشغل اتفاجئنا كلنا، هو مش كلنا كلنا أقصد كل إللي كان موجود في حفلة  
عيد الميلاد بجاد داخل من باب الفندق ومعاه شتطته وأنا إللي حجزتله

عرفته بنفسي.

صمتت من هول المفاجأة التي لم تكن تتوقعها أبداً، راقبت تعابير وجهها الساكنة التي لم تعطني أي انطباع عن ما إذا كانت سعيدة بمجيئي جاد الترك إلى الفندق أم إذا كانت غاضبة، وحينما أفاقت قليلاً من صدمة المفاجأة قالت:

- جاد؟؟؟

- أنا آسف يا ليندا إنني مقولتكيش إنه وصل في ساعتها بس

خوفت من ردة فعل الناس عليكى إنتي بالذات

- مقالش حاجة؟ مسألش عني؟

- سأل عنك فعلاً وقولتله إنك مشغولة حتى أنه طلب مني إنه

يقعد معايا في يوم لوحدنا ويتعرف عليا والغريبة أنه كان عارف اسمي

أول مشافني

صمتت مجدداً ولم تعلق، شردت بذهنها كثيراً

- ناويه تعملي إيه يا ليندا؟

- مش عارفه

- الواضح إنه عايز يتقرب منك ويتعرف عليكى وده يدل على

مدى إعجابه بيكي، أنا بس عايز ألفت نظرك لحاجة، لو قرررتي إنك

تقابليه حطي في دماغك حاجة واحدة بس إنتي عايشة في دنيا وهو جاي

من دنيا مختلفة عن دنييتك خالص وده ممكن يسبب ألم ووجع ليكي.

لم تعلق مجدداً على كلامي كانت تستمع جيداً إليّ وربما كانت تأخذه على محمل الجد لكنني لم أكن متأكداً من مدى اقتناعها من عدمه، استراح قلبي قليلاً عندما أخبرتها بمجيئ جاد الترك إلا أن الخوف والقلق الأكبر مازالاً يقبعان في داخلي، أخيراً استأذنت منها للرحيل إلى منزلي بعد أن حذرتها من عواقب تلك العلاقة، وعند الباب أوقفتني لينبا طالبة مني شيئاً إن دل فهو يدل على خوفها أيضاً، قالت:

— شادي أنا عارفة إني دائماً بتقل عليك لكن أنا مليش غيرك أُلجأله، أنا هقبل إنه يتعرف عليا يمكن يكون ده الحب إللي كنت مفتقده من زمان لكن أنا عايزاك تبقى معايا وفي ظهري في العلاقه دي، إنت الوحيد إللي هتقدر تعمل كنترول عليا وهتشوف حاجات أنا مش هقدر أشوفها كبنت

— انا عمري ما هتخلي عنك ولا حتى أفكر في ده بس بشرط تحكيلي كل كبيرة وصغيرة علشان لو حصل حاجة لا قدر الله أقدر أتصرف، توعديني؟

ابتسمت لي وقد دمت عيناها وقالت:

— أوعدك يا شادي ربنا يخليك لينا يارب  
وكانت تلك المرة الثانية التي أرى فيها لينبا تدمع

(11)

ينظر الدكتور إلى ساعة الحائط في مكتبه التي تجاوزت منتصف الليل  
ويقرر أن يأخذ قليلاً من الراحة يستغلها في الحديث مع شادي ويستفسر  
منه عن بعض الأمور، يناوله كوباً من الماء قائلاً:

- اتفضل يا شادي حاول تبل ريثك شويه

يرتشف شادي الماء حتى آخر قطرة في الكوب الزجاجي

- أحسن دلوقتي يا شادي؟

بصوت يعتصره حزن الماضي

- الحمد لله على كل شيء

- طيب احكي لي بقي إنت إيه إلهي مكنش مريحك في جاد الترك؟

- كل حاجة

- بمعنى؟

- عمري ماخسيت لحظة إنه بني آدم طبيعي، كان واخذ الأمور

بسهولة ومكنش بيعمل اعتبار لأي حاجة ولا حتى لأي حد، تقدر تقول

كده إنه كان عايش حياته بالطول وبالعرض، لك أن تتخيل شيئاً من أصل

لبناني والده من بيروت ووالدته قاهرية، اتولد في أمريكا وفيه معلقة

ذهب نظراً لأن والده كان مقتدرًا بمعنى الكلمة، كل حاجة وأي حاجة

تحضره بدون أي معاناه حتى البني آدميين مكنش عنده ذرة إحساس

بمشاعرهم وأحاسيسهم، ممكن يتعرف عليك علشان مصلحة وقتية في سبيل سعادته ومنفعته الشخصية بس، بعد كده إنت ولا حاجة بالنسبale، باختصار كان إنسانًا باردًا

- طيب ليه ليانا ماشفتش كل إللي بتقوله ده فيه؟

- لأنها كانت في الوقت ده معمية بحبه وكانت معجبة بيه

- مش جايز تكون شافت حاجة فيه زي ما شافت فيك إنك ممكن

تكون سندها مثلاً؟

- إللي متأكد منه إنها كانت شايفه فيه نصها الثاني ولذلك

حاولت بشتى الطرق إلني ألفت نظرها و أحذرha من عدم التسرع معاها في

العلاقة

- مفهوم مفهوم

ياخذ الدكتور مصطفى نفسًا عميقًا ويردف قائلاً:

- أنا تفسيري لعدم قبولك لجاد الترك هو إن جواك قلق وريبة من

أي حد مختلف عنك ويمكن ده شائع في مجتمعنا بنخاف من أي اختلاف

حوالينا أو فرض نفسه علينا، يمكن عدم احترامه بالعبادات والتقاليد

حتى الخاصة ببلده لبنان هو إللي خلاك تقلق بالشكل ده، إنت لسه فاكـر

شكله لحد دلوقتي؟

- بالميلي

- تقدر توصيـهولي؟

- زي ما لينا قالتلي وقتها إنه شاب عنده اتنين وتلاتين سنة كان بيمتيز بجسم رياضي إلى حد ما، طويل، لون بشرته بيضاء، أشقر وعلى ما أتذكر إن شعره كان لونه بني، عينيه حادة، متقدرش تحدد إللي جواه من ملامح وشه، راسم وشم على دراعه اليمين عبارة عن هيكلي عضمي لابس عباية سوده وفي إيده عصاية خشب في نهايتها شفرة حادة، حاجة كده عامله زي ملاك الموت، وبرغم إنه نصه مصري إلا إنه كان يدوب يعرف يتكلم باللهجة المصرية وده إللي كان مسيبله صعوبة في إنه يكمل وينقل حياته لمصر

- طيب علشان منتقلش لنقطة أبعد خيلنا نمشي واحدة واحدة بالترتيب، قولتلي إنه أول ما دخل الفندق عليكم إنك إنت بنفسك إللي حجزتله وإنه طلب منك إنكم تتقابلم، أعتقد والله أعلم إنه كان غرضه تبقى القعدة على انفراد لأنه حسب بشكل أو بآخر بمشاعر سلبية منك وده بيدك على مدى ذكائه وقدرته على إنه يقرأ إللي قدامه.

- فعلا يا دكتور مصطفى كلامك صح وهو ده إللي حصل فعلا

- يعني فعلا قعدت معاه؟

- أيوه

- احكيلي من البداية

كان جاد الترك في أول يوم له في الفندق سريع التحركات بدرجة غير متوقعة حيث كان يقضي أوقاته بين شرب القهوة والتدخين في حمام السباحة ثم يعقبها وقت طويل في الجيم الرياضي ويختتمها في المطعم وفي الليل إذا ما قرر أن يبقى في الفندق فالكازينو هو ملجأ الوحيد، وإن خرج من الفندق فلا أحد يعلم إلى أين يذهب بدا لي وللآخرين أنه كمن برمج حياته على روتين معين غير ممل أبداً، كانت العيون مفتوحة على جاد الترك، فعلى قدر الاهتمام به كحال أي نزير في فندق هيلتون رمسيس على قدر الفضول الرهيب الذي تملك البعض ودفعهم إلى معرفة تفاصيل العلاقة بينه وبين لينا.

و برغم أن لينا أصبحت تعلم بوجوده في الفندق وترقب أقرب المقربين لردة فعلها عندما تراه، لم ينساني من جدولته اليومي، اتصل بي في الريسبشن وطلب مني أن أقابله في غرفته منفرداً بعيداً عن الناس والضوضاء، وبطريقة لا إرادية قبلت طلبه، طلبت من لمياء أن تغطي مكاني في العمل ريثما أعود وحينما سألت تحججت بحجة أن معرفة أحد أقربائي نزير في الفندق وأنه يحتاج إلى خدمة، لست متأكداً أن ما قلته قد اقتنعت به لكنها لم تعلق على أي حال.

كانت الساعة الحادية عشرة والنصف، عندما استقبلني في غرفته تلك



الغرفة، تعيدني الذكريات فيها أنني كنت متواجداً قبل مدة طويلة بداخلها، كانت تلك الغرفة هي نفسها التي حجزتها لبقاء المنصور القحطاني وأحلام حينما أراد منها إشباع غريزته الجنسية، صوت صراخها وبكائها من الألم لم يمح من ذاكرتي كما صورة الغرفة آنذاك حينما كان بعض محتواها ملقى على الأرض و محطماً، مقارنة بهذه الذكرى بدى كل شئ طبيعي وأكثر من ممتاز، علمت حينها أنه شخص غير مستهلك أبداً ولا يستخدم الشئ من باب الاستخدام وكفى إلا وإن كان في حاجته. استقبلني جاد الترك بأريحية و ترحاب كبيرين فعلى الرغم من المستوى و المظهر اللائق الذي نادراً ما يراه المرء في شخص ما إلا أنه كان غير متكلف أبداً في ملبسه، حيث كان يرتدي تيشرت كت رياضي أبيض بدون أكمام و شورت برمودا أسود اللون، و كانت تلك المرة الأولى التي أرى فيها الوشم الكبير على ذراعه، جلسنا قبالة بعضنا البعض واستهل حديثه قائلا:

- بتشكرك على قبولك لدعوتي وبعذر منك إذا أخذت من الشغل، بتمنى إني ما أكون سببتلك مشكلة أو..
- لا أبداً ما فيش مشكلة ولا حاجة ولو، إحنا نتشرف بيك
- ميرسي إلك كتير
- خير؟؟ بتمنى إنه كل حاجة هنا في الفندق تمام معاك، في أي

## مشكلة؟

- لا أبداً ما في أي مشكلة أبداً ، الشباب والصبايا ما يبقصروا أبداً ،  
في الحقيقة أنا كان في موضوع كنت حابب أحكي فيه معك  
واستطرد مازحاً باللهجة المصرية :
- و أهو بالمرّة أمارس اللهجة والكلام النصري مع حد بدل ما  
بتكلم بليلاني ومحدث بيّفهم مني حاجة
- ياسيدي اتكلم بالمصري براحتك حد ماسكك هو إحنا هنروح من  
بعض فين ، ولّا إيه؟
- علم من ردي هذا عليه أنني على نفس خطى تفكيره وهو ما جعله أن  
يكون أكثر جدية قليلاً ، قال :
- طبعاً عندك حق إحنا هنروح من بعض فين وعلشان هيك ، أقصد  
علشان كده أنا طلبت منك إننا نتقابل على انفراد
- قلت له بنفس درجة الجدية :
- أعتقد أن الموضوع إللي جاييني مخصوص علشانه يخص بشكل  
أو بآخر لينا
- ده صحيح يوم الحفلة لما كنا بنرقص سوا مع بعض حكّلتني عنك  
شوية وحسيت إنه علاقتي بلينا لا يمكن تنجح إلا إذا علاقتي بيك  
نجحت ويتصور إنكم زي ما بتقولوا هنا في مصر أكثر من إخوان مش  
مجرد أصدقاء

- من حيث إننا أكثر من إخوات ومش مجرد أصدقاء ده حقيقي،

أنا مش هسألك سيرتي جت إزاي ولا إيه المناسبة ولا حتى إتكلتكم في إيه

لا لا لا خالص أنا هسألك سؤال واحد بس وبتمنى تكون صريح معايا

- ولو اتفضل

- إيه سبب اهتمامك بلينا للدرجة دي وإللي خلاك تنقل إقامتك

من فندق سميراميس لعندنا هنا في الهيلتون؟ واشمعنا لينا بالذات؟ ما

إنت أكيد مر عليك بنات كتير في أمريكا

ارتبك لثواني قليلا وقال:

- تقدر تقول إنني بعرف أقدر الجمال، صحيح إنني حياتي

بأمريكا خلقتني أشوف كتير ويمكن العلاقات بين أي اتنين تكون سهلة

لكن مع لينا كان الأمر مختلف، لينا من النوع إللي تدخل قلب الواحد

بسهولة ويعتقد إن بحكم معرفتك بيها تعرف ده، ولأنها دخلت قلبي

من أول لحظة مقدرتش أتمالك نفسي من إنني أروح لها وأطلب منها ترقص

معنايا رغم إنني عارف أن تصرفي ده ضد طبعكم هنا كمصريين إنه واحد

غريب يطلب من واحدة لا يعرفها ولا تعرفه ترقص معاها في مناسبة عيد

ميلاد شئ غريب بالنسبة لكم أنا عارف، لكن إللي عايزك تتأكد منه إنني

معجب بيها كتير كتير كل إللي بتمناه إنني أقرب منها أكثر، مش عايزك

تفهمني غلط بس زي ما بيتقال في المواقف إللي زي دي، أنا غرضي

شريف

- طيب انا دوري ايه في كل ده؟ إنت عايز مني ايه بالضبط؟
- مش أكثر من إننا نكون أصدقاء وإنك تكون وسيط بيني وبين

لينا

لم تفاجئني طريقته الغريبة في عرضه هذا، ليس بعد موقفه في حفلة عيد الميلاد لذا أصبح من الطبيعي أن أتقبل أي تصرف أو كلام غريب الأطوار منه حتى وإن كان غير متوقع، سكنت لعدة دقائق أفكر ملياً في كلامه وقلت له:

- أنا ههلك كلمتين تحطهم حلقه في ودانك، لينا بنت جميلة وظريفة وناعمة من الآخر رائعة، عن نفسي أنا لا يمكن استغنى عنها أبداً كآخيت ليا بتوحشني لما بتغيب عني أو مسمعش صوتها في يوم، وزي ما أنت شوقتها بالضبط و اتعرفت عليها وعرفت طريقة كلامها وتعاملها ويمكن كمان حياتها، لينا من الآخر حد أنا واثق ومتأكد إنك لا يمكن تكون شوقت حد زيها ولا هتشوف يمكن لأنني شايفها جوهرة غالية نادرة الوجود الأيام دي برغم كل الظروف والمشاكل إللي مرت بيها، لينا بتحب الحياة و البشر وعمرها ما بخلت على حد حتى ولو بابتسامة غابرة، جدعه وبتشيل هموم الناس ولا يمكن متساعدش حد، إنت قلت إنك معجب بيها وأنا بحترم صراحتك دي لكن عايز ألفت نظرك لحاجة، لو إنا بتحبها صحيح وعايز تقرب منها بجد يبقى لازم تكون عارف إزاي تحافظ عليها لأن صدقني قلبها ده غالي ولا يمكن تسلمه لحد

بسهولة فأرجوك متحاولش تكسره.

- للدرجة دي يا سيد شادي؟

- وأكثر، يمكن أنا بقولك كده لأنك واضح معندكش فكره قد إيه

الإنسان ممكن يعيش حياته كلها ومايجتمعش بحد زيها

كانت عينا جاد الترك تشع وتلمع إعجابًا كلما أتكلم عن ليننا وأصف له  
عن شخصيتها وطباعها، كان يستمع باهتمام شديد وقلما ما كان يسأل أو  
يستفسر، قبلت صداقته وقررت أن أعطيه فرصة بعدما كنت لا اثق به  
بسبب حكمي عليه المسبق، وعندما انتهيت من حديثي قال:

- طيب تعتقد أنا ممكن أقابلها إمتة؟

- ده شئ يرجعلها هي أنا لا أملك إني أحدد قراراتها لكن إللي

أقدر أكدهولك إني هنقلها حقيقة مشاعرك وتفاصيل حوارى معاك

بلكنته اللبانية قال:

- هي بتعرف إنك جاي لعندي؟

- لا أبدًا، هي آه فعلا عارفه إنك نزيل هنا في الفندق لكنها في

الواقع مشغولة مع المدير في مكتبه

- طيب إنت بتقبل إني أعطيك رقم تيلفوني الخاص وتكلمني؟ ده

طبعًا بعد ما تكلمها الأول وتقبل إنها تشوفني أو لا

- أكيد طبعًا ومتقلقش، إللي فيه الخير يقدمه ربنا

أنبعت نفسي إنه بتصرفي هذا مع جاد الترك بمتابة شكر اللينا عن كل

ما فعلته معي طوال مدة معرفتي بها، شعرت أنه لن تمر دقيقة في حياتها تشعر فيه بالوحدة حينما لا أكون متواجداً معها، ورغم أنني السبب في سعادة جاد الترك بقبولي طلب صداقته ووساطتي بينها وبينه إلا أنني السبب أيضاً في زيادة الخوف بداخلي من فقدانها بشكل أو بآخر. خرجت من غرفته مع وعود له بأنني سأتولى الأول، توجهت إلى الريسبشن وكانت لدينا حاضرة مع لمياء وطه تعمل معهما حتى أعود، كانت العيون ترصدني والكل يتساءل ما الذي دفعني لأترك مكاني في العمل لأقابل شخصاً ما في غرفته؟

لم تنظلي حيلتي على لمياء التي بدورها أخبرت لي أنها أتتني توجهت إلى أحدهم في غرفته، أيقنت لي أنها أتتني قد قابلت جاد الترك ورغم ذلك لم تظهر علامات الفضول على وجهها عكس لمياء التي كانت تغمز لي بعينها رغبة منها في معرفة التفاصيل أما طه فكان هادئاً لأنه يعلم أن ما حدث وسوف يحدث سيصله من لمياء.

سرعان ما انقضى الوقت وانفردنا مجدداً ولكن هذه المرة لم نذهب إلى منازلنا، أصرت لي أنها في ذلك اليوم أن نذهب إلى كافيه أميجوس الذي توسط الشارع الذي تسكن فيه في حدائق الأهرام، لم تكن إضاءة الكافيه ساطعة، التصميم الداخلي وأدوات المائدة لا تكاد تعبر عن هوية المكان، تنبعث في أرجاء المكان أغاني مملة تصدر من شاشات العرض المعلقة، ورغم ذلك فإن الديكور قد صمم بعناية بالغة تظهر مداً التكلفة العالية التي تكلفها

صاحب المكان، لم يكن المكان يعج بالزبائن إذ كان يتكون من طابقين، الطابق السفلي كان يشغله القليل ربما مائتين أو ثلاثة على الأكثر، اختارت لنا أن نجلس في الطابق العلوي الذي لم يتواجد فيه إلا سوانا فقط، جلسنا على إحدى الطاولات وسرعان ما أتى النادل قائلاً:

- منورين المكان يا فندم تحبو تشربوا إيه؟

قالت لنا:

- قهوة مطبوط

- والباشا؟

- شاي

- تؤمروني بحاجة تانيه حضرتك؟

سارعت له لنا بالرد قائلة:

- لا ميرسي شكراً

أخرجت لنا من حقيبتها علبة السجائر وولاة، أخيراً ظهر عليها التوتر قليلاً كما بدا عليها أول مرة حينما تحدثنا عن والدها، أشعلت السيجارة ونفثت دخان وكأنها تنفث ما بداخلها عمداً، وعندما هدأت قليلاً نظرت إليّ وقالت:

- إنت روحته يا شادي صح؟

- حصل فعلاً

حكيت لها كل ما دار بيني وبين جاد الترك في حوارنا وعن مدى

رغبته في القرب منها وإعجابه وطلبه لفرصة لقائها في أقرب وقت ممكن،  
لم تكن لدينا غاضبة من لقائي به كما لم تبدي أي انفعال من أي نوع حيال  
الكلمات التي صدرت من جاد الترك، كانت ملامحها نقية صافية وهي  
تسمع مني ما دار من الحوار، شعرت في داخلها أن جاد يكن لها الحب  
بشكل أو بآخر وأن تصرفه في أن ينقل إقامته إلى فندق الهيلتون قد تعدى  
مرحلة الإعجاب بها، وكأي فتاة حينما تتعرض لمثل هذا الموقف أو  
حينما تسمع كلمة حب أو ترى تصرف ما بداعي الحب تدعم عيناها  
وتشعر بأن كيانها ووجدانها قد زلزل، تالأت عيناها بالدموع لتشع نوراً  
من مقلتيها ولم أجد نفسي إلا وأنا أمسك بمديل ورقي لأمسح تلك الدموع  
بيدي وقلت لها:

— ليلى، القرار دلوقتي قرارك حاولي تفكري الأول قبل ماتبردي

تمالكت نفسها وقالت:

— أنت شايف إيه؟

— اللي أنا شايفه إن الكورة في ملعبك دلوقتي جاد طلع إللي جواه

واعترف بإعجابه بيكي مع إنني شايف إن الموضوع مش مسألة إعجاب

وبس، هو طالب يقابلك وفي المكان و الوقت اللي إنتي عايزاه، وبناء على

كده هتصل بيه وهقله

صمتت وهي تفكر ملياً:

— ليلى، أرجع وأقولك بلاش تسرع في العلاقة خدي بالك، جاد ده



من دنيا وانتى من دنيا ثانيه خالص وده كفيلا انه يخلق مشاكل أيا كانت  
نوع المشاكل دي

- يمكن عندك حق بس الحب دايمًا بيكون أكبر من المشاكل حتى

لو الطرفين من عالمين مختلفين عن بعض

صمتت لثواني وقالت:

- أنا أخذت قراري، أنا موافقة إنني أقابله

- فين وإمتة؟

- في المكان إللي أول مرة إتقابلنا فيه، في blue Nile مطعم دار

القمر بكره بعد الشغل مباشرة أنا وإنت هتكون هناك، حاول تدبرله  
عربية توديه لهنالك وبكده هتكون بعيد عن العيون قدر الإمكان.

- وهو كذلك بس المهم هل إنتي مقتنعة بالخطوة دي؟

- مقتنعة لأنني حاسه إن في حاجة بتربطني بيه وتربطه بي،

حاسه إنني عايزه أسمع منه كثير، حاسه إن لأول مرة أعرف معنى  
الحب، فإكر لما كلمتك ليلة حفلة عيد ميلادي عنه؟ كنت حاسه إن جواه  
مشاعر ناحيتي كنت بكذب نفسي لآخر لحظة بس اتضحلي العكس في  
الآخر، صدقني يا شادي أنا مقتنعة وراضية تمامًا

- طيب خير إن شاء الله

عدت إلى منزلي وأنا مقتنعة بأن الله وحده يعلم النوايا الحقيقية وراء  
تلك العلاقة وكما بدأت أمام أعين الجميع فإن الله وحده أيضًا يعلم كيف

ستنتهي، نفذت رغبة لنا واتصلت بجاد الترك وأخبرته بالمكان والموعده، شعرت بأنه قد قفز فرحاً بهذا الخبر وكأنه كان ينتظره على آخر من الجمر وقال:

— لك الله يعطيك ألف عافيه على هيك خبريه حقيقي ما بعرف كيف أتشكر

— لا شكر على واجب لنا دي أختي وأكثر من أختي كمان وإننت باين عليك شاب ابن حلال وتساھل

— ميرسي إلك كتير كتير بالمناسبة راح تكون موجود معنا؟

— أكيد طبعا هكون موجود ولو فرصة نتعرف على بعض أكثر

— بتشرف طبعا

— هظبطك عربية على الساعة خامسة تاخذك من الفندق للمكان

وترجعك تاني متقلقش كل حاجة مرتبة مسبقا

— يعطيك العافية والله ما بعرف كيف أتشكر كترت جمائلك عن

جد

— متقولش كده وبعدين اتفقنا راح فين؟ ياراجل إنت الدم المصري

بيجري في عروقك حاول تنسى اللهجة اللبناني شوية

ضحك وقال:

— لا تاخذني بس من الفرحة نسيت لهيك إتكلمت معك لبناني

ثم باللهجة المصرية أرف:

- وبعدين أنا محظوظ إن ليا اتنين بقوا قريبين مني أتكلم معاهم

بلغة أم الدنيا

ولكي أنهى معه الحديث قلت له :

- جهز نفسك يا جاد وزي ما وصيتك حافظ على قلب ليننا لأنك

مش هتلاقي زيه أبدًا

- ولو إنت بتقول إيه دي في عني

- أتمنى ده ، تصبح على خير

ربما أكون قد ساهمت في تقربهما في بداية الأمر ، وربما أكون قد

أعطيت جاد الترك فرصة ليثبت نفسه ويصح الصورة الخاطئة التي

كونتها عنه في ذهني ، إلا أن الخوف على ليننا لازال قابعا في داخلي ، لم

أكن أملك سوى أن أدفنه في داخلي فقط ولا أظهره لهما حتى لا أتهم في

نهاية الأمر أنني قد عثت خرابا بينهما ، من ناحية أخرى فإن ما يعزيني

و أراحني نفسيا هو أنني قد حذرتها من الانجراف سريعا مع جاد في هذه

العلاقة ، كنت آمل وكان ذلك هو أملتي الوحيد أن تحكّم عقلها قبل أن

تترك زمام الأمور لقلبيها .

كانت الدقيقة تمر على ليننا كأنها دهر من الزمن ، هذه المرة لم تكن

مع الأستاذ حسن في مكتبه بل كانت معنا في الريسبشن منذ الصباح على

أمل أن تراه هنا أو هناك ، كان جسدها فقط متواجدا قربي ، أما عقلها فقد

كان في مكان آخر ، لم تكن ليننا متماسكة قربي ، حتى أنها بالكاد كانت

تركز مع النزلاء والمترددين علينا لخدمتهم، حاولت في لحظة من اللحظات أن تخرج من الريسبشن للبحث عنه في الفندق حتى وإن تطلب الأمر أن تصعد إلى غرفته، أوقفتها وقلت لها بصوت خافت:

- ليينا إعقلي شوية بصي حاواليكي إحنا هنا مش لوحدنا، أي تصرف منك هيذيد الشكوك و القيل و القال إحنا مش ناقصين، كلها كام ساعة ونخلص شغل ونقابله

مضى على محاولتها تلك حوالي نصف ساعة بعدها قالت لي:

- بعد إذنك يا شادي

- ليينا؟ وبمدين؟ ؟

- متقلقش أنا رايحه الحمام

نظرت إليها عن كثب لأرى أنها ليست على مايرام وقلت:

- طيب عامة ياريت ترجعي هنا على طول

بمجرد توجه ليينا إلى الحمام رأت لمياء أن الفرصة مناسبة للحديث

معي لإشباع فضولها الذي كان يأكلها منذ البداية، قالت:

- تعاللي بقي وفهمني

- أفهمك إيه؟ إيه يا لمياء ده وقته؟

- آه وقته إنت شايف الشغل مقطع بعضه يعني ياسيدي إعتبر

إننا في بريك أو حاجة

- أنا مش فاهم إنتي بتفكرين بدماعك دي إزاي بصراحة؟

- بص بقی ومن الآخر حکایة إن لیک صاحب معرفة طلعت تقابله
- ده مدخلش دماغی خالص إنت طلعت قابلت جاد
- وسواء هو ولا غیره إیه المشكلة؟
- المشكلة إن لینا نعرفها من سنين وعمرها ما اتغيرت بالشکل ده
- وبصراحة شامه ريحة كده مش مظبوطة
- رددت عليها بنبرة عصبية قائلاً:
- ليا، حاسبي على كلامك في إيه؟ قلتلك مافيش حاجة وقلتلك
- طلعت أقابل حد معرفة هو إيه مافيش حد في الفندق كله غير جاد الترك؟
- انكمشت ليا في نفسها ولم ترد على كلامي في حين راقب طه الحوار
- بيني وبينها كعادته دون أي تعليق، عادت لینا مجدداً وكان واضحاً أسفل
- عينيه قطرات صغيرة من الدموع، نظرت إليها مجدداً عن كثب لتقول
- هي لي:

- مافيش حاجة يا شادي أنا كويسة
- نفسي أضدقك بس للأسف دموعك فضحاکي
- متخافش أنا بس غصب عني كده لاقيت نفسي بدمع
- لینا إجننا قدام الناس والموظفين زمايلنا أرجوکی إمسکي نفسك
- شوية مش كده
- حاضر
- بقولك إيه، ليا حاولت تعرف موضوعي إمبارح مع جاد و

بدأت تحس بأن في حوار بينك وبينه وأنا قولت لها إن مافيش حاجة  
فخدي بالك لو جت تفتح معاكي الموضوع

- أنا كنت متوقعة ده هو طبعها ولا هتشتريه يعني؟

انتهت نوبتنا في العمل وطلبت مني لينا سرًا أن أطمئن على السيارة  
التي من المفترض أن تقل جاد من الفندق إلى المركب النيلي والعكس، ولم  
نرحل أنا وهي إلا عندما وصلت السيارة أمام باب الفندق.

وصلنا قبل جاد الترك إلى المركب النيلي وكانت لينا قد حجرت مسبقاً  
طاولة لثلاثة أشخاص، أخذت في تعديل حمرة وجهها ومكياجها ثم  
أخرجت من حقيبتها عطرها الباريسي المميز لتعطر به، كان لديها  
حرص شديد على أن يكون ذلك اللقاء مميزاً بالنسبة لها، كان المكان أقل  
صخباً من المرات الماضية التي تواجدت فيها في هذا المكان، الموسيقى كانت  
أكثر هدوء، والزيائن من حولنا كانوا يجلسون فرادى وأزواجاً، هناك  
شخص يكتب على حاسوبه المحمول، فيما يكتب آخر رسالة على هاتفه  
الجوال، وآخرون بعضهم يتسامر والآخر يلتقط الصور لبعضهم البعض  
بينما أصناف الطعام والشراب على مائدتهم، أما أنا ولينا فلم نتحدث  
كثيراً كعادتنا نظراً لتوترها الشديد رغم محاولاتي المتكررة في تهدأتها  
سلفاً، كانت تنظر إلى ساعتها باستمرار وكأنها في انتظار القدر وأحياناً  
أخرى كانت تترصد الناس من حولنا ظناً منها أن جاد الترك قد يكون  
حاضراً دون أن يكون قد لفت انتباهها، أخيراً وقفت وقلت:

- يلا بيتا يا شادي
- على فين؟
- حاسة إنه مش هيجي
- يابنتي استهدي بالله ده هو اللي طلب يشوفك ويتعرف عليك
- وإنتي محددة المكان والوقت ده إنتي مسمعتوش لما قولتله إنك موافقة، ده كان هابن عليه يطير من الفرح
- جعلتها كلماتي تلك أن تطمئن قليلا لتجلس مجدداً وهي تنظر إلى ساعتها، أمضينا ساعة تقريباً على هذه الحالة حتى ظهر جاد الترك أخيراً واقفاً عند الباب محاولاً البحث عنا، فقفزنا من أماكننا معاً، وهولت إليه وأنا نفسي أشعر بقليل من الإرهاق، كان جاد الترك في أبهى حلقه تلك الليلة، لم يكن رسمياً بمعنى الكلمة، كان بسيطاً وغير متكلفاً على الرغم من أن ملبسه يوحي بأنه من إحدى الماركات العالمية باهظة الثمن، على ما أتذكر كان يرتدي قميصاً أزرق اللون مفتوحاً على تيشرت أبيض اللون وبنطال جينز أزرق اللون وساعة في معصمه الأيسر من نوع فيراري ربما لم أر لها مثيلاً من قبل، وعن ظهره فلا أذكر مصدره بالضبط لكنني أذكر أن ظهره كان مميزاً ويعلم كيف يرضي ذوقه الخاص كحال لينا أيضاً في مثل هذه الأمور، كنت أترصد رد فعل لينا حينما جلس معنا جاد الترك، تلك التموجات الناعمة في صوتها وسط كل تلك الأصوات المحيطة التي اتسمت بالضجيج مقارنة بصوتها تلك اللحظة، كنت أتتبع

رنات صوتها بأذني وحدها وهي تشكل كلماتها لتوجهها إلى جاد الترك،  
لكن كان خجلها دائماً ما يجعلها تتلعثم، ولأكسر تلك الفجوة التي  
استمرت لدقيقتين قلت:

- منورنا يا عم جاد

- بنوركم والله معلى إذا تأخرت عليكم بس الطريق كان رحمة

شوية وده كان سبب تأخيري لولا كده كنت جيت بدري

- لا أبداً ولا يهكم ما حصلش حاجة

ثم نظر إلى ليلى وقال:

- إزيك يا ليلى إيه الشياكة دي؟

- الحمد لله ميرسي على المجاملة

- ما عندكيش فكرة لما شادي اتصل بيا وقال إنك قبلتي تقابليني

كنت سعيد قد إيه، وساعدتي زادت أكثر وأنا قاعد معاكي

ابتسمت ليلى وقد احمر وجهها خجلاً

- يعتقد إن دي فرصة إنني أعرفك بنفسي أكثر وأتعرّف عليكي

يمكن يوم عيد ميلادك كان التعرف عابر بالنسبالك لكن بالنسبالي كان

إصرار إنني أقرب منك

بصوت خجول قالت:

- أكيد طبعاً ياريت

حاولت أن أضفي على لقائهما بعضاً من البهجة إذ قلت له مازحاً:



- بس قبل ما تتعرفوا على بعض اسمحلي أقولك عيني عليك

باردة ده إنت بتتكلم مصري أحسن مننا أهو

ضحك وقال:

- يعني يحاول إنني ماتكلمش لبناني قدر الإمكان ويتمنى إن

بفضلكم لهجتي المصرية تتحسن أكثر

وقبل أن يكمل جاد كلامه قاطعته لبنا قائلة:

- ممكن تكلمني عن نفسك؟

نظر إليها مبتسمًا وقال:

- أكيد، أكيد طبعًا وهبدأ من الأول كمان اسمي جاد يوسف الترك

لبناني أمريكي يمكن زي ما قلتك قبل كده أنا بشتغل مهندس ومصمم

ديكورات وعندي مشروع هناك في نيويورك تقدرؤا تقولوا كده زي مكتب

بس الحمد لله ليه اسمه وسمعته، وحيد وماليش إخوات، والدي لبناني

وأمي مصرية ويمكن دي أول مرة آجي فيها مصر

قالت له مستغربة:

- معقولة يا جاد؟

- آه يمكن أنا جيت تنفيذًا لرغبة والدتي في إنني أتعرف على

جدتي و خالي وعيلة أُمي كلها

- هو أنت مشوفتهمش ولا مرة في حياتك حتى وأنت صغير؟

- للأسف لا، لأن أُمي ولدتني في نيويورك وعاشت حياتها كلها

مع والدي هناك وبالتالي عمري ماخرجت من أمريكا ، كانوا هما يبشوفوا  
صوري إيلي أُمي كانت بتبعتلهم بس ماكنتش بتلاقني أي استجابة منهم  
سألته أنا :

- وليه ماكنش في استجابة منهم؟  
- لأنهم للأسف ماكنوش موافقين إن أُمي تتجوز والدي من  
الأساس، إنت عارف العادات والتقاليد ماكنتش راكبة على بعض  
وبالتالي حصل خلاف عائلي كبير

- وبالتالي إنت جاي تحل الخلاف ده  
- مش بالضبط وصية والدتي قبل ما تتوفى إنني أفضل على صلة  
بيهم بس خايف إن صبري مايكونش كبير واستحمل  
تذكرت في ذلك الوقت أن لينا قد أخبرتني سابقاً بأن مدة إقامة جاد  
الترك هي شهر وقبل أن أسأله ذلك السؤال سبقتنني لينا إليه قائلة :

- طيب وتفتكر إن شهر مدة كافية؟  
- قصدك إيه؟  
- أقصد موضوع عيلة والدتك و موضوعنا إحنا الاثنين  
- موضوع عيلة والدتي مقدور عليه أما بالنسبة لموضوعنا فأنا  
ممكن أمد الإقامة لو حبيت ولو على الشهر أنا أقدر أخلي كل دقيقة في كل  
يوم سنة بالنسبالتنا

سكنت لينا دوئما تعليق ، من جهتي فقد رأيت أمامي رجلاً عاشقاً في

يده زمام الأمور ولديه من الإصرار أن يكون إلى جانب من عشقها حتى ولو كانت في آخر أسقاع الأرض لذا لم أرى أي مشكلة فيه سوى شخصيته التي قد تظهر غير مريحة إلى الآخرين، ومع ذلك فإن شخصية ليندا لها القدرة على السيطرة مهما بلغ عنفوان أو جموح أي شخصية أمامها وتأكيداً على إصرار جاد قال لها:

- ليندا أنا هلك بصراحة، أنا معجب ببيكي جداً من أول يوم شوقتك فيه، حاجات كثيرة جداً جذبتني ليكي ويمكن زي ما شادي قالي أنا عمري ما لاقيت ولا هلاقي زيكي، يمكن طريقتي في تقديم نفسي غريبة شوية بس معلنش في الأول وفي الآخر يهمني راحتك في العلاقة بيننا شعرت أن ليندا لديها من الكلام الكثير لتبوح به إلى جاد، لقد فتح باب المشاعر بينهما أخيراً وأعلم تماماً أن ليندا تكن في داخلها الحب والإعجاب تجاه جاد كما يكن لها الحب والإعجاب، لذا استأذنت في أول لحظة مواتية ووقفت على قدمي، وعندما فعلت ذلك صاحت في ليندا في فزع قائلة:

- إنت رايج فين وساييني؟

- متقلقيش راجعلك تاني

- استنى محتاجة أقولك حاجة

تبعنتني وهي تهزول ورائي بكعبها العالي حتى أوقفتني عند باب القاعة وهمست بطريقة بائسة:

- أنا خائفه

- من إيه بس؟

قالت وهي تنظر إلى جاد الذي كان ينظر إلينا بدوره وهو يجلس في منتصف القاعة:

- حاسه إن في حاجة غلط

- غلط في إيه إيه الغلط؟ نسيتي لما قولتيلي في التليفون ليلة عيد

الميلاد ولمحتي إنك معجبة بيه وأنه نصك الثاني، يبقى خلاص، المسألة كلها إنك مرتبكة زي ما هو مرتبك بالضبط

- إيه ده بجد؟ هو باين عليه الارتباك؟

- وبنفس درجة ارتباكك أنا إللي كلمته وأنا إللي قعدت معاه

وعارف بقولك إيه

- مش عارفه بقي

نفذ صبري وانفجرت:

- على فكرة انتي بتتصرفي ولا العيال كده إنتي باينه إن

معندكيش ذوق يلا يا بت بلاش دلج جاد قاعد لوحده هناك ومستنيكي فرصتك قدامك بلاش تضعيها.

نظرت إلي في سكون لا ينسى واستدارت لتعود إليه مرة أخرى،

راقبتهما وأنا وأقف بالقرب من باب القاعة لدقيقة أو لدقيقتين ثم

خرجت، ليس خارج المطعم وحسب، بل خارج المركب النيللي بأكمله،

وقفت كالسابق عند طرف الجسر الذي يربط المركب بالشارع والرصيف المقابل، وبعد استرجاع كل ما سبق من أحداث في تلك اللحظة تذكرت إنه قد كتب علي أن أكون شاهداً على مشاعر الآخرين، مرة أخرى، كنت في الداخل وفي الخارج أيضاً.

لم يكن هناك ما يثير الاهتمام خارج المركب النيلي، كان الناس يذفون ويخرجون دون أن يلتفت إلي أي أحد، باستثناء القمر الذي أمضيت وقتاً طويلاً أحملق فيه دونما ملل، شيئاً فشيئاً اقتنعت بأنه عندما تكون هذه الفتاة في قمة سعادتها أو عندما تقبل على خطوة جديدة في حياتها الشخصية أو العملية يكون القمر كاملاً مكتملاً يشع نوره في سواد الليل وسط النجوم، ولم أر الأمر من زاوية خرافية بل كنت أراه واقعاً من أحداث ذات علاقة بالقصص والروايات الخيالية، وبينما كنت أفكر في مصير ليلى وذلك الحب الفجائي الذي ظهر بظهور جاد الترك في حياتها، سمعت صوت مألوفاً أجبرني على الخروج من حالة صفاء الذهن والتفكير، كانت سحر مجدداً

— معقولة؟ أنت هنا يا شادي؟ واقف بره كده ليه؟

— لا أبداً، كان معايها تليفون بس وجوه دوشه فحبيت أخرج

أتكلم في الهدوء ومنه أشم هوا

— إنت لوحدك ولا معاك حد؟

جاوبتها بفتور:

- لو لوحدي أكيد مش هاجي مكان زي ده أنا جيت مع ليلى

وقاعدين في دار القمر

ابتسمت ببهجة وقالت:

- بجد طيب معقولة ساييها لوحدها وواقف هنا؟

- على فكرة ليلى معاها حد مش هينفع نقاطعهم

- تعالى بس

وأمسكتني من يدي لتجرني مجبراً معها الى الداخل، وعندما اقتربنا منهما كان الوضع مختلفاً تماماً. مقارنة بأول لقائهما معاً، كانا ينظران إلى بعضهما البعض وكأن سؤالاً قد سئل لتفيض معه مشاعرهما الجياشة وقد اختفى كل أثر للارتباك، كان وجه ليلى ملطخاً بدموع السعادة بالحب أما جاد الترك فقد كان يتوهج تماماً، ودون أي إيماءة تصدر منه كانت الفرحة ظاهرة عليه بشكل واضح

- ليلى إزيك يا قمر؟

تفاجأت ليلى بدخولها فجأة لتقطع عليها وعلى جاد ذلك الجو الرومانسي بينهما، ولم تجد ليلى أمامها سوى أن ترد عليها السلام وتعرفها على جاد، صافح جاد الترك وسحر بعضهما البعض وكان واضحاً من خلال نظراتها التي دارت بين ليلى وجاد أنها قد شعرت بشئ يدور في الأحياء بينهما وقبل أن تنبس سحر بأي كلمة قلت لها:

- تعالي يا سحر نقعد مع بعض شوية

- يجد؟ ياريت

ثم وجهت كلامها للينا:

- شكلك مشغول هكلمك بعدين ياروجي

كانت شخصية سحر من النوع المفتوح على الآخرين، لا يمكن لأي شخص يمر أمامها إلا وتتعرف إليه وإن أمكن تعقد معه علاقة، على الأقل لها ذلك النوع من المجتمع الذي تعرف كيف تعيش فيه، كان ملبسها يليق بمركب نيلي ليلي، ذلك القميص الأبيض ذو الصدر المفتوح قليلاً ليبرز مفاتن أنوثتها و الجيبة السوداء القصيرة والحذاء ذو الكعب العالي دون نسيان مجوهراتها التي زينتها لتضفي على مظهرها وعلى الناظر إليها جمالاً أخاذ، لدقائق لم تشح بنظرها عن لينا وجاد حتى سألتني ما كنت أتوقعه:

- هو مش ده الراحل اللبناني اللي رقص معاها يوم عيد ميلادها

ولا أنا غلطانة؟

- ايوه هو

- أاااا، حاسه من منظر قاعدتهم مع بعض كده إنهم عاشقين

بعض

- سحر موضوع لينا وجاد ده توب سيكرت تكتمي عليه مش

غايرين حد يعرف إن بينهم علاقة دي حياتها

يتردد في صوتها وتلغثم قالت:

- آه طبعاً طبعاً حياتها وربنا يوفقها

ثم غيرت الموضوع

- قولي بقى إنت أخبارك إيه كده؟ أنا ليه مش بشوفك إلا كل

حين وحين وصدفة كمان؟

لم يكن حوارى مع سحر هادفاً أو ذا مغزى، كان كلامها عن ملابسها وعن مظاهر حياتها، كيف بدأت مشوارها الفني، وعن عدد معجبيها على صفحات التواصل الاجتماعي، لم تتحدث عن نفسها وعن حياتها الشخصية مطلقاً لذا فقد كانت دائماً شخصية غامضة بالنسبة لى.

انتهى حوارى مع سحر بانتهاء لقاء لينا وجاد، وبالنظر إلى وجههما سوياً كانا في قمة السعادة، شعرت سحر في تلك اللحظة أن عليهما الاستئذان من باب اللياقة وهو الأمر الذي جعلني أتنفس الصعداء، وعندما خرجنا نحن الثلاثة من المركب النيلي وعند السيارة الخاصة بجاد سألت من باب الاطمئنان وبشكل مازح:

- ها اطمئنونى كل الأمور تمام ولا إيه؟

ضحك الاثنان سوياً وهما ينظران إلى بعضهما البعض ليرد جاد قائلاً:

- آه الحمد لله، ما بتمناش حاجة في الدنيا دي كلها غير إني أكون

معاها على طول

- طيب حلو وانتى يا ست لينا؟

سكتت ولم تعلق خجلاً فقلت لها:



— بس كده يبقى زي ما بنقول السكوت علامة الرضا

تلك اللحظة طبع شكل لنا وهي تضحك ووجهها يشع نوراً ورضا في ذاكرتي أبداً، وكأن كل أشكال الهم والحزن قد زالت ليصبح كل شئ من الماضي وفي طي النسيان، أصبح الآن جاد هو كل شئ بالنسبة لها، تتحدى به العالم بعد أن كانت تتحدى العالم بنفسها فقط، أصبح لديها سبب للمضي قدماً، ذكرني ذلك الموقف بما قاله لي أبي ذات مرة إنه مهما بلغت درجة الحزن والاسى في حياتك ومهما تعرضت من صعاب و أزمات، يوماً ما ستلتقي بشخص ينسبك أملك في الحياة، ولكن أيّ كان هذا الشخص في حياتك، إن قرر البقاء معك فتمسك به، وإن رحل، احرص على أن يكون ذكرى في حياتك ليس إلا، تلك اللحظة تمنيت أن يبقى جاد في حياتها حتى تدوم تلك الابداسية في وجه لنا إلى الأبد.

أصبحت علاقتي قوية بجاد الترك بعد لقائه العاطفي الأول بلينا، تدريجيًا أصبحت مقربًا منه لدرجة كافية تجعله يبوح لي بأي شيء تقريبًا، كان اتصاله بي يوميًا ليبحرني عن مواعيد اجتماعه مع لينا وأحيانًا أخرى ليسألني عن طبيعة الهدايا التي تليق بها وعن الأماكن المناسبة للقائهما، كان جاد الترك حريصًا دائمًا على أن أكون متواجداً معهما قدر الإمكان، وربما يكون هذا غريباً بعض الشيء لما فيه من إحراج لكن بالنسبة لجاد كان يريد أكبر قدر من الدعم لهذه العلاقة من خلالي، ومن وجهة نظره كان السبيل الوحيد لذلك هو أن أكون حاضراً شاهداً على علاقته بها.

أما لينا فلم تخبرني بما دار بينها وبين جاد تلك الليلة، كما أنني لم أسألها، وتركتهما تبخر بمشاعرهما في بحر الحب، كنت حريصاً على ذلك المقدار الكبير من خصوصيتها لاقتناعي الشخصي أن الفتاة بطبيعة الحال عندما تحب شاباً فإنها تخفي حبها في قلبها المني بالأسرار المتواترة، وتحاول بكل جهد لها أن تجعله في قلبها، مهما حاولت أن تصرح به، في النهاية هناك دائماً مكان مغلق للأسرار.

وفي اليوم التالي من اللقاء كانت لينا تبدو أكثر نشاطاً وسعادة في العمل، للمرة الثانية لم تكن مع الأستاذ حسن في مكتبه، وهو ما أثار

استغرابه واستغراب طه ولياء، فهي قلما ما تعمل معهما في الريبشن، حتى إبراهيم الذي يرى كل شئ بأم عينيه ويتعامل مع الأحداث الجارية كأهداف سهلة للمعرفة كان يرى لنا كما لم يرها من قبل، كحال الجميع الذين حاولوا أن يفسروا ما طرأ عليها من تغيير دون أي جدوى، بحكم قربي منها كان التفسير الوحيد هو أن تكون الفرص سانحة ليها لرؤية حبيبها دون أن تكون معزولة عنه، وأتذكر أنه في لحظة من اللحظات في ذلك اليوم خرج الأستاذ حسن من مكتبه وقال لها:

— إيه يا ليلى سايباني لوحدي ليه إنه رده؟ ده حتى مضبحتيش عليا ينفع كده؟

ردت عليه بلباقة وهي تبتسم له:

— معلش يا رينس لاقيت الشباب هنا الشغل كتير عليهم فقلت أساعدهم وأهو بالمرّة أتابع واضبط شوية حاجات كده  
نظر لها نظرة راضية وقال:

— طيب ياستي ربنا معاكي، شدو حيلكم يا شباب عايزين الهمّة  
مش هو صيكم

وبرغم أنها قد أضفت علينا أجواء المتعة في العمل لتتغلب على التوتر والضغط المستمر، إلا أن ذلك لم يرح لياء نفسياً إذ كان واضحاً عليها الانزعاج وعدم الاقتناع بما يدور من حولها. وأخذت في الحديث مع طه كعادتها عن ما يجري ويدور في الأجواء مع ليلى، وبما أنها تعرف أنني

قريب جداً من ليينا فلم تجرؤ أن تسألني عن حالها لتشبع فضولها، شئ ما بداخلي كان يخبرني أن لمياء كانت تضع احتمال وجود علاقة مع جاد الترك على الطاولة إلا أنها لا تملك البرهان الملموس لذلك.

لم يكن هناك أي ظهور لجاد الترك في الطابق الأرضي ما جعلني أطمئن لعدم رؤية هؤلاء القناصة من حولنا له فيهيجون كالبركان، جزمت أنه لا زال في غرفته وإن خرج فسيكون في أي مكان آخر عدا الطابق الأرضي، أما ليينا فكانت تمسك بهاتفها وتتحدث مع جاد عن طريق رسائل الواتس أب النصية وبحكم أنني كنت أقف بجانبها في الريسبشن كنت أقرأ بطرف عيني ما يرسله لبعضهما البعض، فعندما كان جاد يرسل صورة شخصية كرتونية تحمل كلمة **love you** يكون رد ليينا عليه بقلب أحمر كبير إلى جانبه إله الحب في الميثولوجيا الرومانية كيوبيد، وهكذا دواليك كان الحوار بينهما، سألته ليينا في إحدى رسائله له:

— أنت فين؟ أنا مش شايفاك لا هنا ولا هنا

— حبيبتي معلى أنا في الغرفة حالياً مقومتش لسه من السرير

— إنت كنت سهران بتعمل إيه؟ ده إحنا حتى مطولناش في قعدتنا

في النيل

— أكيد كنت سهران، جد يشوفك وميسهرش يا جميل كنت بفكر

فيكي

D:

- على فكرة أنا حاولت أدور عليكى إنتى وشادي على الفيس بوك

مش لاقىكم

- بجد؟ هبعثلك لينك الأكاونت بتاعي وبتاع شادي حالا

- حلو طيب ناوية على إيه إنهرده؟

- مش عارفه

- بفكر نخرج في مكان

- طيب خلاص سيبنى أرتبها لك وهكلمك

لاحظت ليننا أننى أراقبها وهي تراسل جاد بهاتفها فابتسمت وأرجعت خصلة من شعرها خلف أذنها وقالت:

- إيه يا شادي؟

- إيه؟ إنتى إللى إيه؟ يابختك ياعم بقى في إللى وآكل عقلك

خلاص

- طيب بس شوف شغلك خلىنا نخلص اليوم ونفتك بقى

مضى الوقت سريعاً بحيث لا أتذكر ما حدث بعدها لكنى أتذكر أن تلك الليلة لم تمض ساعة بعد دخولي إلى منزلي، إذ اتصلت بي ليننا لتخبرني بأنها اتفقت مع جاد الترك على قضاء السهرة في بودا بار بفندق سوفيتيل الجزيرة، وقد أصررت على أن أكون متواجداً معهما بحجة أن تلك الأجواء في هذا المكان لم أرها من قبل، وهو ما حدث، استجبت لإصرار ليننا ظناً مني أنها ستكون أكثر اطمئناناً لتواجدي معها خاصة وأنه في بداية

علاقتها مع جاد، أما جاد الترك فلم تكن لديه أي مشكلة مطلقة في وجودي من عدمه.

شعرت وأنا أدخل هذا المكان بمدى قزم حجمي في ذلك العالم الكبير، لوهلة من الوقت سألت نفسي سؤالاً، ما الذي يفعله شخص متواضع في نفسه وفي حياته في هذا المكان، بل وناقضت نفسي إذ تذكرت حينما قلت  
لينا:

( لينا.. جاد ده من دنيا وانتي من دنيا تانيه خالص وده كفيّل إنه يخلق مشاكل أيّا كان نوع المشاكل دي )

وبالنظر إلى حياتي قبل معرفتي بلينا تساءلت عن المجهول الذي ربما ينتظرني كنتيجة لتواجدي في هذا المكان، كان بودا بار مكان واسع وكبير لا يرتاده إلا الطبقة العليا وصفوة المجتمع، قيل لي إن له فروع واسعة في مختلف دول العالم، لفت نظري أن الديكورات الخاصة بالمكان ذات طابع أسيوي، كافيه ومطاعم، ودي جي له من الخبرة أن يعلم الأذواق الخاصة بمرتادي هذا المكان، كانت الفئة العظمى من المتواجدين هم من الشباب بداية من سن السابعة والعشرين وحتى الخامسة والثلاثين على أقصى تقدير، على الأقل هذا ما رأيته بعيني، ومع تعدد أشكال وأنواع الموسيقى وتلاعب المؤثرات الضوئية كان الجميع يرقصون في دوائر حول تمثال بودا الضخم الذي توسط المكان وكانهم من عبدة الأصنام.

لم يواجه جاد الترك أي صعوبة في هذا المكان من بداية دخوله كحالي

أنا، إذ شعر وكأنه في ولاية نيويورك تمامًا، وأخذ يتصرف بتلقائية و  
يرقص ويتمايل ويلهو ويقفز كالآخرين تمامًا، بدا لي أنه كان يرتاد مثل  
هذه الأماكن في نيويورك من خلال طريقة كلامه و تصرفاته، مجددًا أثار  
في نفسي الريبة والقلق.

أما لينا فقد كانت تشعر بسعادة بالغة وهي برفقة جاد الترك، كانت  
تتفاعل مع الأجواء بنفس درجة تفاعله، شعر جاد أنني لا أشعر  
بالارتياح لتواجدي في المكان وحاولت لينا معه أن تخفف عني وقالت:

مالك؟

المكان مش مريح خالص

يا شادي حاول تبسط نفسك شوية وتغير من حياتك أجواء

جديدة ومكان روش آخر حاجة فك كده

وضع جاد يده على كتفي وقال:

اسمع الحياة مش كلها جد خليك كووول خد اشرب

إيه ده؟

لا متقوليش إن في حياتك مشربتش خالص

دي الحقيقة فعلا

طيب خد من إيدي، جرب بس الشوية دول لو معجبكش

متشربش تاني

نظرت إلى لينا لأجدها تومئ برأسها لأقل منه تلك العزيمة النكراء

ولم أجد نفسي إلا مجبراً على القبول، كانت تلك المرة الأولى في حياتي التي أشرب فيها خمرًا، برغم أن طعمه كان غريباً إلا أن ماشرنته جعلني وبطريقة ما اندمج مع كل من حولي، الموسيقى صاحبة، الكل يرقص ويصيح بجنون، الأضواء بمختلف ألوانها تتخلل الدخان الصادر عن جهاز ينفثه باستمرار، كان كل شيء كضباب معتم يغلف كل شيء من حولي، كان جاد ولينا يرقصان مع بعضهما البعض، أما أنا، ولا أدري إن كان ذلك حقيقة أم سراباً من أثر الثمالة، وجدت نفسي مع سحر وهي ترتدي بدلتها الحمراء الخاصة بالرقص، كانت كل مفاتنها الأنثوية أمامي تتلألأ كما الأضواء من حولي، كانت ترقص وتتبايل بطريقة مزجت فيها الشرقي بالغربي، وجدت نفسي مسحوراً ومفتوناً بها لا أتحكم بنفسي مطلقاً، أرقص معها بلا توقف.

تلك الليلة سقطنا جميعاً في حمى من الجنون الكيميائي، دقائق من السعادة اندفعت منا جميعاً، فجأة بدأت أحب تلك الحياة الليلية أكثر وأكثر، جلست على إحدى الكراسي بعد معاناة من وصولي إليها وسط هذه الجحافل الجامحة وصراع مع الجسد المخدر، وأخذت أنظر بتمعن إلى كل من حولي، فتاة تشرب الويسكي والفودكا بلا توقف، ونادل لا ينفك إلا ويفتح الزجاجاة تلو الأخرى، وشاب يتبادل القبلات مع فتاته أثناء رقصهما وهكذا كان حال أغلب المتواجدين.

لم يكن لدي فكرة كيف وصلت إلى المنزل، ولكنني أعرف أنني استيقظت



ولدي شعور غير مريح ، شعور قوي يخبرني أن الليل كان رفيقاً لنا  
وجاد وحدهما فقط.

سأل الدكتور مصطفى مستغرباً من شعور شادي حول ما قاله :  
وحدهم؟

أه يا دكتور مصطفى لوحدهم

اعتدل الدكتور مصطفى في جلسته وقال :

وأنت عرفت ده إزاي؟

لقيتها بتتصل بيا الصبح و بتقولي أنا مستنيك أخذت الدش التمام  
وفوقت ولبست بدلتني ونزلت لقيت السيد جاد الترك قاعد جمبها في  
العربية وهو منتشي وسعيد كأن حد وصل لقمة إشباع رغباته ، منظره ده  
زاد من خوفي وشكوكي.

نظر له الدكتور مصطفى وهو يومئ برأسه مستنجباً ما يكون قد حدث  
بالفعل دون أن يعلق بكلمة  
هكم لك إلهي حصل

كان تواجد جاد الترك مع لنا في سيارتها وفي منطقة مسكنها بمثابة  
صدمة كبيرة لي ، فأخر ماكنت أتوقعه هو أن يقضيا ليلتهما سوياً في بيت  
لينا ، رغم تحذيراتي المسبقة والمتكررة من الانجراف سريعاً وراء هذه  
العلاقة ، تسمرت في مكاني للحظات ، وأخذ عقلي بهيم في تخيلات  
ليلتهما سوياً ، لتدور تلك الأسئلة الشيطانية في عقلي ، كيف ومتى ولماذا؟

أفاقني صوت بوق السيارة من شرودي لأسمع ليـنا تقول :

- بلا شادي أركب مافيش وقت

ركبت في المقعد الخلفي ولم أنطق بأي حرف طوال الطريق إلى الفندق وكانت ليـنا تنظر إلي من مرآة السيارة أثناء قيادتها، كنت عابسًا وحزينًا جدًّا ولم أكن أدري كيف أنفـس عن غضبي، و تساءلت عن الطريقة التي سأسألها بها، استنتجت ليـنا من خلال كل تلك المشاعر السلبية إنني أحتاج إلى إجابة مقنعة منها، وعندما وصلنا أخيرًا إلى الفندق ودخلنا نحن الثلاثة سويًا، كانت الأعين لا تزال ترصد ليـنا وقصتها مع جاد الترك لتتعاطم الشكوك حول تلك العلاقة التي تكاد أن تكون مشبوهة من وجهة نظرهم.

- بلا باي هشوفكم بعدين

هكذا ودعنا جاد قبل صعوده إلى غرفته لم يقل أكثر من ذلك، كانت عيني تراقبه حتى أقفل باب المصعد عليه وتسمرت مجددًا في مكاني، قالت لي ليـنا:

- شادي إنت فيك حاجة؟

نظرت إليها في عتب شديد ولم أرد عليها واكتفيت بأن أدير ظهري لها وأتوجه إلى الريسبشن لأبـاشر عملي، استمررت في ردة فعلي تلك جتى منتصف الليل ومن شدة الضيق استأذنت من الأستاذ حسن لأخذ قليلًا من الراحة ومن ثم أتابع عملي، وجدت نفسي مضطرًا إلى الخروج خارج

الفندق بأكمله وأثناء خروجي قال إبراهيم:

- إيه يا نجم مالك على الصبح؟

- مافيش مخنوق شوية مش أكثر

بعدها بحاولي عشر دقائق وجدت ليـنا خلفي وهي تقول:

- شادي

أجبتها بحنق شديد:

- نعم

- إنت زعلان مني في حاجة؟

- إنتي شايفة إيه؟

- لو سمحت رد على سؤالي

- آه زعلان ومخنوق منك كمان، إنتي إيه بالضبط؟ إزاي أصحى

الصبح وأنزل قلاقي جاد معاكي في العربية؟ ده ملوش تفسير غير إنه كان

معاكي في البيت

- طيب ممكن تديني فرصة أشرحلك؟

قاطعتها:

- إنتي إزاي تعملي كده؟

- إنت فاهم غلط أرجوك اهدى وأنا هشرحلك كل حاجة

أخذت نفساً عميقاً ونفخت بشدة وتركتها تشرح الموقف

- هو فعلاً كان عندي في البيت بس ورحمة ماما في تربتها مافيش

حاجة من إلي في دماغك حصلت ، هو حاول يقرب مني ويؤسني بس أنا  
منعته وصديته ، اكتفين بس إننا نتكلم و نعرف بمشاعرنا مش أكثر، أنا  
لسه بنت وبشري يا شادي  
نظرت إليها وقلت :

— ليننا؟

— والله العظيم ماحصلش حاجة

— إنتي متأكدة من إلي بتقوله؟

— زي مايقولك كده بالضبط دي الحقيقة

— ليننا للمرة المليون بقولك جاد من دنيا وانتى من دنيا تانيه

خالص خدي حذرک

— أنا عارفه متقلقش، خلاص بقى بطل النبوء إلي إنت ضارب ده

أخذت أبخلق فيها حتى أجبرتني بطريقةتها على الابتسام سريعاً  
وكان شيئاً لم يكن، لكن كل ماحدث لم يكن يدفعني إلى القلق بقدر  
الارتياح من همسات من حولنا في الفندق، كنت أدعو الله أن لا تبوح سحر  
بأي شئ عن ليلة تعارف جاد ولينا خاصة وأن لها علاقات وطيدة ببعض  
زملائنا في الفندق، وأخذت أرى وأتقرب كل من حولي وبالأخص لمياء التي  
كانت ترمي الكلمات وتبوح بها هنا وهناك تاركة الآخرين لخيالهم  
الواسع، شعرت وقتها بخطر كبير سيصدر من جانبها عاجلاً أم آجلاً، و  
حاولت عدة مرات أن أنقل إلى لينا ما يدار ويحكى من وراء ظهرها ولكن

دون جدوى، كان رد فعلها دائماً هو عدم اللامبالاة والاكتراث.

يوماً بعد يوم أصبح تعلق لينا بجاد أقوى من أي وقت سبق، قوي  
لدرجة الهوس به، عاشت معه أحلى اللحظات، حتى الأماكن ارتبطت  
بذكرياتها معه، فلا أنسى تلك الصورة التي التقطها بنفسي لهما في سفح  
أهرامات الجيزة، و ذلك الفيديو المصور الذي وثقت فيه مغامراتهما معاً  
في بحر شرم الشيخ، وآخر وثقت فيه ممارستهما لرياضة الجولف، و  
آخر أثناء تجوالهما في المراكز التجارية، وفي النيل ليلاً كانت المشاعر  
تتقارب أكثر، حرصت لينا أن تعرفه على أصدقائها ليندمج أكثر في  
المجتمع.

كان عطاؤها له غير محدود أبداً، وفي إحدى المرات لم أكن متوجداً  
معهما لذا اتصلت بلينا لأطمئن عليها:

- شكلكم كده اتبسطوا إنه رده
- يعني المهم يكون هو مبسوط وسعيد
- أكيد طبعاً لازم يكون مبسوط وسعيد في إيه أكثر من إللي  
بتعمله عيشانه؟

- لا لا أبداً حاسه إن في حاجة بتحصل معاه ممكن كان بيحس  
بالسعادة مع حد تاني، وتقريباً أنا بعيدة كل البعد عن ده
- مش فاهمك

- حاسه إن في حد في حياته ويمكن حاجه مش حد مش عارفه

- نعم ؟؟؟

امتزج صوتها ببكاء مكتوم

- زي مابقولك كده حاسه بالعجز لأنني مش قادرة أخليه يفهمني

ويفهم طبيعة حياتنا صح ، بذلت كل ما في وسعي علشانہ وقدمت تنازلات

قدر الإمكان ، لكن هو ، حاسه زي ما مايكون كل واحد فينا واقف في طرف

فجوة ومش قادرين نعددها زي ما يكون في حاجه بتدفعه للهرب.

حاولت أن أخفف عنها وقلت:

- ليينا مهما عملتي مش هتقدري تغيري من طبيعة وحياة كل حد

تقابليه أو تعرفيه

- مقدرش ؟ ؟

- خالص

- إنت غلطان يا شادي طبعاً أقدر مافيش حاجة في الحياة

مستحيلة ، خد نفسك إنت مثال كنت قافل على نفسك لفترة طويلة في

حياتك ودلوقتي إتغيرت بمساعدتي ليك ، مش عايزاك تفهمني غلط ، أنا

عايزة أقول إن طالما نجحت معاك يبقى أكيد هنجح مع جاد كمان.

تحدثت كثيراً عن إصرارها في تغيير جاد ليلائم حياتها ، كما لو أنها

أرادت أن تثبت شيئاً من وراء ذلك ، مجرد رؤيتها لنفسها وهي تعشق

جاد الترك جعلها تدرك أن الطريق لم يكن خالياً أبداً من العقبات ، وفي

ليلة قمرية وجدت ليينا نفسها في غرفة جاد الترك على غفلة من الجميع

تحاول معه أن تفهم ما يعيقه ، طيبة قلبها هو ما دفعها إلى ذلك لكن جاد  
الترك فقد كان يعلم تمامًا ما يريده منها

وهو تقبيل تلك الفتاة البريئة أمامه  
كانت ترغب في احتضانه أبد الدهر

روت لي كل ما حدث وكأنها ترغب في تكرار الماضي أبدًا وأردفت :

- حسيت إنني عايزه أقف لحظة معاه، وقفت، و تأملت في عنيه،

وكانت دي أطول وأجمل لحظة

علمت أن عقلها لا يمكن أن يتحرر من هذا أو يكون كعقل شخص عاقل

يتفكر ويتدبر، وأن الوقوع في الغرام سيغير من حياتها وقدرها إلى الأبد

- وبعدها سبت نفسي ليه

لقد تبرعت له كزهرة، وأصرت بل وأقسمت، أن الأمر لم يتعد

القبلات، حتى وهي مستسلمة تمامًا له كانت تملك فرض السيطرة على

زمام تلك العلاقة، وأردفت :

- ممكن تكون بتقول جوى نفسك إن الوقوع في حب جاد الترك

كان غلطة كبيرة من الأساس أنا عشت حياتي كلها بتألم وبتعذب رغم كل

النجاحات والطموحات إللي حققته يمكن لو مكنتش قبلت إنني أرقص

معاه من البداية مكنتش حياتي هتتغير بالشكل ده كانت هتفضل حياة

طبيعية ماشية في خط مستقيم

ضحكت، ضحكة سخرية ممزوجة بالدموع والألم

— وده الواقع واللي مش قادرة أتعامل ولا أتفاهم معاه

رددت عليها قائلاً:

— يمكن تكوني إنتي فاهمة غلط ممكن يكون محتاج شوية وقت

— ومين عارف؟

ساد الصمت والسكون في مكالمتنا الهاتفية تلك لثواني قاتلة لتقول

بعدها:

— أنا هقفل مغاك دلوقتي

— ماشي، بس متحطيش الموضوع ده في دماغك كتير الأمور بسيطة

وأغلقت الخط وفجأة أرسلت لنا رسالة نصية على هاتفي تؤكد فيها

كلامها:

( نسيت أقولك إنك غلطان في نقطة التغيير يا صديقي العزيز والله

العظيم إنت غلطان )

أخذت وقتًا طويلًا أفكر في كل ما قالته لي لنا بشأن تلك الليلة،

وأخذت أعيد النظر في كل تلك الأيام التي وقفت فيه شاهداً على علاقة

جناد الترك بها، كل تلك الأحداث، وكل تلك الكلمات والأحاديث

بينهما، كل شيء، واتخذت قراراً أن أبحث على أي دليل أو برهان حتى

ولو كان صغيراً، لذا ألهمني الله أن أبحث في حسابه الخاص على الفيس

بوك، وأخذت أنظر في الصورة التي نشرها في حسابه، كانت أغلب تلك

الصور تجمع بينه وبين نثاة تدعى سارة تاج الدين لبنانية الجنسية،



يعود زمن تلك الصور إلى ثلاث سنوات مضت، و بالدخول والنظر إلى حسابها الشخصي فهي حاصلة أيضاً على الجنسية الأمريكية و مقيمة في دبي، كل ما أذكره عن شكل سارة تاج الدين من خلال صورها أنها كانت فتاة مصطنعة الجمال لا تستقر على لون شعر محدد، كما العدسات الملونة، أما وجهها فكان صارخاً بمستحضرات التجميل، ناهيك عن ذكر الملابس المفتوح كالشورت والبناطيل الضيقة والقمصان المثيرة، وكحال جاد الترك فكان على كتفها أيضاً وشم وهو عبارة عن ورود حمراء يتوسطها طير الحمام.

كنت متيقنا بأن جاد ربما لا يزال على علاقة بتلك الفتاة لسبب أو لآخر، وبالنظر إلى الأمور عن كثب فجاد لا تجمععه أي صفة مشتركة بينه وبين ليلى على الإطلاق كما هو الحال مع سارة تاج الدين التي لا أعلم عنها سوى هيئتها فقط. ليتضح في نهاية الأمر أنه بالرغم من إعجاب جاد الترك بليلى إلا أن الحب والغرام بينهما كان من طرف واحد فقط دون أن يبادلها جاد تلك المشاعر، في ذلك الوقت تساءلت عن ما قد يتطلبه الأمر لتدرك ليلى أنها بالنسبة لجاد مجرد جسد وكيان لأجل المتعة وقضاء الوقت السعيد هنا وهناك فقط، كانت مسألة وقت لأدرك أن مخاوفي قد بدأت في التحقق أخيراً.

مضت أيام تغير بعدها جاد الترك سريعاً، وأخذ يفكر ملياً في علاقته بلينا دون أن تدري، بالأحرى في فكرة تواجده في مصر من الأساس، فقبل أسبوع واحد فقط من انتهاء إقامته في القاهرة نفذ جاد وصية والدته في لقاء أسرتها التي لا يعلم عنهم شيئاً، آل موسى هو اسم العائلة يمتلكون السلطة والمال والنفوذ، منهم من يعمل في سلك القضاء والطب والاستثمار، ونظراً إلى الاسم والسمعة في ذلك الوقت فلم تكن تشوبهم شائبة.

ولكن كان اللقاء على غير المتوقع ولم ينل جاد الترك الترحيب الذي يستحقه شاب عاش بعيداً عن جزء من عائلته ولا يدري كل طرف عن الآخر أي شيء، كانت النتيجة هو طرده من منزل عائلة آل موسى شر طردة، مع تهديد وعيد بكل ما هو شر إذا ما وقعت أعينهم عليه.

وبالعودة إلى الماضي يرجع السبب إلى أن آل موسى كانوا رافضين لفكرة تزويج ابنتهم إلى رجل غير محصري، غير معروف الحسب والنسب والأصل، وبرغم أن والد جاد قد رفض مرات ومرات، انتهى الأمر بهروب والده جاد مع أبيه ليتزوجا في بيروت ومن ثم الهجرة إلى أمريكا. شعر جاد الترك بالحق الشديد على أثر ما حدث له من عائلة آل موسى، وامتد ذلك الغضب ليشمل كل شيء حتى وصل الأمر إلى الكرة

والحقد، حاولت لينا أن تتواصل معه و تلتقيه كما اعتادت أن تفعل معه ولكن دون أي ردة فعل منه، وفي أحد أيام العمل من ذلك الأسبوع الأخير، لم تكن لينا على طبيعتها هي الأخرى وكان شعور جاد أصبح كالفيروس المتفشي الذي إذا أصاب جسد أهلكه، وعندما وصلنا إلى الفندق وبدلاً من التوجه إلى مكتب الأستاذ حسن أو الرئيس بشن توجهت لينا مباشرة إلى المصعد، حاولت أن أوقفها وقلت لها:

- إنتي بتعملي إيه يا مجنونة؟

ردت بعصبية

- إيه؟ طالعله أشوف في إيه، بقالي كذا يوم مبيردش عليا ولا

بيسأل حتى

- طيب أصبري بس نتفاهم

- وسع عن طريقي بعد إذنك

وبمجرد أن أقفل باب المصعد عليها التفت حولي لأجد الأعين كانت مصوبة تجاهنا، وبعد أن كانت علاقة جاد بلينا مجرد همسات أصبحت أحاديث أكثر صراحة ووضوحاً، كانت كلماتهم مريضة جداً وأشبه بالكابوس

( شوف شوف، ده واضح إنهم غرقانين لشوشتهم على الآخر )

( إللي بتعمله ده شغل عاهرات أنا مش عارفة إزاي الإدارة سايبه

واحد زي دي في الفندق )

( وعماللي فيها أم الأدب والأخلاق )

( ولسه ياما هنشوف )

( واضح إن الليلة الحمراء مكفتهاش فطالعه تكمل معاه )

( عليه العوض في الأخلاق والشرف )

( قد إيه كنا كلنا مخدوعين فيها ، ياخسارة )

شخص ما قد أخبرهم بوجود علاقة بينهما ، كانت مسألة وقت ليتأكدوا بأم أعينهم إنها على علاقة مشبوهة ، ولم يكن لديّ ما أقوله سوى الحقيقة الوحيدة بأنه لم يكن أيا من ما يقوله الجميع صحيحًا ، أما الأستاذ حسن فقد اعتلى أعلى درجات السخط والغضب عمّا وصله من تلك الأحاديث ، فمن جهة لم تكن لدينا حاضرة معه لعدة أيام من أجل معاونته في بعض الأعمال التي يعتمد عليها فيها في مكتبه ومن جهة أخرى شعر بأن منصبه ووظيفته في خطر إذا ما اكتشفت الإدارة العليا بالفندق إنه يتستر على تلك الجريمة الأخلاقية .

طرقت لدينا باب غرفة جاد الترك مرارًا وتكرارًا ، وانتظرت له مدة كبيرة أمام بابه ، وصل الأمر أنها قد طلبت من خدمة الغرف أن يفتحوا الغرفة لها ، ولكن لم يكن جاد متواجدًا أبدًا باستثناء أغراضه الشخصية وحقائبه ، اتصلت به دون أي رد منه ، وحينما فقدت الأمل في انتظارها له ، نزلت ليعلم الأستاذ حسن بوجودها معنا ، طلب منها المجيء فورًا إليه وكانت تلاء أول مرة أسمع فيها صراخه عليها بحيث كان في إمكان

الجميع سماع ما يدور من حوار بينهما

- إنتي مالك الأيام دي في إيه؟ ها، فهميني، إنتي عارفة إللي بتعمله ده اسمه إيه؟ إنتي إتجننتي؟ سايبه شغلك علشان تقفي تحبيلي بره في الريسبشن؟ وكل ما أسأل عليكى إما مش موجودة أو مش فاضية أو واقفة في الريسبشن علشان حبيب القلب، أنا عايز أفهم إيه إللي بيحصل بالضبط؟

كانت لينا صامته تمامًا أمام بركان هائج من الغضب، لم تجبه لأنها كانت مخطئة كما يعتقد الجميع بل لأن عقلها كان مشغولاً بجاد الترك بحيث لم تكن تسمع ما يقوله الأستاذ حسن لها، وحين خرجت لينا من مكتبه ووقفت إلى جانبي لمباشرة العمل قالت لمياء شامته بشكل مستفز:

- مش قولتلك يا شادي إن أنا شامه ريحه مش مضبوطة

وأمام كل تلك النظرات المفترسة والثرثرات الهاتكة لعرضها كانت لينا ثابتة وكأنها صخرة أمام رياح عاتية، ظلت هكذا حتى انتهى يومنا في العمل، وفي ذلك المساء لم ترد على أي من اتصالاتي لها ما دفعني لأن أتصل بجاد الترك مباشرة لأفهم منه ما يجري، وبعد خمس اتصالات مني رد علي:

- أهلين

- ممكن أعرف يا جاد في إيه بالضبط؟

- وإنت إيه إللي يهملك في الموضوع؟

- إللي يهمني إن لينا حالتها النفسية سيئة بسببك

قال ببرود:

- أوف فعلا؟

- إنت يا أخي جنسك إيه؟ أومال كنت خاوتنا ليه بإعجابك بيها

وبتحبها والقصص دي لما إنت مش جد معاها و..

قاطعني قائلا:

- شوفت إنت قولت إيه؟ معجب، معجب بيها مش أكثر أنا

صحيح كنت طلبت منك إني أقعد معاها وأتعرف عليها. وكده وإنت

مقصرتش الحق يقال لكن حب لا لا إنت غلطان في النقطة دي

إنفعلت عليه بحدة قائلا:

- سبق وحذرتك يا جاد بلاش تلعب بقلبها وتحافظ عليه إنت

كده دوست على قلبها بطريقة قذرة دي كانت بتحبك

بهدهوء أعصاب:

- والله أنا مش ذنبي إنها حبتني وبعثتقده أن ده اسمه حب من

طرف واحد، يا صديقي في فرق واضح بين الإعجاب والحب وبعدين إيه

يعني هو أنا مش من حقي يبقى ليا في مصر معارف يخدموني لما أحتجهم

إنفجرت فيه وقلت:

- إنت عارف إنت بتقول إيه؟ إنت بتتكلم عن واحدة قدمتك

تنازلات كتيرة وضحت بسمعتها قدام الناس كلها علشانك يكون ده

جزاتها منك؟ دي أخرتها معاك يعني؟

ثم قال ناهياً معي المكالمة:

- إسمع أنا إللي عندي قولته ومن الآخر حتى لو إنت معتقد إن في علاقة من أي نوع بيني وبين لينا فانا أعدت نظر فيها ولو سمحت أنا مش فاضيلك ورايا حاجات عايز أعملها وانتهي.

وأقفل الخط، كنت مذهولاً من ما سمعته من جاد الترك الذي لا أنسى إنه كان يتوسل لقاءها والتقرب منها، أخيراً ذلك الوجه القبيح الموحش في داخله قد أظهره أخيراً، كان إحساسي تجاهه جاد الترك في محله، ووجدت نفسي في مهمة صعبة لأقول لها حقيقة جاد الترك ومشاعره الكاذبة تجاهها، حاولت أن أتصل بها لكنها لم تجبني مجدداً بل وذهبت إلى منزلها واستخدمت المفتاح الذي أعطتني إياه سابقاً، وحينما دخلت بحثت عنها في كل مكان، في الغرف في المطبخ في الصالون في الحديقة وفي الحمامات، لأكتشف في النهاية أنها لم تكن متواجدة في منزلها وكأنها اختفت هي الأخرى.

رجعت إلى منزلي ولم أنم تلك الليلة، بقيت مستيقظاً مشغول البال حتى صباح اليوم التالي، أنتظرتها كعادتي كل صباح لكنها لم تأت لتقلني معها إلى الفندق، فذهبت وحدي ليزيد قلقي عليها، وحينما وصلت وبدأت مباشرة عملي اكتشفت أن جاد الترك قد غادر الفندق في تمام الساعة العاشرة مساءً، أي بعد مكالمتي معه مباشرة، اتصلت بالمسؤول عن

حركة السيارات في الفندق وسألته:

- ألو

- أيوه يا أستاذ أوامرني

- لوسمحت في نزيل اسمه جاد الترك عمل مغادرة إمبارح الساعة

عشرة بليل متعرفش راح فين؟

- أيوه يا أستاذ مظلوط أنا حد كلمني من عندكم وقال لي إنه محتاج

عربية، السواق وداه المطار

- المطار؟

- أيوه يا أستاذ المطار هو في حاجة؟

- لا أبدًا مافيش شكرًا

ولم يمض كثير من الوقت حتى لاحظ الجميع دخول لينا إلى الفندق

وهي في حالة نفسية مزرية ورغم ذلك لم يرجمها أحد من الثرثرات

الجارحة ، وقبل أن تأخذ مكانها في الريسبشن سألتني بصوت يعتصره

الحزن والألم:

- مافيش أخبار عن جاد؟

ترددت في الرد عليها لتعلم من خلال ملامحي أن هناك أمرًا ما أخفيه

عنها:

- شادي أرجوك انت عارف حاجة عن جاد؟

- بصراحة يا لينا مش عارف أقولك إيه بصراحة



- في إيه؟

- جاد غادر الفندق إمبراح الساعة عشرة بليل

اتسعت عيناها من هول وقع الخبر عليها لتصرخ صراخاً هستيرياً

وتقول:

- إيه؟ بتقول جاد مشي لا لا مش ممكن إيلي إنت بتقوله ده،

جاد لا يمكن يسيبني إنت بتضحك عليا مش ممكن جاد يعمل كده، هو

بيحبني أنا عارفة ومتأكدة

جذب صراخها وبكاؤها أنظار من حولنا حتى النزلاء ولم يستطع

الأمن ومعهم إبراهيم ان يسيطروا على انفعال لينا وتهديتها، حتى

أنا شخصياً حاولت أن أمسكها من يدها إلا أن مقاومتها كانت صعبة

ل للغاية

- سيبوني

هكذا صرخت فينا جميعاً ليخرج الأستاذ حسن من مكتبه ويقول

- إيه في إيه؟ إيه الفوضى دي؟ لينا إنتي نسييتي نفسك ولا إيه؟ ما

يغور ولا يروح في ستين داهيه ده مكان شغل إحترمي نفسك

وبطريقة عصبية استطاعت لينا أن تخرق الجمع من حولها لتخرج

من الفندق نهائياً، كانت تأمل أن تعثر على جاد الترك، وعندما خطوت

خطوتين لألحقها أوقفني الأستاذ حسن بصوته قائلاً:

- شادي هتروح فين؟ إحنا مش فاشين لدلع البنات ده وأعتقد ده

مكان شغل كفاية عطلة ولو سمحت إرجع لشغلك

- بس يا فندم أنا

وقبل أن أكمل كلامي صوت اصطدام مخيف هز قلوب كل من كان واقفاً  
شاهداً على ما يجري، خرجت من الفندق لأرى كل من في الشارع يهرول  
على قدميه باتجاه الحادث

- يا ساتر يارب

- لا حول ولا قوة إلا بالله

كان لسان حال الجميع لا ينطق إلا بتلك الجملتين، وعندما وصلت إلى  
التجمع الكبير حول الحادث بصعوبة بالغة وجدت سيارتين قد اصطدما  
ببعضهما بقوة بالغة وعلى الجانب كان أحدهم ملقى على الأرض، أخافني  
المنظر كثيراً، اقتربت وكانت ليثا هي الملقاة على الأرض والدماء من  
حولها تسيل، كانت كجثة هامة لا تتحرك، اقتربت منها وأخذت أصيح  
بأعلى صوت طالباً للنجدة:

- ألحقوني يا ناس ليثا بتموت، يا إبراهيم يا إبراهيم، حد

يلحقني بسرعة البنت بتموت

لا أدري ماذا حدث بعدها ولا كيف مر الوقت سريعاً حتى وصلنا  
مستشفى القصر العيني بعربة الإسعاف ومنها إلى الطوارئ، تبين أن ليثا  
تعاني من كسور عدة في جسمها وفي الجمجمة وارتجاج في الدماغ أدى إلى  
غيبوبة، أمضت ليثا ساعتين في المستشفى حصلت خلالها على أقل القليل

من الرعاية والعناية الطبية حتى توصلت إلى قرار نقلها من القصر العيني إلى مستشفى الشيخ زايد التخصصي، وهناك لم يستطع الأطباء أن يفعلوا لها شيئاً سوى وضعها في غرفة خاصة بها تحت رحمة العناية المركزة. وحينما سألت أحد الأطباء عن حالتها وعن إمكانية إنقاذ حياتها قال لي: - للأسف حالتها صعبة جداً وأي تدخل جراحي في حالتها دي ممكن يضر بيها أكثر خصوصاً إن الدماغ والجمجمة عندها في حالة ضرر شديد، إحنا لا نملك سوى الدعاء ولو ربنا أكرمها ساعتها هنشوف هنعمل إيه

وهكذا ظلت ليلى على تلك الحال لأيام وأيام دون أي حركة واستجابة منها، رؤيتها وهي في تلك الحالة ذكرتني حينما وجدتني ملقاة على الأرض في غرفتها حينما استنجدت بي وبقيت في غرفتها حتى أفاقت من إغمائها، الفرق الوحيد هو أنها في وضعها هذا كانت معلقة بين الحياة والموت، وصلت إلى درجة نسيان شكل ابتسامتها، وطريقة مشيتها، كيف كانت تتكلم، صوت ضحكتها، ورائحتها العطرة، نسييت حتى شكل وجهها القمري الجميل، لم أكن أملك سوى قراءة القرآن الكريم والدعاء لها.

أما معارفها وأصدقائها فقد توسلت وتضرعت إليهم بل وناشدتهم لكي يأتوا ويزوروها، لكن لم يأت أي أحد من هؤلاء الذين حضروا الكثير من حفلاتها ومناسباتها ولم يتذكروا حتى تلك المواقف النبيلة منها

تجاههم، لم أجد سوى أن كتبت في صفحتها الخاصة على الفيس بوك  
( يا جماعة ليينا في مستشفى الشيخ زايد التخصصي وحالتها سيئة  
وخطرة جداً هي ملهاش حد ومش محتاجة فلوس أنا متكفل بكل  
التكاليف بس أرجوكم تعالوا شوفوها وأقفوا جمبها وادعولها مش أكثر )  
انتظرت أن يستجيب أحدهم لما كتبت، ولكن دون أي جدوى، أما عن  
جاد الترك فقد أرسلت له رسالة خاصة على حسابه في الفيس بوك  
أخبرته فيها عن ماجرى وما وصلت إليه ليينا بسببه، وحتى هو الآخر لم  
يرد على رسالتي رغم أنه قد ظهر لي أنه قد قرأها.

اتصلت بالأستاذ حسن لأطلب منه أن يأتي ويقدم أبسط أنواع المساعدة  
المعنوية، فكانت المفاجأة أن رد علي وقال:

- مقدرش أنا، أنا مقدرش آجي
- بس دي كانت أفضل موظفة عندك وكنت بتعتبرها دراعك  
اليمين وبتعتمد عليها
- لما البني آدم يوصل لجافة الموت وتبقى حالته بالشكل ده أعتقد  
إن الحل هو وجود بديل يعتمد عليه بدل الاعتماد على حد هينتهني  
خلاص

اتصلت بكل من خطر على بالي في تلك اللحظة، إتصلت بلمياء وطه  
وإبراهيم وسحر بل حتى بأحلام، وصلت إلى الجميع قدر استطاعتي،  
كنت المتبقي الوحيد لديها، وتذّرت وقتها ذلك الكابوس المزعج الذي

حلمته بشأن لينا، تذكرت منظرها وهي محاطة بأشخاص قد التفو حولها ووجوههم اتشحت بالسواد حال ملابسهم وهم يأكلون من لحمها في نهم شديد، وتذكرت نفسي وأنا مقيد لا حول ولي ولا قوة لأرى هؤلاء يأكلون لحمها العاري دون أن تشعر بالألم وهي على قيد الحياة، تلك اللحظة وباسترجاع كل ما حدث لها في ذاكرتي، فسر الكابوس نفسه أخيراً.

وفي منتصف ليل أحد الأيام أثناء إقامتي مع لينا في المستشفى سمعت صوت أحدهم وقد أصدر جلبة كبيرة خارج قسم العناية المركزة، كان ذلك الشخص مصرّاً على الدخول إلا أن ممرضاً وفردين من الأمن قد أوقفوه، قال الممرض بعصبية:

- عايز إيه يا أستاذ؟ ممنوع بقولك مافيش زيارة دلوقتي

- عيب كده ياخي أنا اسمي الدكتور..

قاطعته وتدخلت لانتشله من هذا الموقف:

- دكتور شريف؟

نظر إلي وقال في لهفة وقد إغرورت عيناه بالدموع:

- أيوه أيوه أنا الدكتور شريف أنا والد لينا

أقنعت الممرض والأمن أن يدخل الدكتور شريف مع وعد مني أن لا يصدر أي جلبة أو إزعاج في العناية المركزة وأن لا يطيل بقاءه أكثر من عشر دقائق، كان الدكتور شريف يبدو كرجل قد هلكه العمر ليحصل رأسه على رصيده من الشيب وعلامات العجز ظاهرة على وجهه وبالكاد كان

يستطيع المشي ، فأخذت بيده لأساعده على المشي وهو يترقب بعينيه الدامعتين ويسأل في أي غرفة ترقد ابنته الوحيدة ، وحينما إقتربنا قليلا من الغرفة قال لي :

- لما قرئت كلامك على صفحتها في الفيس بوك أنا كنت في ألمانيا سبت كل إللي ورايا وإللي قدامي وجريت زي المجنون وما صدقت لاقيت أول طيارة علشان آجي مصر ، تصدق يا بني ، برغم كل العمايل إللي عملتها وبعادي عنها وسوء معاملتي ليها إلا أنها عمرها مارفضت أي اتصال مني ليها ، صحيح إن كان في جفاء وهي بتكلمني ، بس عمرها مقطعت العلاقة وكأنها كانت ساينه الباب موارب بيني وبينها

وعندما أدخلته ورأى ابنته في تلك الحال إجهش في البكاء ولسانه لا ينطق سوى :

- يا بنتي ، يا حبيبتي يا بنتي ، إن شاء الله أنا ولا إنتي ، تعبتي كثير يا حبيبتي ، سامحيني يا بنتي لأنني مكنتش جميعك طول السنين دي كلها

لم أستطع أن أتحكم في مشاعري إذ أخذت في البكاء أيضاً من هذا المنظر المحزن ، أخرجته من الغرفة وتمكنت من تهدأته ورويت له كيف تعرفت عليها ، وكيف كانت تمضي الوقت في حياتها الشخصية ، وكيف أن لها الفضل في تغيير حياتي كلها ، وعن ثقتها العمياء في والتي رفعتها في أن تعطيني مفتاح منزلها لأستخدمه في حال تعرضها لأي سوء ، حتى

وصلت لقصتها مع جاد الترك وعن الطريقة التي تخلق عنها حال كل المحيطين بها من معارف وأصدقاء.

كان الدكتور شريف ينصت إلى ما أقوله له عن حياة ابنته دون أن يعلق ولم أتمكن من إكمال حديثي معه بسبب رغبة الأمن في رحيله من المكان والعودة في الأوقات المحددة للزيارة، ووعده بأن أعطني بها وأتصل به من وقت لآخر.

مرت أيام أخرى وحالة ليلى من سيئ إلى أسوأ، وفي عصر أحد تلك الأيام الأخيرة سمعت ليلى وهي تنن وتتألم، اقتربت منها وناديت باسمها مراراً، كان وجهها منتفخاً تملؤه الكدمات لذا لم تتمكن إلا من فتح عينيها اليمنى فقط، نظرت إلي لتذرف دمعة وقد علمت أن تلك الدمعة هي آخر ما سآراه من ليلى، وبعد ذلك أغلقت عينيها وكأنها نامت إلى الأبد، لأسمع بعدها صوت جهاز ضربات القلب وكان ذلك المؤشر الأخضر يسير في خط مستقيم.

علم والدها ب وفاة ليلى وأخذنا جثتها بعد استيفاء كل الإجراءات اللازمة، لتدفن في مقابر العائلة إلى جانب والدتها، وحتى في دفنتها لم يأت أي أحد، كنت أنا ووالدها فقط، وعندما أعطيته مفتاح منزلها أمسك بيدي وأغلقها على المفتاح قائلاً:

لا يابني المفتاح كان وهيكون معاك على طول، ليلى ابتهلوك لسبب أنا عن نفسي لا المفتاح ولا البيت يلزموني، أنا بنتي راحت مني

خلاص، خليه معاك، ليننا هتترتاح أكثر في قبرها لو فضل المفتاح معاك،  
كتر خيرك، كتر ألف خيرك يابني على كل إللي عملته مع بنتي  
وكانت تلك المرة الأخيرة التي أرى الدكتور شريف فيها، تركني في  
المقابر وهو منهار في البكاء يأنب نفسه على ما فعله في الماضي وبقيت أنا  
متسمرًا أمام قبرها وقد تذكرت ذلك الكابوس مجددًا.



ساد السكون في غرفة الدكتور مصطفى الذي توقف عن الكتابة بسبب

تأثره بمأساة شادي منتظراً ان يبوح بما في صدره من ذلك الماضي المؤلم

- بعد وفاة لينا حسيت إني بني آدم ثاني، بني آدم ثاني عمري  
 ماعرفته، كنت كل ما فتكر الناس إليّ إتخلوا عنها إتجنن وأتعصب،  
 كنت بتمنى في كل لحظة وكل دقيقة إني أشوفهم علشان أولع فيهم بعود  
 كبريت، إتمنيت في لحظة أن لو الماضي رجع يمكن كنت أقدر أمنع جاد  
 إنه يقرب من لينا يوم عيد ميلادها يمكن ممكن ده كله حصل، كنت  
 دايماً حابس نفسي في الأوضة ومن اليأس لاجأت للانتحار أكثر من مرة،  
 جبت كل أنواع الخمور وأدمنت عليها كلها مع الوقت، حاولت إني أفتح  
 بطني بسكينة وفشلت، الخيار الوحيد إليّ كان عندي والشيء الوحيد  
 إليّ كنت أقدر أسيطر عليه هو إزاي وإيه الطريقة إليّ أموت بيها علشان  
 أروح ليها ثاني، جبت حبل وطلعت فوق سطوح العمارة علشان أشنق  
 نفسي، لكن لسوء حظي الخشب إليّ ربطت فيه طرف الحبل متحملش  
 وزني واتكسر، فجأة لاقيت البواب وسكان الدور الأخير طلعلوا واتلموا  
 عليا بيصرخوا من الخضة، حتى الناس إليّ حوليا منعوني إني أموت  
 بالطريقة إليّ أنا عايزها علشان أوصل في النهاية إن ميكونش عندي  
 الجرأة أو القوة علشان أعمل أي حاجة، جابولي شيخ قعد يوعظ فيا

ويقرالي قرآن ويدفعني للحياة بالرغم أن مكنتش شايف أي أمل أبداً،  
كنت كل إللي بفكر فيه هو إني مش هشوفها تاني..

وده إللي حصل، ألاقى نفسي معاك، في العيادة بتكلم معاك  
أمتلأت عيناه بالدموع وأكمل قائلًا:

- بتكلم معاك عن ليينا، علشان أخسرها تاني، أنا مقهور لأنني  
مش مع ليينا عند ربنا دلوقتي، بس وبرغم ده كله مدين ليها بالامتنان  
لأنها كانت في حياتي

نظر إلى الأوراق في يد الدكتور مصطفى وقال:

- ودلوقتي أنا عارف هعمل إيه، هكمل حكايتها، يمكن الناس  
تعرف الحقيقة في يوم من الأيام

تأمل الدكتور مصطفى فيما يقوله وقال:

- إنت متأكد أنك عايز تعمل ده؟

أوما له شادي برأسه ولا زالت الدموع تملأ عينيه

- طيب يا شادي على كل الوقت إتأخر وهحدد لك جلسة بعد

يومين علشان نكمل كورس العلاج

- لو ربنا كاتبلنا العمر

\*\*\*

إنه أنا من يكتب تلك الكلمات الأخيرة وليس الدكتور مصطفى،

وبينما أكتب هذه الكلمات ليلا في المركب النيلي ذاته الذي قضيت فيه

وقتًا مع ليلى أول مرة، أنظر إلى فندق الهيلتون الذي كان فيما مضى سرابًا متألقًا وحلمًا قد انتشطني من حياة قارب الفقر على إعيائها مرضًا، الآن فقط أصابني أهل الهيلتون بالغثيان بسبب خستهم وندالتهم، وقبل أن آتي إلى هذا المكان، عدت إلى ذلك المنزل الكبير الفارغ وكان كل شيء فيه كما كان يشع فقط بذكريات من كانت تعيش فيه، تذكرت كل الأحاديث بيننا وكل تلك اللحظات السعيدة التي كانت تجمعني بها في منزلها، وتذكرت كيف دخل الحقد والفساد إلى قلوب معارف وأصدقاء ليلى بينما وقفت أمامهم جميعًا كشخص وحيد يتحدى الجميع رغم قساوة الماضي ومرارة الحاضر.

القمر يرتفع ليزين ستار الليل ولكن دوننا النجوم، ووقفت أنا حزينًا على ذلك الماضي وفكرت في ليلى وهي تنظر إلى جانبي إلى ذلك القمر وهو يضيئ السماء من أجلها، برغم كل ما يحيط بها أتت لتبعد الناس وتجمعهم من حولها على أمل أن تجد فيهم الدفء والرحمة لكنها لم تكن تعلم أنها قد جمعت وحوشًا على هيئة بشر، لتعطيها الحياة درسًا قاسيًا، ولم يكن ذلك الدرس الذي كانت تتوقعه أبدًا.

بعد وفاة ليلى حصلت لمياء على مكانها ومساهما الوظيفة كنائب للمدير وطردهي الأستاذ حسن من العمل بعد هذه الواقعة مباشرة، وعن الآخرين فهم الآن يتمتعون بحياتهم ودينهم وكان شيئًا لم يكن.

أما جاد التزل، فهو يعيش الآن في دبي مع زوجته جميلة صاحب الدين

حيث إفتتح فرعاً لشركته في أمريكا هناك وقد علمت ذلك من خلال صفحته على الفيس بوك بعد أن حذفني ولينا من قائمة أصدقائه. وعن حياتي فقد عدت مجدداً كما كنت في السابق قبل معرفتي بلينا وقد توفيت أُمي بعد وفاة لينا بسنة تقريباً لأصبح وحيداً ولا أملك سوى منزلي ومنزل لينا وبعضاً من الذكريات، حتى الآن لازلت أمر على منزلها وأقضي فيه بعض من الوقت وأعتني به وبنظافته كما لو أنها تعيش فيه.

ولم أتخلَّ عن زيارتها في قبرها حتى هذه اللحظة. تلك هي قصتي مع لينا، إن كنتم تعتقدون أنها مذنبه فلا تلقوا كامل اللوم عليها وإن كنتم تعتقدون أنها ضحية فترحموا عليها في قبرها، قبل أن تقررُوا أسألوا أنفسكم هل يعتبر الحب والعشق والهروب من سجن الوحدة إلى أحضان الحياة وسط البشر خطيئة في مجتمع لا يرحم؟

## الكاتب

ماجد عبد الله

ولد في إمارة أبوظبي بدولة الإمارات العربية المتحدة عام 1988

درس الإعلام وفنون الاتصال وتخرج من قسم الإذاعة والتلفزيون من

جامعة 6 أكتوبر في 2010

عمل مراسلاً ومذيعاً للتقارير في عدد من القنوات الفضائية الخاصة في

البرامج الإخبارية والسياسية والاجتماعية

تخصص في عمل التحقيقات و"الفيتشرات" ذات الطابع الاجتماعي

والإنساني

صدر له رواية (حادثة جينزا) ورواية (قمر لينا) العمل الثاني له

---

للتواصل مع الكاتب

Majidabdallah10@yahoo.com

\*\*\*





# قمر لينا

كانت تدفعني من وراء كلماتها تلك إلى حب الحياة  
ومن ثم قالت كلمات أخرى بدت لي مألوفة :  
"ومهما حصل، حب على قد ما تقدر ومتبخلش على  
قلبك، واكره قد ما تكره.. ولوم القدر إذا جارت عليك  
الدنيا في يوم من الأيام و اصبر، لكن لما هتوصل للنها  
لازم تسامح من قلبك"  
لم أتصور للحظة، أنها سوف تقول لي وصية أمها لها  
ولكن بدا لي حينئذ أن لكل وقت في حياتها وعمرها  
محطة تتوقف عندها حسب الموقف وتستحضر  
الذكرى لتأقلمه حسبما تعاصر!



ماجد عبد الله